

# MECLİS - i MEŞÂYİH DEFTERLERİ

7

**PROJE YÜRÜTÜCÜSÜ**

HASAN KAMİL YILMAZ

**EDİTÖRLER**

HASAN KAMİL YILMAZ

AYHAN IŞIK

MELİHA AYDINLI



Türkiye Diyanet Vakfı Yayınları Yayın No. 1568  
İSAM Yayınları 277  
Başvuru Eserleri Dizisi 55  
© Her hakkı mahfuzdur.

## MECLİS-i MEŞÂYİH DEFTERLERİ

### 7. Cilt

**Proje yürütücüsü** Hasan Kamil Yılmaz  
**Editör** Hasan Kamil Yılmaz, Ayhan Işık, Meliha Aydın  
**Yayın danışmanı** İsmail Kara, Bilgin Aydın



TDV İslam Araştırmaları Merkezi (İSAM)  
tarafından yayına hazırlanmıştır.  
İcadiye-Bağlarbaşı Cad. 38 Üsküdar / İstanbul  
Tel. 0216. 474 08 50  
www.isam.org.tr yayin@isam.org.tr

**Yayın yöneticisi** Yaşar Çolak  
**Yayın editörü** Mustafa Demiray  
**Proje koordinasyon** Arzu Güldöşüren  
**Çeviri yazı ve özet** Ayhan Işık, Esra Yıldız, Meliha Aydın  
**Mukabele** Esra Yıldız, Beşir Şen, Ayhan Işık, Nedim Pakırdağ,  
Nevzat Sağlam, Necati Döğüş, Meliha Aydın  
**Özetlerin redaksiyonu** Rabia Aydın  
**İmla** İneyet Bebek  
**Grafik uygulama** Ender Boztürk  
**Kapak tasarım** Hasan Hüseyin Can

Bu eser  
TDV İslam Araştırmaları Merkezi'nin (İSAM)  
Meclis-i Meşâyih Defterleri Projesi  
kapsamında yayımlanmıştır.

Bu kitap  
İSAM Yönetim Kurulu'nun  
29.08.2025 tarihli ve 2025/07 sayılı kararıyla basılmıştır.  
Birinci Basım: İstanbul, Eylül 2025  
ISBN 978-625-428-799-2 (Tk.)  
978-625-428-806-7 (7. Cilt)



**Basım, Yayın ve Dağıtım**  
TDV Yayın Matbaacılık ve Tic. İşl.  
Ostim OSB Mahallesi, 1256 Cadde, No. 11  
Yenimahalle / Ankara  
Tel. 0312. 354 91 31 Faks. 0312. 354 91 32  
bilgi@tdv.com.tr  
Sertifika No. 48058

Meclis-i Meşâyih defterleri / ed. Hasan Kamil Yılmaz, Ayhan Işık, Meliha Aydın. -  
İstanbul ; Ankara : İslam Araştırmaları Merkezi (İSAM) ; Türkiye Diyanet Vakfı, 2025.  
7. c. (650 s.) ; 28 cm. - (Türkiye Diyanet Vakfı Yayınları ; 1568. İSAM Yayınları ; 277.  
Başvuru Eserleri Dizisi ; 55)  
ISBN 978-625-428-799-2 (Tk.) 978-625-428-806-7 (7. Cilt)

MECLİS - i MEŞÂYİH  
DEFTERLERİ

1741  
Numaralı  
Müzekkire ve Derkenâr  
Defteri



## 1741 NUMARALI MÜZEKKİRE VE DERKENÂR DEFTERİ

IST\_MFT\_MSH\_DFT02\_01741\_0001-0001<sup>1</sup>

**Tekke ve zaviye şeyhleri ile tahsilde bulunan evlatları ve aynı zamanda dergâhların türbedar ve meydancı gibi görevlilerinin de askerlikten muaf tutulmaları talebi.**

| Bâb-ı Fetvâ Meclis-i Meşâyih                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                             |                               |          |                      |               |          |                |                 |                                      |                               |
|------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|-------------------------------|----------|----------------------|---------------|----------|----------------|-----------------|--------------------------------------|-------------------------------|
| Târih-i Tesvîd                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                           |                               | Müsevvid | Evrak Odası Numarası | Husûsî Numara | Başkâtib | Hülâsa-i madde | Sâdırâ numarası | Târih-i Tebyîz                       |                               |
| Arabî                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                    | Rumî                          |          |                      |               |          |                |                 | Arabî                                | Rumî                          |
| Fî 24 Ra. sene 1338                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                      | Fî 17 Kânûn-ı evvel sene 1335 | -        | -                    | -             | -        | -              | 135             | Fî 27 Ra. sene 1338 [20 Aralık 1919] | Fî 20 Kânûn-ı evvel sene 1335 |
| <p>Tekâyâ ve zevâyâ-yı şerîfe meşâyih ve sükkânı bu dîn ve millet-i mu'azzama ve hükûmet-i mufahhama-i Osmâniyye'nin te'âlî-i şevket ve satvetine hemîşe hâdim ve du'â-hân olmağla bu gibi şe'âir-i islâmiyye'den olan hıdemât-ı mukaddesenin uluvviyetini muhâfazaten hıdemât-ı askeriyeden istisnâları için hıdemât-ı askeriyeden istisnâları selâtîn-i adl-i âyîn-i Osmâniyye'nin mine'l-kadîm kavânîn-i münîfeleri iktizâ-yı âlîsinden olup bu husûs bi't-tabî' hükûmet-i seniyyenin dahi cümle-i makâsîd-ı ulviyyesinden bulunduğu şübhesiz olmasına binâen istisnâları bi'l-umûm tekâyâ ve zevâyâda postnişîn bulunan meşâyih ile tarîk-i tahsilde bulunan evlâdının ve dergâhların türbedâr ve meydancı gibi hıdemât-ı mebrûre-i lâzime ashâbının kemâ-fî's-sâbık askerden istisnâları hakkında derdest-i müzekkire bulunan Ahz-ı Asker Kânunnâmesi'ne madde-i mahsûsa ilâvesiyle dâ'iyân-ı mûmâ-ileyhim haklarında ez ser-i nev lütf u âtfet buyurulması mutazarrı' bulunmuş idiğinden rehîn-i tasvîb-i sâmi-i cenâb-ı Meşîhat-penâhîleri buyurulduğu takdîrde keyfiyyetin bâ-tezkire-i aliyye makâm-ı âlî-i âidine iş'âr buyurulması bâbında.</p> <p>Ahmed Remzi, Vahyî, Mustafa Hakî, Seyyid Mehmed es-Sükûtî, Ali, Tevfik</p> |                               |          |                      |               |          |                |                 |                                      |                               |

IST\_MFT\_MSH\_DFT02\_01741\_0001-0002

**Kocamustafapaşa'da Hacı Kadın diğer adıyla Mihrişah Hatun Zaviyesi Camii'nin meşihat, hitabet ve imamet cihetlerine talip olanların, belirtilen güne kadar Meclis-i Meşâyih'e müracaat etmeleri gerektiğinin gazetelerde ilanı.**

Fî 8 Ra. sene 1338 / Fî 1 Kânûn-ı evvel sene 1335 / - / - / - / Sîret / - / 134 / Fî 8 Ra. sene 1338 [1 Aralık 1919] / Fî 1 Kânûn-ı evvel sene 1335

İ'ân

<sup>1</sup> Tabloda bulunan başlıklar, diğer kararlarda tekrar edilmeden bu bilgi sırasına göre verilmiştir.

Kocamustafapaşa'da Hacı Kadın nâm-ı diğer Mihrişah Hatun Zâviyesi Câmî'-i şerîfinin tarikat-i aliyye-i Sünbüliyye'den meşihat ve müntesibîn-i ilmiyyeden hitâbet ve imâmet cihetlerine tâlib olacak zevâtın şehir-i Kânûn-ı evvel'in on beşinci Pazartesi günü ba'de'z-zuhr sâ'at üçe kadar tezkire-i Osmâniyye ve icâzetnâme ve evrâk-ı sâire-i müsbitelerini müstahiben cumartesi ve pazartesi ve çarşamba günleri Meclis-i Meşâyihe mürâca'at eylemeleri lüzûmu beyân olunur.

Vahyî, Mustafa, Mehmed Gülşen, Tevfik

IST\_MFT\_MSH\_DFT02\_01741\_0001-0003

**Vefat eden bir cihet sahibinin hissesinin, diğer hisse sahibine tevcihi gerekiyorsa da hissedarın talip olmadığı durumda nasıl bir işlem yapılacağıının Evkaf Nezâretinden sorulması.**

Fî 6 Ra. sene 1338 / Fî 29 Teşrîn-i sâni sene 1335 / - / - / - / - / 133 / Fî 6 Rebî'ülevvel sene 1338 [29 Kasım 1919] / Fî 29 Teşrîn-i sâni sene 1335

Müzekkire

Hisseli cihât sâhiblerinden birinin vefâtında hisse-i mahlûlenin tâlib olduğu sûrette ol bâbdaki mevâdd-ı nizâmiyye mücebince hissedârına tevcihi muktezî ise de hissedâr hisse-i mahlûleye tâlib olmayıp da müstenkif bulunduğu sûrette ne yolda mu'amele icrâ edileceğine dâir sarâhat-i nizâmiyye olmadığından bu bâbda nezâretle cereyân eden mu'amelenin bâ-tezkire-i aliyye Evkâf-ı Hümayûn Nezâreti Vekâlet-i aliyyesinden istifsâr buyurulması menû-ı emr ü irâde-i aliyye-i hazret-i Meşihat-penâhîleri olmağın ol bâbda.

Ahmed Remzi, Vahyî, Seyyid Mehmed es-Sükûtî, Mustafa, Mehmed Gülşen, Tevfik

IST\_MFT\_MSH\_DFT02\_01741\_0001-0004

**Tekke, zaviye şeyh ve dervişlerine, memurlara verilen fiyattan kömür verilmesi hususunun Evkaf Nezâretine bildirilmesi.**

Fî 3 Ra. sene 1338 / Fî 26 Teşrîn-i sâni sene 1335 / - / - / - / - / Sîret / Mürâca'at-ı vâkî'a üzerine meşâyihe Evkâf'tan kömür i'tâsı hakkında / 132 / Fî 3 minhü [26 Kasım 1919] / Fî 26 minhü

Müzekkire

Müstağnî-i arz olduğu üzere meşâyih ve dervîşânın cümlesi akvât-ı yevmiyyelerini tedârikten âciz fukarâdan oldukları gibi ahvâl-i hâzıra dolayısıyla tekâyâ ve zevâyâ muhassasât-ı ayniyyesinin makâdîr-i mu'ayyenesinden dûn mikdârda i'tâ olunmakta olduğundan zarûret ve ihtiyâcları tezâ'uf ettiği ve şedâid-i şitânın hüküm-fermâ bulunduğu şu sırada ve bi'l-hâssa mukâbeleye mahsûs eyyâm ve leyâlî için mahrûkât tedârîki gayr-i kâbil olduğundan hâlleri şâyân-ı terahhum bir dereceye gelmiştir. Mûmâ-ileyhimin hükûklarının her vechile muhâfazası Evkâf-ı Hümayûn Nezâret-i aliyyesinin vezâif-i asliyyesinden bulunduğu cihetle vakıf ormanlardan istihşâl edilen kömürden nezâret-i müşârun-ileyhâ me'mûrîn ve müstahdemînine verilen nisbet ve fiyâtlarla bi'l-umûm meşâyihe dahi i'tâsıyla tehvîn-i ihtiyâcları esbâbının te'mîni husûsunun sûret-i müessirede nezâret-i müşârun-ileyhâya iş'âr buyurulması bâbında.

Vahyî, Ahmed Remzi, Mustafa, Tevfik

IST\_MFT\_MSH\_DFT02\_01741\_0001-0005

**Silivrikapı'da Seyyid Seyfullah Efendi Dergâhı'nın vefat eden şeyhi Şücaeddin Efendi'nin hanımının dergâhtan tahliyesi.**

Fî 26 Safer sene 1338 / Fî 20 Teşrîn-i sâni sene 1335 / - / - / - / Sîret / - / 131 / Fî 28 Safer sene 1338 [22 Kasım 1919] / Fî 22 Teşrîn-i sâni sene 1335

Müzekkire

Silivrikapı civârında Seyyid Seyfullah Efendi Hazretleri Dergâh-ı şerîfinin mevcûd binâsını müteveffâ Şeyh Şücaeddin Efendi'nin haremi fuzûlî işgâl ile dergâh-ı mezkûr şeyh nâibi Mustafa Nûri Efendi'nin dergâha duhûlüne ve ifâ-yı vazîfe etmesine mûmâna'at etmekde nizâmnâme ve ta'limâtname ahkâmına tevfikân icrâ kılınan teblîgâta rağmen dergâhı tahliyeden imtinâ'da temerrüd eylemekte olduğuna ve şu hâl şart-ı vâkıfa ve ahkâm-ı nizâmiyyeye külliyyen mugâyir bulunduğuna binâen lede'l-icâb zâbitaya dahi mürâca'at olunarak sûret-i kat'iyede dergâhın tamamen tahliyesiyle nâib-i mûmâ-ileyhe teslimi husûsunun Evkâf-ı Hümâyûn Nezâret-i aliyyesine iş'âr buyurulması bâbında.

Vahyî, Mustafa Hakî, Seyyid Mehmed es-Sükûtî, Mustafa, Tevfik

IST\_MFT\_MSH\_DFT02\_01741\_0001-0006

**Adana'da Kuruköprü Tekkesi'nin vakfiye ve deruhte kayıtlarına ait suretlerin Evkaf Nezâretinden istenmesi.**

Fî 26 S. sene 1338 / Fî 20 Teşrîn-i sâni sene 1335 / - / - / 426 / Sîret / - / 130 / Fî 28 Safer sene 1338 [22 Kasım 1919] / Fî 22 Teşrîn-i sâni sene 1335

(Cevâb vürûduna kadar evrâkı hıfz olunacaktır)

Müzekkire

Adana'da Kuruköprü Tekkesi meşihat cihetinin tevcihi hakkında Adana Encümen-i Meşâyi-hinden vârid olan evrâkın hîn-i tedkîkinde mezkûr tekkenin vakfiyesini mütâla'aya ve öteden beri tedâvül ve der'uhde kayıtlarının bilinmesine lüzûm görüldüğünden suver-i musaddakalarının ihrâcî ile irsâli husûsunun Evkâf-ı Hümâyûn Nezâret-i aliyyesine iş'âr ve husûs-ı mezkûra dâir bazı ma'lûmâtı muhtevî olup merbûtan takdîm kılınan karar sûretinin yine i'ade olunmak üzere leffen tesyâr buyurulması bâbında.

Vahyî, Mustafa Hakî, Seyyid Mehmed es-Sükûtî, Mustafa, Tevfik

IST\_MFT\_MSH\_DFT02\_01741\_0001-0007

**Eyüp'te Kâşgarî Abdullah Efendi diğer adıyla Rûznâmçeci Murtaza Efendi Dergâhı'nın meşihat, imamet ve hitabet cihetlerine tayin edilen Şeyh Abdülhakim Efendi'ye; dergâha ait et bedeli yerine, etin aynî ve bulgur olarak, pirinç tahsisatının da pirinç olarak verilmesi.**

Fî 26 Safer sene 1338 / Fî 20 Teşrîn-i sâni sene 1335 / - / - / - / Sîret / - / 129 / Fî 28 S. sene 1338 [22 Kasım 1919] / Fî 22 Teşrîn-i sâni sene 1335

Müzekkire

Hazret-i Ebâ Eyyûb el-Ensârî -radiye anhü'l-Bârî- civârında kâin Kaşgârî Abdullah Efendi nâm-ı diğer Rûznâmçeci Murtaza Efendi Dergâh-ı şerîfi meşîhat ve hitâbet ve imâmet cihetleri ahîran uhdesine tevcih olunan Şeyh Abdülhakîm Efendi'nin derkâr olan fezâil-i ilmiyye ve kemâlât-ı ma'nevîyesinden istifâde ve istifâza maksadıyla âyende ve revendedgânı ve kendisinin âilesi kesir olmak hasebiyle dergâhın muhassasât-ı ayniyye ve nakdiyyesini tamamen istifâyâ ihtiyâcı mübrem olduğundan bedel-i nakdî verilmekte olan lahm ile bulgur olarak verilen pirinç muhassasâtının aynen ve tamamen itâsı ile dergâh-ı şerîf-i mezkûrun idâme-i ma'mûriyyetine delâlet olunması hakkında Evkâf-ı Hümâyûn Nezâret-i aliyyesine tezkire-i Meşîhat-penâhîleri tastîr buyurulması bâbında.

Vahyî, Mustafa Hakî, Seyyid Mehmed es-Sükûtî, Mustafa, Tevfik

IST\_MFT\_MSH\_DFT02\_01741\_0001-0008-9-10

**İstanbul'da Sultan Selim Camii civarında Cebecibaşı Mahallesi'nde Yanyalı Şeyh Mustafa İsmet Efendi Dergâhı postnişini Tokatlı Şeyh Mustafa Hâki Efendi'nin azledilerek, yerine kendilerinin tayinini talep eden Ahmed Nimetullah ve İsmet Efendizâde Sıddık efendilerin taleplerinin incelenmesi.**

Fî 21 S. sene 1338 / Fî 15 Teşrîn-i sâni sene 1335 / - / - / - / Sîret / - / 128 / Fî 28 Safer sene 1338 [22 Kasım 1919] / Fî 22 Teşrîn-i sâni sene 1335

Müzekkire

Cennet-mekân Sultân Selim Hân Câmi'-i şerîfi civârında kâin merhûm İsmet Efendi Dergâh-ı şerîfi meşîhati için keyfiyyet-i intihâbında usûl-i kadîmenin tağyîri cihetine gidilmesi muvâfık olamayacağı mülâhaza-i hümâyûn-ı ilhâm-makrûn-ı hazret-i Hilâfet-penâhî buyurulduğunu mübelliğ Mâbeyn-i Hümâyûn Başkitâbet-i celîlesinden vârid olup Meclis-i dâ'iyânemize havâle buyurulan 5 Safer sene 1338 târihli ve 125 numaralı merbût tezkire ve melfûfu Hâfız Halil Sami Efendi'nin ol bâbdaki arzuhâli kırâet olundu.

Cereyân-ı mu'âmele ve neticesinin beyânı işâret-i aliyye-i cenâb-ı Meşîhat-penâhîleri iktizâ-yı âlisinden olmasına binâen husûs-ı mezkûr hakkındaki dosya tekrar tedkîk ve kuyûda mürâca'at olundukta İstanbul'da Sultân Selim Câmi'-i şerîfi civârında Cebecibaşı Mahallesi'nde kâin ma'lûmü'l-hudûd konağını husûsî tekke ittihâz eden tarîkat-i aliyye-i Nakşibendiyye-i Hâlidîyye meşâyihinden Yanyavî el-Hâc Mustafa İsmet Efendi'nin bin iki yüz doksan sene-i hicriyyesinde vukû'-ı vefâtına mebnî mezkûr konağa mülkiyet iddi'â eden verese-i muvâcehesinde cereyân eden murâfa'a neticesinde konağın tarîk-i mezkûra mahsûs zâviye olmak üzere vakfiyeti sâbit olduğu ve meşîhati şeyh-i mûmâ-ileyhin hayatında nefsine ve ba'de vefâtihî oğlu Bahaeddin Efendi'ye ve ba'de vefâtihî hulefâ ve mürîdânı intihâbıyla kendi hulefâsından bir zâta ve kendi hulefâsı inkırâzından sonra kezâlik mürîdânı intihâbıyla mutlaka tarîkat-i mezkûre hulefâsından münâsib bir zâta meşrût bulunduğu hakkında huzûr-ı âli-i Fetvâ-penâhîde Rumeli Kazaskerliğinden sâdir olup el-yevm vakfiye makâmında Evkâf-ı Hümâyûn Nezâretinde mukayyed bin iki yüz doksan bir târihli i'lâmda mûndericidir. Mûmâ-ileyh Bahaeddin Efendi'nin vukû'-ı vefâtına mebnî cihet-i meşîhat ile cennet-mekân Sultân Abdülmecid Hân türbe-i şerîfesinde hatm-i hâcegân cihetleri Mehmed Şerîf Kudûs Efendi'ye ve ba'de vefâtihî bi'l-cümle mürîdânın intihâbıyla üç yüz üç târihinde İsmet Efendi'nin halîfesi Halil Nurullah Efendi'ye ve onun



vefâtıyla 15 Şevvâl sene 1322 târihinde hulefâ-yı hulefâdan Hacı Ahmed Efendi'ye ve onun vefâtıyla ciheteyn-i mezkûreteynin 26 Zilka'de sene 1323 târihinde vâkıfın halîfesi Nimetullah Efendi'ye tevcih olunmuş iken mûmâ-ileyh Nimetullah Efendi'ye hîn-i tevcihinde şart-ı vâkıf mücebince intihâb vukû' bulmadığından ve kendisi kisve-i meşâyihi iktisâ etmediği ve dergâh-ı mezkûrda sâkin olmadığı ve it'âm-ı ta'âm etmemekte olduğu cihetlerle Şûrâ-yı Evkâfca verilen karara binâen yalnız türbe-i şerîfede hatm-i hâcegân meşîhati ciheti uhdesinde ibkâ ile dergâh-ı mezkûr meşîhat cihetinin uhdesinden ref'iyle 1 Rebî'ülâhir sene 1333 târihinde tarîkat-i mezkûreden olup ancak şart-ı vâkıf vechile vâkıfın silsile-i tarîkatinden değil ise de deki berât-ı âliye nazaran müntesibin-i tarîk tarafından intihâb olunan Tokadlı Şeyh Mustafa Hâkî Efendi'ye bi'l-imtihân tevcih olunmak ve bu târihe kadar vâkıfın diğer mahdûmu Sıddık Efendi'ye dahi iki defâ tevcih mazbatası [0009] tanzim edilmiş ise de tedkik-i âlî'ye iktirân etmemiştir.

Bi'l-âhare mûmâ-ileyhimâ Nimetullah ve Sıddık efendilerin mürâca'atları üzerine Şûrâ-yı Devletce sorulan mütâlâ'aya cevâben Meclis-i dâ'iyânemizden yazılan müzekkire fezlekesinde Nime-tullah Efendi hakkındaki tevcihte ber-müceb-i şart-ı vâkıf mürîdânın intihâbı resmen tahakkuk etmediği ve Mustafa Hâkî Efendi hakkındaki tevcihte dahi mürîdânın intihâbnâmesi bulunmamakla beraber vâkıfın kendi hulefâsı ve Meclis-i Meşâyihi'de isbât-ı iktidâr eden mahdûmu Sıddık Efendi mevcûd olmağla şûrût-ı vakfiyyeye ve ahkâm-ı nizâmiyyeye muhâlif idiği cihetle mûmâ-ileyhimâ Nimetullah ve Hâkî efendilere vukû' bulan tevcih mu'âmelelerinin "keen lem yekûn" addi ile şûrût-ı vakfiyyeye ve ahkâm-ı nizâmiyyeye tatbîkan ve müceddeden meşîhat-i mezkûrenin müstahık olan zâta tevcihi lâzım geleceği mütâlâ'ası arz ve ol vechile iş'âr-ı keyfiyyet buyurulmuş idi.

Mütâlâ'a-i ma'rûza şûrâ-yı müşârun-ileyhâca muvâfık-ı usûl ve nizâm olmasına binâen cihet-i mezkûrenin Nimetullah Efendi'den ref'iyle Hâkî Efendi'ye tefvîzi hakkında Şûrâ-yı Evkâfca müttehaz karar fesh olunarak ahkâm-ı vakfnâme ile usûl ve nizâmına tevfiikan ıslâh-ı mu'âmele olunmak üzere işin el-yevm merci-i tedkiki olan Meclis-i Meşâyihe tevdi'ine karar verildiğini mübellîğ ve evrâk-ı mevcûde dosyasının gönderildiğini mübeyyin vârid olup havâle buyurulan 5 Receb sene 1337 târîhli ve 21 husûsi numaralı tezkire-i sâmiye üzerine ıslâh-ı mu'âmele sûreti tezekkür olunmakta iken vâkıfın halîfesinin halîfesi olduğundan ve mürîdânın müntahabı bulunduğundan bahisle cihetin uhdesine tevcihini Fetvâhâne-i âlîleri müsevvidîninden Ahîshalı Ali Haydar Efendi verdiği arzuhâlde taleb ve diğer arzuhâli ile de evrâkın Fetvâhâne-i âlî'ye havâlesini istid'â eylemesinden dolayı makâm-ı sâmi-i Fetvâ-penâhîlerinden bi'l-havâle Fetvâhâne-i Âlî'den yazılan muktezâda "Ber-müceb-i şart-ı vâkıf mûmâ-ileyhe mensûb olan mürîdân ile hulefâdan ekserîsi [0010] bizzât halîfeleri ile halîfelerinin halîfelerinden her hangisi tezvîrden sâlim olmak şartıyla intihâb ederlerse o kimsenin cihet-i meşîhate müstahık olacağı" gösterilmiş ve vakfiyede kendi halîfesine meşrût olan bir cihetin halîfe mevcûd iken hulefâ-yı hulefâya tevcihi câiz olup olmayacağı ayrıca bâ-müzekkire Fetvâhâne-i âlî'den lede'l-istiftâ yazılan cevâbda örf-i câriye nazaran hulefâ-yı hulefânın dahi ciheti talebe hakları olacağı beyân buyurulmuş olmasına binâen bu vechile cihetin tevcihi karâr-gîr olmuş ve tâliblerin evrâk-ı müsbitelerini kayıd ettirmeleri i'lân olunmuştur ki şu sûret-i mu'âmele irâde-i seniyye-i hazret-i Hilâfet-penâhî mazmûn-ı münîfine dahi tamamen muvâfık bulunmuştur.

Ma'a hâzâ mûmâ-ileyh Nimetullah Efendi on iki sene evvel intihâb-ı mürîdân ile ta'yîn olup uhdesinden cihet-i meşihatın merfû' olmadığını ve Hâkî Efendi bâ-berât mutasarrıfı olup vaktiyle bi'l-imtihân ve bil'l-intihâb ta'yîn olunduğunu ve vâkıfın silsile-i tarîkatine dâhil olduğuna dâir yedinde icâzetnâme mevcûd olduğunu ve beş seneden beri hüsni-î ifâ-yı hizmet etmekte olduğundan zi'l-yed ve keyfiyyet-i tevcihiyye kazıyye-i mahkeme hâlini kesb etmiş bulunduğundan uhdesinden cihetin ref'ine icâb-ı şer'î ve nizâmî olmadığını ve Sıddık Efendi ise bazen şifâhen dergâhın mülkiyetini iddi'â ve bazen vâkıfın bizzât oğlu olduğundan cihetin meşrûtün-lehi olduğunu ve vaktiyle isbât-ı ehliyet edip tevcih mazbatası yapıldığı hâlde hakkın-da gadr edildiğinden bu kere uhdesine tevcihiyle muhâfaza-i hukûkunu istid'â ve ısrâr etmekte olduklarının ve cereyân-ı mu'âmele sûret-i ma' rûzadan ibâret olup henüz bir netîce-i kat'iyeye iktirân etmemiş olduğu arz olunur ol bâbda.

Ahmed Remzi, Vahyî, Seyyid Mehmed es-Sükûtî, Tevfik

IST\_MFT\_MSH\_DFT02\_01741\_0001-0011

**Bursa'nın Alipaşa Mahallesi'nde, Çarşamba Dergâhı vakfiye suretinin Evkaf Nezâretinden istenmesi.**

Fî 22 Safer sene 1338 / Fî 16 Teşrîn-i sâni sene 1335 / - / - / - / - / 127 / Fî 23 S. sene 1338 [17 Kasım 1919] / Fî 17 Teşrîn-i sâni sene 1335

Müzekkire

Bursa'da Alipaşa Mahallesi'nde kâin tarîkat-i aliyye-i Halvetiyye'den Çarşamba Dergâh-ı şerîfi vakfiyesinin mütâla'asına lüzûm görüldüğünden bir kıta sûret-i musaddakasının irsâli hakkında Evkâf-ı Hümayûn Nezâret-i aliyyesine tezkire-i aliyye şeref-tastîr buyurulması bâbında.

Mustafa Hâkî, Mustafa, Mehmed Gülşen, Tevfik

IST\_MFT\_MSH\_DFT02\_01741\_0001-0012

**Çarşamba'da Lokmacı Sokağı'nda Refet Efendi Dergâhı diğer adıyla Sebzeane Kâtibi Mahmud Efendi Mescidi'nin vakfiyesiyle, imamet deruhte ve maaş miktarı kayıtlarının Evkaf Nezâretinden istenmesi.**

Fî 16 S. sene 1338 / Fî 10 Teşrîn-i sâni sene 1335 / - / - / - / - / Sîret / - / 126 / Fî 16 minhü [10 Kasım 1919] / Fî 10 minhü

Müzekkire

Çarşamba'da Lokmacı Sokağı'nda tarîkat-i aliyye-i Şa'bâniyye'den Re'fet Efendi Dergâhı nâm-ı diğer Sebzeane Kâtibi Mahmud Efendi Mescid-i şerîfinin vakfiyesiyle imâmet cihetinin der'uhde ve vazîfesi mikdârı kayıtlarının ihrâcî ile irsâli husûsunun bâ-tezkire-i aliyye Evkâf-ı Hümayûn Nezâreti Vekâlet-i aliyyesine iş'âr buyurulması bâbında.

Vahyî, Mustafa Hâkî, Seyyid Mehmed es-Sükûtî, Mustafa, Mehmed Gülşen, Tevfik

IST\_MFT\_MSH\_DFT02\_01741\_0001-0013

**Üsküdar'da Selimiye Dergâhı ikinci imamı Mehmed Efendi'nin vefatıyla; uhdesinde bulunan imamet ve fetihhanlık cihetlerine, Sivas'ta Üçüncü Kolordu Tedkik-i Hesâbât Komisyonunda görevli oğlu Selâhaddin Efendi'nin talip olup olmadığına Harbiye Nezâreti aracılığıyla sorulması.**

Fî 13 Safer sene 1338 / Fî 8 Teşrîn-i sâni sene 1335 / - / - / - / Sîret / - / 125 / Fî 14 Safer sene 1338 [8 Kasım 1919] / Fî 8 Teşrîn-i sâni sene 1335

Müzekkire

Üsküdar'da Selimiye Dergâh-ı şerîfi imâm-ı sâni sene Mehmed Efendi'nin vukû'-ı vefâtıyla uhdesinden inhilâl eden şehri iki yüz gurusu ma'âşlı mezkûr imâmet, yirmi gurusu ma'âşlı Fetihhân cihetlerine ol bâbdaki Tevcîh-i Cihât Nizâm-nâmesi'nin mevâdd-ı mahsûsası mûcebince terk-i hizmet ve me'mûriyetle bi'l-imtihân tâlib olup olmadığına müteveffâ-yı mûmâ-ileyhin ekber evlâdı olup Sivas'ta Üçüncü Kolordu Tedkik-i Hesâbât Komisyonu a'zâlığı kitâbetinde müstahdem Salahaddin Efendi'den bi'l-istifsâr alınacak cevâbın inbâsı husûsunun Harbiye Nezâret-i celîlesine iş'âr buyurulması tezekkür kılındı ol bâbda.

Vahyî, Mustafa Hâkî, Ahmed Remzi, Seyyid Mehmed es-Sükûtî, Mustafa, Mehmed Gülşen, Tefvik

IST\_MFT\_MSH\_DFT02\_01741\_0001-0014

**Hazret-i Merkez Dergâhı imam vekili olup Şeyh Salih Efendi Dergâhı'nda ailesiyle birlikte kalmakta olan Hafız Mehmed Efendi'nin dergâhtan tahliyesi.**

Fî 13 S. sene 1338 / Fî 8 Teşrîn-i sâni sene 1335 / - / - / - / Sîret / - / 124 / Fî 14 Safer sene 1338 [8 Kasım 1919] / Fî 8 Teşrîn-i sâni sene 1335

Müzekkire

Hazret-i Merkez Dergâh-ı şerîfi imâm vekili olup o civârda kâin tarikat-i aliyye-i Şa'bâniyye'den merhûm Şeyh Salih Efendi Dergâh-ı şerîfinde âilesiyle beraber ikâmet etmekte olan Hâfız Mehmed Efendi'nin ahşab hâne sofasının ortasına toprak koymak sûretiyle ocak ittihâz etmiş olduğu mahalde ateş yakmakta olduğundan bu cihetle dergâhı ve civârını büyük tehlikeye ma'rûz bırakmada ve esâsen dergâhın şeyhi efendinin âilesini dergâha nakl ettiği cihetle mûmâ-ileyhin orada ikâmeti pek fuzûlî bulunmakta idiği ihbâr olunmasına binaen icrâ kılınan tahkîkât neticesinde keyfiyyetin mukârin-i hakikat olduğu anlaşılmış olduğundan mûmâ-ileyhin biran evvel dergâhtan ihrâcıyla vukû'u kaviyyen melhûz olan harîk tehlikesinin ber-taraf edilmesi husûsunun Evkâf-ı Hümâyûn Nezâreti Vekâlet-i aliyyesine iş'âr buyurulması tezekkür kılındı ol bâbda.

Vahyî, Mustafa Hâkî, Mustafa, Ali, Mehmed Gülşen, Tefvik

IST\_MFT\_MSH\_DFT02\_01741\_0001-0015

**Yedikule'de Hacı Evhad Camii'nin yanması sebebiyle; caminin inşasının bitimine kadar Cuma ve bayram namazlarının Hacı Evhad Dergâhı'nda, caminin hatibi Hacı Ali Efendi tarafından kıldırılması.**

Fî 9 Safer sene 1338 / Fî 3 Teşrîn-i sâni sene 1335 / - / - / - / Sîret / - / 122 / Fî 11 minhü [5 Kasım 1919] / Fî 5 minhü

Müzekkire

Evkâf-ı Hümâyûn Nezâreti Vekâlet-i aliyyesinden vârid olup havâle buyurulan 1 Safer sene 1335 târihli ve 147 husûsî numaralı merbût tezkire-i cevâbiyye mütâlâ'a olundu.

Hülâsa-i meâli: Yedikule civârında Hacı Evhad Câmi'-i şerîfi muhterik olmasına binâen ba'de'l-inşâ salât-ı Cuma ve îdeyn yine câmi'-i mezkûrda edâ olunmak üzere zâviyesi derûnuna müceddeden minber vaz'ıyla muhterik câmi'in hatibi el-Hâc Hâfız Ali Efendi tarafından kemâkân ikâmet-i salât-ı Cuma ve îdeyn olunmasına lede'l-arz 2 Cumâdelûlâ sene 1334 târihinde irâde-i seniyye-i cenâb-ı Hilâfet-penâhî şeref-sudûr buyurulduğu kayden tebeyyün etmiş ise de Meclis-i Meşâyih'in 16 Ağustos sene 1335 târihli mazbatasında tevcihi tensib edilen cihâtta imâmet ve cihât-ı sâirenin zâviyye-i mezkûreye nakline dâir sarâhat-i kaydiyye olmamasına ve hıdemât-ı ma'rûzanın dergâh-ı mezkûr câmi'-i şerifinde ifâ olunacağı münderic bulunmasına nazaran olunacak mu'âmelenin muvazzahan beyânı husûsunun Meclis-i dâ'iyânemize tebliği lüzûmundan ibârettir.

Kayda lede'l-mürâca'a Yedikule civârında Hacı Evhadüddin Dergâhı Câmi'-i şerifindeki cihâtın tevcihi hakkında Meclis-i dâ'iyânemizden tanzim ve takdîm kılınmış olan sâlifü'l-arz mazbatada aynen münderic Kuyûd-ı Vakfiyye ve İstanbul Evkâf müdiriyyetlerinin derkenârlarında Hacı Evhad Câmi'-i şerifinin muhterik olmasına binâen cereyân eden mu'âmele ve mârru'l-beyân irâde-i seniyyenin şeref-sudûruna dâir bir kayıt olmamasına ve tekâyâ ve zevâyâ ile derûnlarında olan cihâtın esâs kayıtları Meclis-i Meşâyihde mevcûd bulunmamasına mebnî mu'âmele-i ma'rûza hakkında mazbataya bir şey derc olunmaması tabiî olup ancak câmi'-i mezkûra dâir mu'âmele-i vâkı'ya bu kere mezkûr tezkire münderecâtından ıttılâ' hâsıl olmuştur.

Binâen-aleyh Hacı Evhad Dergâh-ı şerîfi dâhilinde bulunan ve muhterik olması hasebiyle salât-ı Cuma ve îdeyn ikâmesi için dergâh derûnunda müceddeden minber vaz' olunan mahalde cihât-ı sâire vezâifinin dahi tamamen ifâsı muktezî olmağla beraber bu husûs ârizî bir ma'zeretten ileri geldiğinden cihât-ı mezkûrenin "mâ vudi'a-lehinden fekkini icâb etmeyeceğine ve bi-mennihî te'âlâ Câmi'-i şerifin yeniden inşâsından sonra cihât-ı mezkûre vezâifinin câmi'de ifâ olunması zarûrî bulunduğuna binâen hıdemât şimdilik minber vaz' olunan mahalde ifâ olunmak üzere tevcih mu'âmesinin mazbatada gösterildiği vechile icrâsıyla berât-ı âlî i'tâsı tensib edilmekle rehîn-i tasvîb-i sâmi-i cenâb-ı Meşihat-penâhîleri buyurulduğu takdîrde icrâ-yı icâbı husûsunun müzekkirenin leffîyle cevâben nezâret-i müşârûn-ileyhâya iş'âr buyurulması bâbında.

Vahyî, Mustafa, Ali, Mehmed Gülşen, Tefvik

IST\_MFT\_MSH\_DFT02\_01741\_0001-0016

**Üsküdar'da Selmanağa Mahallesi'nde Şeyh Camii Dergâhı diğer adıyla Vâlide Sultan Kethüdâsı Arslan Ağa Camii'nin Mehmed Tâlib Efendi'nin vefatıyla boşalan imamet, meşihat ve hitabet cihetlerine tayin edilen Hüseyin Haydar Efendi'ye, camide bulunan Devâtîzâde Mustafa Efendi Zaviyesi'nin zaviyedarlık görevinin de tevcihi.**

Fî 9 Safer sene 1338 / Fî 3 Teşrîn-i sâni sene 1335 / - / - / - / Sîret / - / 121 / Fî 11 Safer sene 1338 [5 Kasım 1919] / Fî 5 Teşrîn-i sâni sene 1335

Müzekkire

Müteveffâ Seyyid Mehmed Tâlib Efendi uhdesinden inhilâl eden Hazret-i Hüdâî -kuddise sırruhu'l-âlî- evkâfı mülhakâtından Üsküdar'da Selmanağa Mahallesi'nde Şeyh Câmî'i Dergâhı denilmekle arîf Vâlide Sultân Kethüdâsı merhûm Arslan Ağa Câmî-i şerîfinin hitâbet ve imâmet ve meşihat ve câmî-i şerîf-i mezkûrda Devâtîzâde eş-Şeyh Mustafa Efendi Zâviyesinin zâviyedârlık cihetlerinden sâlifü'z-zikr zâviyedârlık cihetinden mâ'adâ cihâtın Hüseyin Haydar Efendi'ye tevcihi tasvîb-i sâmi-i cenâb-ı Meşihat-penâhîlerine iktirân eden Meclis-i dâ'iyânemizin 29 Eylül sene 1338 târihli ve 25 [numaralı] mazbatasında muharrer olup ânîfü'l-arz zâviyedârlığın tevcih ve adem-i tevcihi hakkında sarâhat mevcûd olmadığından cihet-i ma'rûzanın da tevcihi icrâ olunup olunmadığının istifsârına dâir Evkâf-ı Hümâyûn Nezâreti Vekâlet-i aliyyesinden vârid olup havâle buyurulan 1 Safer sene 1338 târihli ve 146 husûsî numaralı merbût tezkire kırâet olundu. Sûret-i iş'âra ve mezkûr mazbata kaydına nazaran arz olunan zâviyedârlık cihetinin henüz tevcih olunmadığı anlaşıldığına ve mûmâ-ileyh Şeyh Haydar Efendi dâ'îlerinin cihet-i mezkûreye ehil ve müstahik bulunduğuna binâen sâlifü'l-arz zâviyedârlığın dahi mûmâ-ileyhin uhdesine tevcihi tensîb edilmekle rehîn-i tasvîb-i sâmi-i cenâb-ı Fervâ-penâhîleri buyurulduğu takdîrde mazbata-i mütekaddime-i ma'rûzaya zeylen mu'âmele-i lâzimesi icrâ olunmak üzere müzekkirenin leffîyle nezâret-i müşârun-ileyhâya tezkire-i aliyye-i cevâbiyye şeref-tastîr buyurulması bâbında.

Vahyî, Mustafa Hâkî, Mustafa, Ali, Mehmed Gülşen, Tevfik

IST\_MFT\_MSH\_DFT02\_01741\_0001-0017

**Tekke taâmiyelerine pahalılık zammı yapılması ve ekmek bedeli verilmesi.**

Fî 9 S. sene 1338 / Fî 3 Teşrîn-i sâni sene 1335 / - / - / - / Sîret / - / 120 / Fî 11 S. sene 1338 [5 Kasım 1919] / Fî 5 Teşrîn-i sâni sene 1335

Müzekkire

Tekâyâ taâmiyeleri için bahalılık zammı ve ekmek bedeli verilmek üzere Hazîne-i Mâliyece tahsisât i'tâsî lüzûmunun Bâbiâlî cânib-i sâmisine arz edildiğine dâir bi'l-muhâbere Evkâf-ı Hümâyûn Nezâret-i celîlesinden takdîm olunup havâle buyurulan 1 Teşrîn-i sâni sene 1335 târihli tezkire-i cevâbiyye mütâlâ'a kılındı. Tekâyâ meşâyih ve sükkânının zâten ekâl olan ve bir gûne zam ve tezyîd görmeyen tahsisât-ı hâzıralarıyla emr-i idâre ve ta'ayyüşte dûçar olageldikleri müşkilât fevka'l-âde arz ve beyândan âzâde edildiğinden mûmâ-ileyhimin tehvîn-i ihtiyâcları esbâbının istikmâlî lüzûmundan ve tezkire-i mezkûre mündericâtından bahsile bu bâbda taraf-ı âlî-i hazret-i Meşihat-penâhîlerinden de Bâbiâlî cânib-i sâmisine tezkire-i aliyye şeref-tastîri husûsuna müsâade-i celîle-i Fetvâ-penâhîleri şâyeste buyurulmak bâbında.

Vahyî, Mustafa, Ali, Mehmed Gülşen, Tevfik

IST\_MFT\_MSH\_DFT02\_01741\_0001-0018

**İstanbul'da tekkeleri yanmış olan şeyhlerin aynı ve nakdî tahsisatlarının, eskiden olduğu gibi kesilmeden tam olarak verilmesinin Evkaf Nezâretine bildirilmesi.**

Fî 5 S. sene 1338 / Fî 30 Teşrîn-i evvel sene 1335 / - / - / - / Sîret / - / 119 / Fî 9 S. sene 1338 [3 Kasım 1919] / Fî 3 Teşrîn-i sâni sene 1335

Müzekkire

İstanbul ve Bilâd-ı selâsede muhterik tekâyâ ve zevâyâ ve sâir mebânî-i hayriyye muhassasât-ı ayniyye ve nakdiyyesi Evkâf-ı Hümâyûn Nezâretince şimdiye kadar tamamen tesviye ve i'tâ olunmakta iken bu kere muhassasât-ı ayniyyenin nısfı verilip tamamen verilmesi ancak vazîfesini başka bir mahalde ifâ etmekte olan meşâyih mahsûs bulunduğundan bahisle İstanbul Evkâf İdâresince ol vechile ifâ-yı vazîfe edip etmediklerini mübeyyin ilmühaber taleb olunduğu bazı meşâyih tarafından Meclis-i dâ'iyânemize vukû' bulan mürâca'attan anlaşılmıştır.

Ma'lûm-ı hakâyık-melzûm-ı cenâb-ı Meşihat-penâhileri buyurulduğu üzere muhterik tekâyâ ve zevâyâ meşâyih ve âilelerinin ekseri diğer bazı tekâyâ hüçûrâtında ve medreselerde barınmakta oldukları cihetle erkân-ı turuk-ı aliyeyi tamamen ve müctemi'an ifâları mümkün olmadığı ve bu ise kendi sun' ve ihtiyârlarıyla terk-i vazîfe demek olmayıp ma'âzallâh dūçâr oldukları âfet neticesi bir ma'zeret-i meşrû'a idiği nazar-ı dikkate alınarak ol bâbdaki karar mücebince muhterik mebânî-i hayriyyenin mu'ayyenât ve muhassasâtı verilegelmektedir. Fî'l-hakîka dergâhı muhterik olan meşâyihden bazıları müsâ'id mahal bulup oraya yerleşmiş ve sâkin olduğu mahalde usûl-i tarikatini ifâ etmekte olanları dahi var ise de bu husûsun umûmuna teşmîline imkân gayr-i müsâ'id olduğundan esâsen felâket-zede bulunan bu misillü meşâyihin bir de muhassasâtı kesilmek sûretiyle bir kat daha zarûrete dūçâr edilmeleri muvâfık-ı nasafet olamayacağı vâreste-i arz-ı îzâh bir hakikat olduğundan mûmâ-ileyhimin mu'ayyenât-ı ayniyye ve nakdiyyelerinin kemâ-kân tamamen tesviye ve i'tâsına devam olunması husûsunun sûret-i ekidede nezâret-i müşârun-ileyhâya bâ-tezkire-i aliyeye iş'âr buyurulması bâbında.

Vahyî, Mustafa Hâkî, Seyyid Mehmed es-Sükûtî, Mustafa, Mehmed Gülşen, Tefvik

IST\_MFT\_MSH\_DFT02\_01741\_0001-0019

**Eyüp'te Kaşgarî Abdullah Efendi diğer adıyla Murtaza Efendi Dergâhı muhassasatının, dergâhın postnişini Abdülhakim Efendi'nin mührüyle verilmesi.**

Fî 7 S. sene 1338 / Fî 1 Teşrîn-i sâni sene 1335 / Hüsam / - / - / - / [Mühür] Es-Seyyid Abdülhakim bin Mustafa el-Arvâsî / 118 / Fî 7 S. sene 1338 [1 Kasım 1919] / Fî 1 Teşrîn-i sâni sene 1335

Müzekkire

Evkâf-ı Hümâyûn Levâzımât Müdiriyyet-i behiyyesine

İstanbul Evkâf Müdiriyyet-i behiyyesine

Pertevniyal Vâlide Sultân Vakfı Mütevellîsi Kâimmakamlığına

Bahriye Nezâret-i celîlesine

Eyüpsultân civârında kâin Kaşgarî Abdullah Efendi Hazretleri nâm-ı diğer Murtaza Efendi Dergâh-ı şerîfi mu'ayyenât ve muhassasâtının ba'demâ dergâh-ı mezkûr postnişini Şeyh Abdülhakim Efendi nâmına ve bâlâyâ matbû' mühür ile i'tâsı hakkında işbu müzekkire takdîm kılındı.

Sîret, Tefvik

IST\_MFT\_MSH\_DFT02\_01741\_0001-0020

**Yavuzsultanselim'de Cebecibaşı Mahallesi'nde Şeyh İsmet Efendi Dergâhı postnişinliğine talip olanların, belirlenen günde Meclis-i Meşâyihe başvurması gerektiğinin gazetelerde ilanı.**

Fî 7 S. sene 1338 / Fî 1 Teşrîn-i sâni sene 1335 / - / - / - / Sîret / - / 117 / Fî 7 S. sene 1338 [1 Kasım 1919] / Fî 1 Teşrîn-i sâni sene 1335

İ'lân

Der'aliyye'de Sultânselim civârında Cebecibaşı Mahallesi'nde kâin tarîkat-i aliyye-i Nakşibendiyye-i Hâlidîyye'den merhûm Şeyh İsmet Efendi Dergâh-ı şerîfinin postnişinlik ciheti hakkında Fetvâhâne-i âlî'den yazılan derkenârda ber-mûceb-i şart-ı vâkîf mûmâ-ileyhe mensûb olan müridân ile hulefâdan ekserisi bizzât halîfeleri ile halîfelerinin halîfelerinden her hangisi tezvîrden sâlim olmak şartıyla intihâb ederlerse o kimsenin cihet-i meşîhate müstahîk olacağı gösterilmiş ve binâen-aleyh cihet-i mezkûrenin bu vech ile tevcîhi takarrur etmiş olduğundan evvel emirde ber-vech-i muharrer cihet-i mezkûreye tâlib olan zevâtın şehir-i Teşrîn-i sâninin on beşinci Cumartesi gününe kadar tezâkir-i Osmâniyye ve icâzetnâmelerini ve vesâik-i sâireyi müstahiben behemehâl Meclis-i Meşâyihe mürâca'at eylemeleri lüzûmu beyân olunur.

Tevfik

IST\_MFT\_MSH\_DFT02\_01741\_0001-0021

**Çarşamba'da İsmet Efendi Dergâhı meşîhati hakkındaki ilan metninin *Takvîm-i Vekâyi'*, Sabah ve İkdâm gazetelerinde ilanı.**

Fî 4 S. sene 1338 / Fî 29 Teşrîn-i evvel sene 1335 / - / - / - / Sîret / - / 115 - 116 / Fî 4 Safer sene 1338 [29 Ekim 1919] / Fî 29 Teşrîn-i evvel sene 1335

Matbû'ât Müdîriyyet-i aliyyesine

Çarşamba'da İsmet Efendi Dergâh-ı şerîfi meşîhat ciheti hakkında leffen takdîm kılınan varakanın *Takvîm-i Vekâyi'*'a dercine müsâ'ade buyurulması temennî olunur efendim.

116

Me'mûrîn Müdîriyyet-i aliyyesine

Çarşamba'da İsmet Efendi Dergâhı meşîhati hakkında yazılan merbût iki kıt'a i'lân varakasının İkdâm ve Sabah gazeteleriyle i'lân ettirilmesi zımında işbu müzekkire takdîm kılındı.

Tevfik

IST\_MFT\_MSH\_DFT02\_01741\_0001-0022

**Eyüp Babahaydar Mahallesi'ndeki Şeyhülislam Feyzullah Efendi Dergâhı postnişinliğinden azledilen Râsih Efendi'nin yerine Mehmed Fevzi Efendi vekil tayin edildiğinden, dergâhın harem dairesinde kalanların tahliye edilmesi.**

Fî 26 M. sene 1338 / Fî 22 Teşrîn-i evvel sene 1335 / - / - / - / Sîret / - / 114 / Fî 29 minhü [24 Ekim 1919] / Fî 25 minhü

Müzekkire



Eyüpsultân civârında Babahaydar Mahallesi'nde kâin Şeyhülislâm Feyzullah Efendi Dergâh-ı şerîfî postnişini Râsih Efendi'nin dergâhta vukû'a getirilen ef'âl-i gayr-i merziyyenin men'ine muktedir olamamak sûretiyle vazîfe-i meşîhati hüsn-i îfâda görülen aczine mebnî tasvîb-i sâmi-i cenâb-ı Meşîhat-penâhilerine iktirân eden karâr-ı dâ'iyânemize binâen vazîfe-i meşîhati îfâ için vekîl ta'yîn olunan Mehmed Fevzî Efendi'nin dergâhta ikâmeti bi't-tensîb iki kısımdan ibâret bulunan dergâh-ı mezkûr harem dâiresinin şimdiki sükkânından tamamen tahliyesiyle büyük kısmının vâlidesiyle ikâmet etmek üzere Şeyh Râsih Efendi'ye ve küçük kısmın da ma'a âile ikâmet etmek üzere vekîl-i mûmâ-ileyhe teslîmi husûsunun Evkâf-ı Hümâyûn Nezâret-i aliyesine iş'âr buyurulması fî 24 Eylül sene 1335 târih ve 107 numaralı müzekkire-i dâ'iyânemizle arz olunduğu kayden anlaşılmış ve icâbı icrâ buyurulmuş idi. Cânib-i Evkâf'tan i'zâm olunmuş olan me'mûra şeyh-i mûmâ-ileyh tarafından henüz derdest-i mu'amele-i arzuhâlim vardır deyu hânenin tahliyesini netice-i mu'ameleye ta'lîk ettirdiği ve el-yevm hiçbir mu'amele kalmadığı hâlde hâneyi tahliyeden musırrian imtinâ' etmekte bulunduğu tahkîkât-ı vâkî'adan anlaşılmışla arz-ı sâbık vechile dâire-i mezkûrenin tahliyesi hakkında mu'amele-i serî'a ve kat'îyye icrâsıyla neticesinin inbâsı husûsunun te'kîden nezâret-i müşârun-ileyhâya iş'âr buyurulması tezekkür kılındı ol bâbda.

Vahyî, Ahmed Remzi, Mustafa Hâkî, Seyyid Mehmed es-Sükûtî, Mustafa, Tevfik

IST\_MFT\_MSH\_DFT02\_01741\_0001-0023

**Meclis-i Meşâyih müfettişi Şeyh Fahreddin Efendi'nin Maliyeden aldığı tazminatı iade etmesi.**

Fî 25 M. sene 1338 / Fî 21 Teşrîn-i evvel sene 1335 / - / - / - / Sîret / - / 113 / Fî 26 Muharrem sene 1338 [21 Ekim 1919] / Fî 22 Teşrîn-i evvel sene 1335

Müzekkire

Meclis-i dâ'iyânemiz müfettişliğinde müstahdem Şeyh Fahreddin Efendi dâ'ileri Mâliye Nezâret-i celîlesinden almış olduğu tazmînâtı i'ade edeceğinden mu'amele-i lâzimenin icrâsını îfâde ve istirhâm ettiğinden keyfiyyetin bâ-tezkire-i aliyye nezâret-i müşârun-ileyhâya iş'âr buyurulması menût-ı re'y-i sâmi-i cenâb-ı Meşîhat-penâhileridir ol bâbda.

Vahyî, Ahmed Remzi, Mustafa Hâkî, Tevfik

IST\_MFT\_MSH\_DFT02\_01741\_0001-0023-M

**Eyüp'te Kaşgarî Abdullah Efendi diğer adıyla Murtaza Dergâhı meşîhat, hitabet ve imametine Şeyh Abdülhakim Efendi tayin edildiği için, müteveffa Şeyh Bahaeddin Efendi'nin validesinden başka kalanların dergâhtan tahliyeleri.**

Fî 26 M. sene 1338 / Fî 22 Teşrîn-i evvel sene 1335 / - / - / - / Sîret / - / 112 / Fî 26 Muharrem sene 1338 [21 Ekim 1919] / Fî 22 Teşrîn-i evvel sene 1335

Müzekkire

Eyüpsultân civârında Kaşgarî Abdullah Efendi nâm-ı diğer Murtaza Efendi Dergâh-ı şerîfî imâmet ve hitâbet [ve] meşîhat cihetleri Şeyh Abdülhakim Efendi uhdesine bâ-berât-ı âlî tevcih buyurulduğundan mezkûr dergâhın harem dâiresinde şeyh-i müteveffa Bahaeddin Efendi'nin vâlidesinden mâ'adâ fuzûlî sâkin olanların ihrâcıyla dâire-i mezkûrenin mûmâ-ileyh Şeyh



Abdülhakim Efendi'ye teslîmi hakkında mu'âmele-i kat'îyye ve serî'anın icrâsı husûsunun Evkâf-ı Hümâyûn Nezâret-i aliyyesine iş'âr buyurulması tezekkür kılındı ol bâbda.

Vahyî, Ahmed Remzi, Seyyid Mehmed es-Sükûtî, Mustafa, Tevfik

Abdülhakim Efendi'nin târih-i ta'yîninin sarâhaten beyânı Evkâf Nezâreti Levâzım Müdiriyyetinden istifsâr fî 10 Teşrîn-i sâni sene 1335 mûmâ-ileyh Şeyh Abdülhakim Efendi dergâh-ı mezkûr meşihatine fî 15 Şevval sene 1337 târihinde ta'yîn olunduğunun beyânıyla i'âdeten takdîm kılındı.

Fî 10 Teşrîn-i sâni sene 1335

IST\_MFT\_MSH\_DFT02\_01741\_0001-0024

**Edirne'de Şeyh Muslihiddin Dergâhı şeyhi İhsan Efendi'nin vefat eden nâibi Şeyh Hâlid Efendi'nin yerine, Debbağhane'de Şeyh Hamid Efendi Zaviyesi şeyhi Hüseyin Efendi'nin tayini.**

Fî 22 M. sene 1338 / Fî 20 Teşrîn-i evvel sene 1335 / - / - / 393 / Sîret / - / 111 / Fî 22 Muharrem sene 1338 [17 Ekim 1919] / Fî 20 Teşrîn-i evvel sene 1335

Müzekkire

Edirne'de kâin Şeyh Muslihiddin Dergâh-ı şerîfi şeyhi sagîr İhsan Efendi'nin nâibi Şeyh Hâlid Efendi'nin vukû'-ı vefâtıyla inhilâl eden niyâbet-i mezkûreye Debbağhâne'de Şeyh Hamid Efendi Zâviyesi şeyhi Hüseyin Efendi'nin ta'yîni tensib edildiğine dâir Edirne Encümen-i Meşâyihinden tanzîm olunup Meclis-i dâ'iyânemiz riyâsetine mürsel 12 Mart sene 1335 târihli ve 17 numaralı merbût mazbata mündericâtı usûlüne ve nizâmnâme ahkâmına muvâfık görümlere tasdik olunmağla rehîn-i tasvîb-i sâmi-i cenâb-ı Meşihat-penâhîleri buyurulduğu takdîrde mu'âmele-i mukteziyyenin ifâsı zımnında işbu müzekkire ve merbûtu mazbatanın leffîyle Evkâf-ı Hümâyûn Nezâreti Vekâlet-i aliyyesine tezkire-i aliyye tastîr buyurulması tezekkür kılındı ol bâbda.

Vahyî, Ahmed Remzi, Mustafa Hâkî, Seyyid Mehmed es-Sükûtî, Mustafa, Tevfik

IST\_MFT\_MSH\_DFT02\_01741\_0001-0025

**Eyüp'te Mihrişah Vâlide Sultan Türbesi hatm-i hâce okuyucularından vefat eden Rıza Efendi'ye ait resmî bir evraka rastlanamadığı, ancak yirmi beş sene bu görevi ifa ettiğinin anlaşılması; türbenin cüzhanı Talat ve aşirhanı Mehmed efendiler vefat ettiğinden, bu görevlere ait deruhte ve maaş miktarlarının Evkaf Nezâretinden istenmesi.**

Fî 19 M. sene 1338 / Fî 15 Teşrîn-i evvel sene 1335 / - / - / 326 - 355 / Sîret / - / 110 / Fî 19 Muharrem sene 1338 [14 Ekim 1919] / Fî 15 Teşrîn-i evvel sene 1335

Müzekkire

Eyüpsultân civârında kâin Mihrişah Vâlide Sultân türbe-i şerîfesinde kârî-i hatm-i hâcegân cihâtı ashâbından müteveffâ Rıza Efendi'nin uhdesine müvecceh cihet kaydına destres olunmadığından cihet-i mezkûreye mûmâ-ileyhin tasarrufunu müeyyed vesîka-i resmîyye sûretinin irsâli hakkında Evkâf-ı Hümâyûn Nezâret-i aliyyesinden vârid olup havâle buyurulan fî 7 Zilhicce sene 1338 ve fî 3 Eylül sene 1335 târihli ve 114 husûsî numaralı merbût tezkire kırâet olundu.

Müteveffâ-yı mûmâ-ileyhin cihet-i mezkûreye tasarrufuna dâir vesîka-i resmiyye mevcûd olmayıp ancak takríben yirmi beş seneden beri türbe-i müşârun-ileyhâda hatm-i şerîf vazîfesini îfâ ettiği ma'lûm bulunduğu yazılan müzekkireye zeylen hatm-i şerîf şeyhi ve Şeyh Murad Dergâhî postnişîni efendi tarafından alınan cevâbdan ve türbe-i mezkûrede hatm-i hâcegân vezâîfi miyânında Rıza Efendi nâmına şehri elli yedi gurus yirmi para vazîfe muhassas olup mûmâ-ileyhin vukû'-ı vefâtına binâen vazîfe-i mezkûrenin 1 Mart sene 1334 târihinden beri mevkûf bulunduğu ve mezkûr vazîfe ise idârenin târih-i teşekkülü olan 1 Mart sene 1327 târihinden i'tibâren top koçan miyânında tesviye edilmekte olduğu İstanbul Evkâf Müdiriyyeti'nin tezkire-i cevâbiyyesinden anlaşılmış olmağla müteveffâ-yı mûmâ-ileyhden inhilâl eden hatm cihetiyle türbe-i müşârun-ileyhâda cüzhânlık ciheti mutasarrıfı Talat ve ba'de'l-hatm aşirhân ciheti mutasarrıfı Mehmed efendilerin bu kere bilâ-veled-i zükûr vukû'-ı vefâtlarına binâen inhilâl eden mezkûr cihetlerin der'uhde ve vazîfeleri mikdârı kayıtlarının serî'an ihrâc ve irsâli husûslarının cevâben nezâret-i müşârun-ileyhâya iş'âr buyurulması tezekkür kılındı ol bâbda.

Ahmed Remzi, Mustafa Hâkî, Seyyid Mehmed es-Sükûtî, Mustafa, Mehmed Gülşen,  
Tevfik

IST\_MFT\_MSH\_DFT02\_01741\_0001-0025-M

**Tophane'de Kâdirî Dergâhı ve diğer bazı dergâhlara, Meclis-i Meşâyihe bilgi verilmeden esir yerleştirilmemesi.**

Fî 17 M. sene 1338 / Fî 13 Teşrîn-i evvel sene 1335 / - / - / - / Sîret / - / 109 / Fî 17 minhü [12 Ekim 1919] / Fî 13 minhü

Müzekkire

Tophâne'de kâin Kâdirîhâne Dergâh-ı şerîfine mahallî polis komiseri gelerek üserâ iskân olunacağından bahisle selamlık dâiresini ve Câmî'-i şerîfi gezdiğini dergâh-ı mezkûr postnişîni Abdüşşekûr Efendi Meclis-i dâ'iyânemize mürâca'atla ifâde ve beyân etmiş vesâir tekâyâyâ dahi mürâca'at vukû' bulduğu mesmû' olmuştur. Müstağnî-i arz ve îzâh olduğu üzere dergâhların kâffe-i mu'âmelâtı Meclis-i Meşâyihi Nizâmnâmesi ahkâmınca Meclis-i dâ'iyânemize müfevvez olduğuna ve esâsen dergâhların o misilli işgâle müsâ'id olmadığına binâen makâm-ı sâmi-i cenâb-ı Fetvâ-penâhilerinden istifsâr olunmaksızın me'mûrîn-i zâbitanın hod be-hod bu misilli mu'âmeleye tasaddî etmemeleri hakkında lâzım gelenlere ve bi'l-hâssa Beyoğlu zâbitasına teblîgât-ı serî'a ve müessire icrâsı husûsunun Dâhiliyye Nezâret-i celîlesine iş'âr buyurulması tezekkür kılındı ol bâbda.

Ahmed Remzi, Mustafa Hâkî, Seyyid Mehmed es-Sükûtî, Mustafa, Tevfik

IST\_MFT\_MSH\_DFT02\_01741\_0001-0026

**Meclis-i Meşâyihi Nizamnamesi'nin yeniden kaleme alınan dokuzuncu maddesi üzerinde yapılan değişikliklerin, Şûrâ-yı Devlet Heyeti tarafından uygun görülmesi.**

Fî 15 M. sene 1338 / Fî 11 Teşrîn-i evvel sene 1335 / - / - / - / Sîret / - / 108 / Fî 15 minhü [10 Ekim 1919] / Fî 11 minhü

Müzekkire

Meclis-i Meşâyihi Nizâmnâmesi'nin dokuzuncu maddesini ta'dilen Meclis-i dâ'iyânemizce

kaleme alınıp bâ-tezkire-i aliyye irsâl buyurulan madde-i nizâmiyye ve esbâb-ı mûcibe lâyihası hakkında icrâ kılınan ta'dîlâtı mutazammın Şûrâ-yı Devlet Hey'et-i Umûmiyyesinden tanzîm ve i'tâ olunup Meclis-i Vükelâda kırâet olunan mazbata ve melfûfu madde-i nizâmiyye lâyihasının irsâli bu bâbdaki mütâlâ'a-i sâmiye-i Meşihat-penâhîlerinin istifsârını hâvî cevâben vârid olup havâle buyurulan 13 Nisan sene 1335 târihli ve 26 husûsi numaralı tezkire-i sâmiye ve melfûfâtı lede'l-mütâlâ'a madde-i mu'addile-i ma'rûza muvâfık-ı hâl ve maslahat görülmüş olmağla ol vec-hile icrâ-yı icâbı husûsunun cevâben iş'âr ve melfûfât-ı mezkûrenin i'ade ve tesyâr buyurulması menût-ı re'y-i rezîn-i isâbet-karîn-i cenâb-ı Meşihat-penâhîleridir ol bâbda.

Ahmed Remzi, Mustafa Hâkî, Seyyid Mehmed es-Sükûtî, Mustafa, Ali, Mehmed Gülşen,  
Tevfik

IST\_MFT\_MSH\_DFT02\_01741\_0001-0027

**Eyüp'te Babahaydar Mahallesi'nde Şeyhülislam Feyzullah Efendi Dergâhı postnişinliğinden azledilen Râsih Efendi'nin yerine, Mehmed Fevzî Efendi vekil tayin edildiğinden dergâhla alakası olmayanların dergâhtan tahliyeleri.**

Fî 27 Z. sene 1337 / Fî 23 Eylûl sene 1335 / - / - / - / Sîret / - / 107 / Fî 28 Z. sene 1337 [24 Eylûl 1919] / Fî 24 Eylûl sene 1335

(Mûcebince fî 29 Zilhicce sene 1337 işâret-i aliyyesiyle tevşîh buyurulan târih)

Müzekkire

Eyüpsultân civârında Babahaydar Mahallesi'nde kâin Şeyhülislâm Feyzullah Efendi Dergâh-ı şerîfinin harem dâiresinden bir kısmının kirâya verildiğinden ve hemşiresinin velîme cem'iyeti münâsebetiyle dergâh-ı şerîfde bazı ef'âl-i nâ-becânın vukû'unu men' etmediğinden vazîfesini bi-hakkın ifâdan aczi tebeyyün eden mezkûr dergâh postnişîni Şeyh Râsih Efendi'nin dergâhın pek cüz'î olan muhassasâtını tamamen almak ve yalnız vâlidesiyle harem dâiresinin büyük kısmında ikâmet etmek üzere vazîfe-i meşihatın intihâb ve arz olunacak bir vekil ma'rifetiyle idâre ve ifâ ettirilmesi ve şimdiki sükkânından tamamen tahliye ettirilecek olan harem dâiresinin bir kısmını dahi ma'âile vekîlin ikâmet eylemesi tensîb olduğuna dâir tanzîm ve takdîm kılınan fî 14 Zilhicce sene 1337 ve fî 10 Eylûl sene 1335 târihli ve yüz iki numaralı müzekkire tasvîb-i sâmi-i cenâb-ı Meşihat-penâhîlerine iktirân etmişidi.

Bir müddetten beri civâr-ı Hazret-i Hâlid'de mevâ'iz-i dîniyye ifâ ederek hüsn-i hâl ve zühd-i takvâsı o havâlîce tanınmış olan tarîkat-i aliyye-i Nakşebendiyye hulefâsından ve müderrisîn-i kirâmdan Gürcü Mehmed Fevzî Efendi dâ'îlerinin dergâh-ı mezkûr meşihatine asâleten ta'yîni Babahaydar Mahallesi hey'et-i ihtiyâriyyesiyle ahâlî-i mu'teberesi tarafından tanzîm ve Meclis-i dâ'iyânemiz riyâsetine tevdi' olunan mazbatada taleb bulunduğu gibi kendisi dahi muhavvel arzuhâlinde cihet-i mezkûrenin asâleten uhdesine tevcihîni istid'â etmiş ise de şeyh-i mûmâ-ileyhten cihet-i meşihat ref' olunmadığından ancak dergâhın harem dâiresinin küçük kısmında sâkin olmak ve üç kıt'a bahçesinin orta bahçe denilen kıt'asını zer' ile mahsûlünden istifâde ve vazîfe-i meşihati hüsn-i ifâ etmek üzere fahrî olarak şeyh vekâletinin kabûlü mûmâ-ileyh Fevzî Efendi'ye ledet-teklîf ol vechile vekâlet-i mezkûreyi kabûl etmiş olmağla sûret-i ma'rûza rehîn-i tasvîb-i sâmi-i cenâb-ı Meşihat-penâhîleri buyurulduğu takdîrde dergâhın harem dâiresinin şeyh ve vâlidesinden mâ'adâ şimdiki sükkânından tahliyesiyle küçük kısmının vekil-i mûmâ-ileyhe

teslîmi ve mu'âmele-i kaydiyyenin îfâsı husûslarının merbûtan takdîm olunan tezkireye cevâben Evkâf-ı Hümâyûn Nezâret-i celîlesine iş'âr buyurulması bâbında.

Mustafa Hâkî, Seyyid Mehmed es-Sükûtî, Mustafa, Mehmed Gülşen, Tevfik

IST\_MFT\_MSH\_DFT02\_01741\_0001-0028

**Üsküdar'da Atık Vâlîde Dergâhı meşihatının deruhte kaydıyla kürsü şeyhliği cihetine ait kaydın Evkaf Nezâretinden istenmesi.**

Fî 24 Z. sene 1337 / Fî 20 Eylül sene 1335 / Hüsâm / - / - / Sîret / - / 106 / Fî 24 Z. sene 1337 [20 Eylül 1919] / Fî 20 Eylül sene 1335

Müzekkire

Üsküdar'da kâin Vâlîde-i Atık Dergâh-ı şerîfinin meşihat ciheti müteveffâ Şeyh Mahmud Efendi'den mahlûl olmasına binâen meşihat-i mezkûrenin der'uhdesi kaydıyla ve ayrıca meşihate meşrût olduğu istihbâr kılınan kürsî şeyhliği cihetinin bi't-tedkîk iş'ârı zımında işbu müzekkirenin mazrûfen Evkâf-ı Hümâyûn Nezâret-i alîyesine tesyâr buyurulması bâbında.

Vahyî, Mustafa Hâkî, Seyyid Mehmed es-Sükûtî, Mustafa, Tevfik

IST\_MFT\_MSH\_DFT02\_01741\_0001-0029-30

**Evkaf memur ve hademelerine verilecek olan pahalılık zammı ve ekmek bedelinin, tekkelerdeki şeyh ve dervişlere de verilmesinin Evkaf Nezâretine bildirilmesi.**

Fî 17 Zilhicce sene 1337 / Fî 13 Eylül sene 1335 / - / - / - / - / - / 105 / Fî 19 minhü [15 Eylül 1919] / Fî 15 minhü

Müzekkire

Me'mûrîn ve sâire ma'âşâtı misilli vazîfe ve ta'âmiyyelerine zamâim icrâsı hakkında Dersââdet ve civârı tekâyâ-yı şerîfesi meşâyihî tarafından vâki' olan istid'â ve bu bâbda Evkâf-ı Hümâyûn Nezâret-i celîlesiyle cereyân eden muhâbere üzerine sebk eden iş'âr-ı âlî-i Meşihat-penâhîlerine cevâben şeref-vârid olan 9 Haziran sene 1335 târihli tezkire-i sâmiyede üç yüz yirmi altı senesinden i'tibâren bi'l-umûm tahsîsât-ı hayriyye Evkâf-ı Hümâyûn Hazînesine devr edilerek bunlardan yalnız kurâ-yı mevkûfe a'sârı tevliyet bedelâtına lâzım gelen zamâim ve tenzîlât icrâ edilip üst tarafı tasarrufâta ve yeniden zuhûr edecek masârıfına Hazîne-i celîlece müdâhale edilmemek şartıyla sûret-i maktû'ada Hazîne-i Evkâfa tesviye edilmekte olduğuna ve bahalılık zammı kararnâmesinin evkâf memûrîn ve hademesine tatbîki için nezâret-i müşârun-ileyhâca ayrı bir kararnâme istihsâl edildiğine binâen bu kararnâmeyi bütçenin müsâ'adesi nisbetinde tatbîk etmek ve meşâyihînin tehvîn-i ihtiyâclarına medâr olacak mukarrerâtı ittihâz eylemek Evkâf-ı Hümâyûn Nezâret-i celîlesine âid mesâilden olduğu Mâliye Nezâret-i celîlesinin iş'ârına atfen tebliğ ve iş'âr buyurulmuştur. Bu husûs hakkında mukaddemâ Evkâf-ı Hümâyûn Nezâret-i celîlesiyle cereyân eden sâlifü'l-arz muhâbere cevâbında tekâyânın muhassasâtı şahsa âid ve vazîfe mâhiyetinde olmayıp âid olduğu tekâyâ fukarâsının ta'âmiyyesi olmasına mebnî şimdiye kadar i'tâ edilen tahsîsât-ı fevka'l-âdelerden istisnâ edildikleri gibi bu defa da bahalılık zımında nazar-ı dikkate alınmadıkları beyân olunup hâlbuki hükûmet-i seniyyece ma'âşlı ve ücretli [0030] bi'l-umûm me'mûrîn ve müstahdemîne bahalılık zammı ve ekmek bedeli i'tâsı

sûretiyle icrâ ve ibzâl buyurulan bunca avâtıf galâ-yı hâzırdan en ziyâde müteessir ve mutazarrır olan me'mûrîn ve müstahdemînin tevân-i ihtiyâcâtı maksadına mübtenî ve tekâyâ-yı şerîfe sükkânı ise bu devlet-i ebed-müddet-i Osmâniyye'nin birer du'âhân-ı kadîmi olarak ma'îşetleri işbu ta'âmiyyelerine münhasır olduğuna ve Evkâf-ı Hümayûn Nezâret-i celîlesinin dahi taht-ı i'tirâfında bulunduğu üzere ta'âmiyyeler şimdiye kadar vukû' bulan zamâimden hisse-mend-i âtufet olamamış idiğine binâen ber-vech-i ma'rûza ma'îşetleri işbu ta'âmiyyeye münhasır olan meşâyih ve sükkân-ı tekâyânın da tehvîn-i ihtiyâcına medâr olmak üzere zamâim-i lâzimededen ta'âmiyyelerin dahi nasîbedâr edilmesi esbâbının istikmâline müsâ'ade-i celîle-i Meşîhat-penâhîlerinin erzân buyurulması bâbında.

Vahyî, Mustafa Hâkî, Seyyid Mehmed es-Sükûtî, Mustafa, Ali, Mehmed Gülşen, Tevfik

IST\_MFT\_MSH\_DFT02\_01741\_0001-0031

**Eyüp'te Kâşgarî Abdullah Efendi Dergâhı içerisindeki Rûznâmçeci Murtaza Efendi Camii'nde, eskimiş ve eski eser hükmündeki halının yenisiyle değiştirilmesi ve caminin halı ve seccadelerle tefrişinin yapılması.**

Fî 17 Z. sene 1337 / Fî 13 Eylül sene 1335 / - / - / - / Sîret / - / 104 / Fî 17 Z. sene 1337 [13 Eylül 1919] / Fî 13 Eylül sene 1335

Müzekkire

Eyüpsultân'da Kâşgarî Abdullah Efendi Dergâh-ı şerîfinde kâin Rûznâmçeci Murtaza Efendi Câmi'-i şerîfinde mevcûd bulunan fersûde bir halının âsâr-ı atıkadan olduğu ve bazı kimseler tarafından iki yüz lira kadar kıymet verilmekte bulunduğu ve câmi'-i mezkûrda ondan başka halı ve seccâde mevcûd olmadığı dergâh-ı mezkûr postnişîn vekîli efendi tarafından haber verilmiş olduğundan tebdîlen Câmi'-i şerîfin halı ve seccâde ile tefrişi tensîb edilmiş olmağla ol vechile mu'âmele-i mukteziyyenin icrâsı husûsunun bâ-tezkire-i aliyye Evkâf-ı Hümayûn Nezâret-i aliyyesine iş'âr buyurulması bâbında.

Vahyî, Mustafa Hâkî, Seyyid Mehmed es-Sükûtî, Mustafa, Ali, Mehmed Gülşen, Tevfik

IST\_MFT\_MSH\_DFT02\_01741\_0001-0032

**Eyüp'te Şeyhülislam Feyzullah Efendi Dergâhı postnişîni Râsih Efendi'ye bir vekil tayin edilmesi ve dergâhta kalanların tahliyeleri.**

Fî 14 Z. sene 1337 / Fî 10 Eylül sene 1335 / - / - / - / Sîret / - / 103 / Fî 14 Zilhicce sene 1337 [10 Eylül 1919] / Fî 10 Eylül sene 1335

Müzekkire

Eyüpsultân civârında kâin Şeyhülislâm Feyzullah Efendi Dergâh-ı şerîfi şeyhi Râsih Efendi'nin hemşiresinin velîme cem'iyeti münâsebetiyle dergâh dâhilinde çalgı çaldırmak ve köçek oynatmak ve işret isti'mâl olunmak gibi ef'âl-i gayr-i meşrû'a vukû'a getirildiği ihbâr olunması üzerine icrâ ettirilen tahkîkât netîcesinde dergâhın merbût bulunduğu Yedinci Merkez Dergâhının ve Meclis Müfettişliğinin ve mahallesi hey'et-i ihtiyâriyyesinin resmî raporları mündericâtıyla Meclis'e gelip şehâdet eden civâr ahâlîsinden vüsûku'l-kelim ve şâyân-ı i'timâd bazı zevâtın beyânâtından ef'âl-i merkûmenin vukû'u tebeyyün etmiş ve mûmâ-ileyh harem dâiresinden

bir kısmını kirâya vermekle beraber erbâb-ı tarikat ve şi‘âr-ı meşîhate yakışmayacak bazı ef‘âl ve hâlâtta bulunmakta olması ahâlî-i mahallenin enzâr-ı istikbâhını celb eylemekte olduğu istihbâr kılındığından bahisle vesâyâ-yı lâzime ifâsı Evkâf-ı Hümâyûn Nezâret-i celîlesinden de bâ-tezkire iş‘âr olunmuş ve mûmâ-ileyh Şeyh Râsih Efendi Meclis’e celb ve isticvâb olundukta kadınlara mahsûs olarak çalgı ve köçek oyununu i’tirâf etmiştir. İcâb-ı maslahat lede’t-teemmül şeyh-i mûmâ-ileyhin gerçi cereyân eden ahvâle bizzât iştirâki tebeyyün etmemiş ise de dergâh-ı şerîf meşîhati gibi ehemmiyet-i maddiye ve ma‘neviyyesi derkâr olan bir vazîfe-i mühimmeyi idâre ve ifâdan ve dergâh derûnunda bu misilli ahvâl-i gayr-i meşrû‘anın men‘inden âciz bulunmasından dolayı uhdesinden cihet-i meşîhatın ref‘i icâb ederse de kendisi hilkaten pek sâf olması ve bu hâdiseye kadar sû-i hâline dâir hiçbir şikâyet vukû‘ bulmaması ve fukarâ-yı tarikten bulunması hasebiyle ref‘ ile müzâcâtından sarf-ı nazarla bir vekîl ta‘yîniyle dergâhın idâresi münâsib görülmüş ve mûmâ-ileyh dergâhın pek cüz‘î olan muhassasâtını tamamen almak ve kendisi mücerred olup yalnız vâlidesi bulunduğundan harem dâiresinin bir kısmında ikâmet etmek üzere dâire-i mezkûrenin şimdiki sükkânından tamamen tahliyesi vekîl olacak zâtın âilesiyle beraber diğer kısmında ikâmet ederek dergâhın idâresiyle vazîfe-i mukaddese-i meşîhati hüsn-i ifâ eylemesi tezekkür edilmekle sûret-i ma‘rûza rehîn-i tasvîb-i sâmi-i cenâb-ı Meşîhat-penâhîleri buyurulduğu takdîrde müzekkire-i dâ‘iyânemizin işâret-i aliyye-i Fetvâ-penâhîleriyle tevşîh buyurulması bâbında.

Vahyî, Mustafa Hâkî, Seyyid Mehmed es-Sükûtî, Mustafa, Mehmed Gülşen, Tevfik

IST\_MFT\_MSH\_DFT02\_01741\_0001-0033

**Eyüp Şeyhülislam Feyzullah Efendi Dergâhı postnişini Râsih Efendi’ye bir vekil tayin edilmesi ve validesiyle dergâhta ikamet ettirilmesi.**

Fî 7 Z. sene 1337 / Fî 3 Eylûl sene 1335 / - / - / - / Sîret / - / 102 / Fî 14 minhü [10 Eylûl 1919] / Fî 10 Eylûl minhü

Müzekkire

Eyüpsultân civârında kâin Şeyhülislâm Feyzullah Efendi Dergâh-ı şerîfi şeyhi Râsih Efendi’nin hemşiresinin velîme cem‘iyeti münâsebetiyle dergâh dâhilinde çalgı çaldırmak ve köçek oynatmak ve işret isti‘mâl olunmak gibi ef‘âl-i gayr-i meşrû‘a vukû‘a getirildiği ihbâr olunması üzerine icrâ ettirilen tahkîkât netîcesinde dergâhın merbût bulunduğu Yedinci Merkez Dergâhının ve Meclis Müfettişliğinin ve mahallesi hey‘et-i ihtiyâriyyesinin resmî raporları mündericâtıyla Meclis’e gelip şehâdet eden civâr ahâlîsinden vüsûku’l-kelim ve şâyân-ı i’timâd bazı zevâtın beyânâtından ef‘âl-i merkûmenin vukû‘u tebeyyün etmiş ve mûmâ-ileyh harem dâiresinden bir kısmını kirâya vermekle beraber erbâb-ı tarikat ve şi‘âr-ı meşîhate yakışmayacak bazı ef‘âl ve hâlâtta bulunmakta olması ahâlî-i mahallenin enzâr-ı istikbâhını celb eylemekte olduğu istihbâr kılındığından bahisle vesâyâ-yı lâzime ifâsı Evkâf-ı Hümâyûn Nezâret-i celîlesinden de bâ-tezkire iş‘âr olunmuş ve mûmâ-ileyh Şeyh Râsih Efendi Meclis’e celb ve isticvâb olundukta kadınlara mahsûs olarak çalgı ve köçek oyununu i’tirâf etmiştir. İcâb-ı maslahat lede’t-teemmül şeyh-i mûmâ-ileyh gerçi bizzât iştirâki tebeyyün etmemiş ise de hilkaten pek sâf-dil bulunması dergâh-ı şerîfde bu gibi ahvâlin cereyânının men‘ine gayr-i kâdir olması uhdesinden cihetin ref‘i sûretiyle mücâzâtın tahfîfine medâr addolunup ancak dergâh meşîhati gibi ehemmiyet-i

maddiyye ve ma'neviyyesi derkâr olan bir vazîfe-i mühimmeyi idâre ve ifâdan âciz ve mücerred bulunan mûmâ-ileyhin vâlideyiyle dergâhın bir kısmında ikâmet ederek pek cüz'î olan muhassasâtı tamamen alması ve harem dâiresinin şimdiki sükkânından tamamen tahliyesiyle cihet-i meşîhatin tensîb olunacak fahrî bir vekîle tefvîzi ve vekîl olacak zâtın âilesiyle beraber harem dâiresinin bir kısmında ikâmet ederek dergâhın idâresiyle vazîfe-i mukaddese-i meşîhati hüsn-i ifâ eylemesi tezekkür ve tensîb edilmekle sûret-i ma'rûza rehîn-i tasvîb-i sâmi-i cenâb-ı Meşîhat-penâhîleri buyurulduğu takdirde müzekkire-i dâ'iyânemizin işâret-i aliyye-i Fetvâ-penâhîleriyle tevşîh buyurulması bâbında.

Vahyî, Mustafa Hâkî, Seyyid Mehmed es-Sükûtî, Mustafa, Mehmed Gülşen, Tevfik

IST\_MFT\_MSH\_DFT02\_01741\_0001-0034

**Edirne'de Saçlı İbrâhim Efendi Tekkesi diğer adıyla Dizdarzâde Ahmed Efendi Zaviyesi şeyhi Adli Efendi'nin İstanbul'da Seyyid Nizameddin Dergâhı meşîhat niyâbetine tayiniyle, yerine Şeyh İsmâil Dede Efendi'nin atanması.**

Fî 4 Z. sene 1337 / Fî 1 Eylûl sene 1335 / - / - / - / Sîret / - / 101 / Fî 18 Z. sene 1337 [14 Eylûl 1919] / Fî 15 Eylûl sene 1335

Müzekkire

Nezâret-i Evkâf-ı Hümâyûn'a mülhak evkâftan Edirne'de kâin Saçlı İbrahim Efendi Tekkesi denmekle şehir Dizdârzâde Ahmed Efendi Zâviyesinin meşîhat ciheti mutasarrıfı Şeyh Adli Efendi'nin uhdesine mukaddemâ Dersââdet'te Seyyid Nizameddin Hazretleri Dergâh-ı şerîfi meşîhat niyâbeti tevcih olunmasına binâen inhilâl eden Edirne'deki zâviye-i mezkûre Evkâf-ı Hümâyûn Nezâret-i celîlesinin bu bâbdaki tezkiresinde mahkî kuyûd ile de müsbet olduğu üzere Âsitâne-i Hazret-i Pîr Azîz Mahmud Hüdâî -kuddise sırruhu'l-âli- hulefâsına meşrût ve meşîhati de te'âmülen âsitâne-i pîr-i müşârun-ileyh seccâde-nişinlerinin arz ve inhâlarıyla müvecceh olduğundan hânkâh-ı müşârun-ileyh kudemâ-yı fukarâsından ve Celvetî hulefâsından bulunan eş-Şeyh İsmâil Dede Efendi dâ'ileri erbâb-ı zühd ü salâhtan ve hüsn-i sîret ashâbından bulunmasıyla meşîhat-i mezkûreye ta'yini Hazret-i Hüdâî Hânkâh-ı şerîfi seccâde-nişinliğinden bâ-takrîr arz ve inhâ olunmasına ve mûmâ-ileyh İsmâil Efendi nizâm-ı cedîd mücebinece mesbûku'l-imtihân ulemâ ve sulehâdan bulunmasına binâen meşîhat-i mezkûreye ta'yini bi't-tensîb keyfiyyet 15 Şevvâl sene 1334 ve 2 Ağustos sene 1332 târihli ve 63 numaralı mazbatâ ile makâm-ı sâmi-i cenâb-ı Meşîhat-penâhîlerine arz olunduğu kayden müstebân olup ol vakitten beri mu'âmele ta'kîb olunmakla beraber nezâret-i müşârun-ileyhâ ile mahallî evkâf müdürîyyeti arasında muhâbere cereyân etmesi yüzünden iş neticeye iktirân etmemiş ve Edirne Encümen-i Meşâyihince meşrûtiyeti bilinemediğinden âhara tevcihi cihetine gidilmiş ise de zâviye-i mezkûre meşîhatinin ber-vech-i ma'rûz mukaddemâ usûl ve nizâmına ve şart-ı vâkıfa tevfiқан intihâb edilmiş olan mûmâ-ileyh İsmâil Dede Efendi'ye tevcihinden sarf-ı nazar olunması mûmâ-ileyhin mağdûriyetini istilzâm edeceğinden karâr-ı evvel vechile Dersââdet'te bulunan mûmâ-ileyhe tevcihi tensîb edilmekle rehîn-i tasvîb-i sâmi-i cenâb-ı Meşîhat-penâhîleri buyurulduğu takdirde berât-ı âlîsinin tastîr ve i'tâsı husûsunun müzekkire-i dâ'iyânemizin lef'iyle bâ-tezkire-i aliyye Evkâf-ı Hümâyûn Nezâret-i aliyyesine iş'âr buyurulması bâbında.

Vahyî, Mustafa Hâkî, Seyyid Mehmed es-Sükûtî, Mustafa, Mehmed Gülşen, Tevfik



IST\_MFT\_MSH\_DFT02\_01741\_0001-0035

**Konya'nın Şems-i Tebrizî Mahallesi'nde, Konya Valisi Ebubekir Sami Paşa'nın inşa ettiği Nakşibendiyye-i Hâlidîyye Zaviyesi şeyhi Mehmed Efendi'nin vefatı üzerine, yerine küçük oğlu Ziya Efendi'nin tayini.**

Fî 4 Zilhicce sene 1337 / Fî 1 Eylûl sene 1335 / - / - / - / Sîret / - / 100 / Fî 5 minhü [1 Eylûl 1919]  
/ Fî 2 Eylûl minhu

Müzekkire

Konya'da Hazret-i Şems-i Tebrizî Mahallesi'nde Konya valisi esbak Ebubekir Sami Paşa'nın binâ-kerdesi olan Nakşibendi-i Hâlidî Zâviyesinin meşihat cihetinin bâ-berât-ı âlî mutasarrıfı Şeyh Mehmed Efendi'nin 2 Temmuz sene 1322 târihinde vukû'-ı vefâtına mebnî inhilâl eden cihet-i mezkûrenin müteveffâ-yı mûmâ-ileyhin büyük oğlu Zeynelabidin Efendi'nin muvâfakatiyle küçük mahdûmu bin iki yüz doksan bir tevellüdlü Ziya Efendi uhdesine bi'l-imtihân tevcih olduğuna dâir mahallî hey'et-i imtihâniyyesinin 5 Ağustos sene 1335 târihli mazbatasıyla müteferri'âtı icâbı ifâ ve inbâ olunmak üzere gönderildiğine dâir Evkâf-ı Hümâyûn Nezâret-i celîlesinden vârid olup havâle buyurulan 27 Zilka'de sene 1337 ve 25 Ağustos sene 1335 târihli ve 122182 umumî 109 husûsî numaralı tezkire ve melfûfâtı mütâla'a olundu.

İcâbı lede'l-müzâkere Meclis-i Meşâyih Nizâmnâme-i Cedîdi ahkâmınca taşrada bulunan tekâyâ ve zevâyâ meşihat cihetleri encümen-i meşâyihler tarafından tevcih olunması icâb etmekte ise de Konya'da henüz encümen-i meşâyih teşekkül etmediğine ve mûmâ-ileyh Ziya Efendi tarikat-i aliyye-i Nakşibendiyye-i Hâlidîyye hulefâsından ve hüsn-i hâl ashâbından olup ehliyeti bi'l-imtihân tebeyyün ettiği ve müsâbaka i'ân olduğumuz mezkûr mazbatanın tedkikinden anlaşıldığına binâen hey'et-i imtihâniyyece yapılan ve usûl ve Tevcih-i Cihât Nizâmnâmesi ahkâmına muvâfık görülen mu'âmele encümen-i meşâyih mu'amelesi makâmında addolunarak tasdik edilmekle mu'âmele-i mukteziyyesi icrâ olunmak üzere işbu müzekkire-i dâ'iyânemizin leffîyle nezâret-i müşârun-ileyhâya tezkire-i cevâbiyye tastîr ve melfûfât-ı mezkûrenin i'ade ve tesyîr buyurulması tezekkür kılındı ol bâbda.

Vahyî, Mustafa Hâkî, Seyyid Mehmed es-Sükûtî, Mustafa, Mehmed Gülşen, Tevfik

IST\_MFT\_MSH\_DFT02\_01741\_0001-0036-37

**Memurlara yapılacak pahalılık zammından, tekkelerdeki derviş ve meşâyihin de istifadesinin Sadârete arzı.**

Fî 29 Za. sene 1337 / Fî 27 Ağustos sene 1335 / - / - / - / Sîret / - / 99 / Fî 4 Zilhicce sene 1337 [31 Ağustos 1919] / Fî 1 Eylûl sene 1335

İşbu müzekkire geri alınıp yerine fî 15 Eylûl sene 1335 târihli ve yüz beş numaralı müzekkire yazılmıştır.

Müzekkire

Tekâyâ-yı şerîfe muhassasât ve mu'ayyenâtı zâten derece-i kifâyede olmadığı ve Cenâb-ı Hak mazhar-ı tehvîn buyursun fî zamâninâ olanca şiddetiyle hüküm-fermâ olan galâ-yı es'ârdan en ziyade erbâb-ı ma'âşın dûçâr-ı ıztırâr ola-geldikleri nazar-ı takdîr ve i'tibâra alınarak bi'l-umûm ashâb-ı ma'âş zamâim-i lâzime ile hisse-mend-i âtîfet oldukları hâlde tekâyâ ta'âmiyyelerine bir



güne zam icrâ edilmemesinden nâşî meşâyih ve sükkânı şâyân-ı merhamet bir sûrette muztar kaldıklarından ve ma'rûzât-ı sâireden bahs ile mûmâ-ileyhimin terfih-i ahvâli esbâbının istikmâlîni kâfil mukarrerât-ı sâibenin Meclis-i Mahsûs-ı Vükelâca ittihâz buyurulması 7 Mayıs sene 1335 târîhli müzekkire-i dâ'iyânemizle makâm-ı fehâmet-ittisâm-ı cenâb-ı Meşihat-penâhîlerinden arz ve istirhâm kılınmış idi. Bu bâbda muntazır olan cevâb-ı âlî henüz şeref-zuhûr etmemiş ve bu kere de meşâyih-i mûmâ-ileyhim dâ'ileri mürâca'atla ve zarûret-i hâllerinden bahs ile tekrîr-i isti'tâf etmekle beraber tekâyâ-yı şerîfeye vaktiyle muhassas olan fodulalarla lahm kat' edilerek bunlara mukâbil tahsis edilen lâ-şey mesâbesindeki bedelât-ı nakdiyye ile şu zamân-ı galâda ekmek ve et tedârikinin adem-i imkânı derkâr idiğinden zarûret-i vâkî'alarının tehvîn ve ta'dîli zımnında sâlifü'z-zîkr et ve ekmeklerinin kemâ-fi's-sâbık aynen i'tâsı husûsunu istirhâm etmişlerdir. Ma'lûm-ı nasafet-melzûm-ı âlî-i hazret-i Fetvâ-penâhîleri olduğu üzere makâm-ı mu'allâ-yı Hilâfet-i uzmâ'nın devâm-ı şevket ve saltanatını ve bu devlet-i ebed-müddet-i Osmâniyye'nin te'âlî-i satvet ve kudreti ve muvaffakiyeti için her biri birer du'âhân olan tekâyâ-yı şerîfe [0037] meşâyih ve sükkânının ve sâir fukarâ-yı mütereddidînin infâk ve i'âşeleri maksad-ı hayr-mersad-ı âlîsiyle selâtîn-i izâm-ı behîşt-makâm hazerâtıyla sâir erbâb-ı hayr u birr -nevverallâhu merâkıdehum- taraflarından ta'yîn ve tahsis edilmiş olan fodula ve lahmın kat'ıyla mukâbilinde ve husûsiyle şu galâ-yı es'âr zamanında pek cüz'î bir bedel i'tâsı esâsen ma'îşetleri buna münhasır olan meşâyih ve fukarânın "fevka mâ-yutasavver muztar" kalmalarını istilzâm ederek bu ise hem şân-ı merâhim-nişân-ı âlî ve hem ashâb-ı hayrâtın gâye-i makâsıdı ile kâbil-i tevfiğ ve te'vîl olamayacağı şübhesiz idiğinden fukarâ-yı mûmâ-ileyhimin de sâye-i şevket-vâye-i Hilâfet-penâhî'de tehvîn ve ta'dîl-i zarûretlerine ve te'mîn-i ma'îşetlerine medâr olmak ve elsine-i fukarâdan ferâğ-ı bâl ile isticlâb-ı du'â olunmak üzere müzekkire-i sâbık-ı âcizânemizde arz ve istirhâm olunduğu vechile nafaka-i fukarâya ta'alluk eden bi'l-umûm tekâyâ ta'âmiyyelerinin ma'âşât misilli zamâim-i hâzıradan te'mîn-i istifâdesi ve bilâ-vech-i şer'î kat' edilen fodula ve lahmın aynen i'âdesi husûslarının hükûmet-i seniyyece bir karâr-ı musîbe rabtı istirhâmına tekrar ictirâ kılınmağın ol bâbda ve her hâlde.

Vahyî, Mustafa Hâkî, Seyyid Mehmed es-Sükûtî, Mustafa, Mehmed Gülşen, Tevfik

IST\_MFT\_MSH\_DFT02\_01741\_0001-0038

**Selimiye Dergâhı şeyh nâibi Esad Efendi'nin azliyle, yerine Şeyh Mehmed Tevfik Efendi'nin tayini.**

Fî 26 Za. sene 1337 / Fî 24 Ağustos sene 1335 / - / - / - / Sîret / - / 98 / Fî 29 Za. sene 1337 [26 Ağustos 1919] / Fî 27 Ağustos sene 1335

Îşâret-i aliyye

Hânkâh-ı mezkûr şeyh nâibi Esad Efendi hasbe'l-icâb ibkâ edilerek bu bâbda Meclisce evvel ve âhir ittihâz olunan mukarrerât şimdilik te'hîr edilmiş olmağla ona göre mu'âmele-i mukteziyye ifâ olunmak üzere Meclis-i mezkûra

Fî 7 Zilhicce sene 1337

## Müzekkire

Selimiye Dergâh-ı şerîfi Şeyh nâibi Esad Efendi'nin niyâbetden infisâl edip etmediğinin istifsârına dâir İstanbul Evkâf Müdüriyyetinden makâm-ı riyâsete vârid olan merbût 4 Ağustos sene 1335 târihli ve 1461 numaralı tezkire kırâet olundu.

Kuyûda lede'l-mürâcâ'a mûmâ-ileyh Şeyh Esad Efendi'nin niyâbet-i mezkûreye hîn-i ta'yîninde dergâh-ı mezkûr vakfiyesinde münderic tarikat-i aliyye-i Nakşibendiyye erkânının icrâsı ve mürîdâna tedrîs vezâifi gibi birçok vezâif-i mukaddeseyi ber-mûceb-i şart-ı vâkîf bizzât ifâyı ta'ahhüd ettiği ve ol bâbda bir de sened i'tâ eylemiş olduğu hâlde şimdiye kadar dergâh-ı mezkûrda sâkin olmadığı gibi hâl-i harb sebebiyle dergâha ikâme edilmiş olan askerin tahliyesinden sonra dergâh hâlî kalarak bir takım esâfil ve eşhâs-ı şerîreye melce' olduğu ve derûnunda bir bekçi bile bulundurulmadığı Üsküdar Polis Müdüriyyetinin tahkikâtına atfen mutasarrıflıktan iş'âr olunduğu ve nezâretçe dahi icrâ kılınan tahkikât bunu müeyyid bulunduğundan bahisle bu hâl-i esef-âvere müsâra'aten nihâyet verilmesi hakkında Evkâf-ı Hümâyûn Nezâret-i celilesinden makâm-ı sâmi-i cenâb-ı Meşihat-penâhîlerine vârid olup havâle buyurulan fî 11 Haziran sene 1335 târihli ve husûsî 74 numaralı tezkire mündericâtına nazaran ve nizâm-nâme ahkâmına tevfiikan mûmâ-ileyhin niyâbet-i mezkûreden azli hakkında takdîm kılınan müzekkire fî 19 Ramazan sene 1337 târihinde mûcebince işâret-i aliyyeye iktirân ettiği ve yerine tarikat-i aliyye-i Nakşibendiyye ecille-i meşâyihinden ve fudelâ-yı benâmdan Şeyh Mehmed Tevfik Efendi'nin ta'yîni bi't-tensîb keyfiyyet fî 9 Temmuz sene 1335 târihli mazbata-i dâ'iyanemizle makâm-ı fehâmet-ittisâm-ı hazret-i Fetvâ-penâhîlerine arz olunduğu dergâhın muhassasât ve mu'ayyenâtının fî 21 Haziran sene 1335 târihinden i'tibâren Şeyh Esad Efendi'ye i'tâ olunmaması husûsunun nezâret-i müşârun-ileyhâya iş'âr buyurulması fî 16 Temmuz sene 1335 târihli müzekkire ile arz olunduğu müstebân olmağla işbu müzekkire müfâdına nazaran mu'amele-i mukteziyenin icrâsı bâbında.

Vahyî, Mustafa Hâkî, Mustafa, Mehmed Gülşen, Tevfik

IST\_MFT\_MSH\_DFT02\_01741\_0001-0039

**Kırşehir'de Hacı Bektâş-ı Velî Dergâhı postnişinliğine tayin edilen Şeyh Hasan Efendi'nin maruz kaldığı bazı uygunsuz hallerden dolayı görevini layıkıyla yapamadığından, kendisine mahallince gereken kolaylığın sağlanması.**

Fî 26 Za. sene 1337 / Fî 24 Ağustos sene 1335 / - / - / - / Sîret / - / 97 / Fî 27 Za. sene 1337 [24 Ağustos 1919] / Fî 25 Ağustos sene 1335

## Müzekkire

Kırşehri'nde kâin Hacı Bektâş-ı Velî -kuddise sırruhu'l-celî- Hânkâh-ı şerîfi postnişini Şeyh Hasan Efendi dâ'ileri tarafından Meclis-i dâ'iyanemiz riyâsetine vârid olup merbûtan arz ve takdîm kılınan rapor ile makâm-ı fehâmet-ittisâm-ı cenâb-ı Meşihat-penâhîlerine takdîm olunup tevdi' buyurulan 16 Ağustos sene 1335 târihli arzıda mûmâ-ileyhin hânkâh-ı mezkûra muvâsalatından beri ma'rûz kaldığı ahvâl-i nâ-becâ dolayısıyla ifâ-yı vazîfe emrinde dūçâr-ı müşkilât olduğundan bahisle ifâ-yı vazîfe edebilmesinin te'mîni arz ve istirhâm olunmuştur. Müstağnî-i arz ve îzâh olduğu üzere hânkâh-ı mezkûr postnişinliğine Ankara vilâyetinden vukû' bulan iş'âr vechile tarikat-i aliyye-i Nakşîyye usûl ve ezkârını icrâ ve kasaba ile mütecâvir nevâhî

halkına eyyâm-ı mübâreke ve evkât-ı münâsibede va'z u nasihat îfâ eylemek şartıyla ta'yîn ve i'zâm buyurulmuş olan mûmâ-ileyhin der'uhde ettiği vezâîfin ehemmiyeti derkâr olmasına ve matlûb vechile vazîfesinin îfâsı husûsunda hükûmet-i mahalliyyenin mu'âvenet ve müzâheretine mazhar olması îcâb-ı hâl ve maslahattan bulunmasına binâen sâlifü'l-arz rapor muhteviyâtı nazar-ı dikkate alınarak gerek dergâha müte'allık umûr ve gerek vazîfesine âid husûsâtta usûl ve nizâma tevfikân teshîlât-ı lâzimeye mazhariyeti esbâbının istikmâli husûsunun Ankara vilâyet-i aliyyesine iş'âr ve mezkûr raporun leffen tesyâr buyurulması menû-ı re'y-i sâmi-i cenâb-ı Meşihat-penâhîleridir ol bâbda.

Vahyî, Mustafa Hâkî, Mustafa, Mehmed Gülşen, Tevfik

IST\_MFT\_MSH\_DFT02\_01741\_0001-0040

**Meclis-i Meşâyih Talimatnamesi'nde izin almayan ve görevini yapmayanlar ve beşinci maddeye muhalif hareket edenler hakkında uygulanacak cezalarda değişiklik yapılması.**

- / - / - / - / - / - / - / - / 96 / Fî 27 Za. sene 1337 [24 Ağustos 1919] / Fî 25 Ağustos sene 1335

Müzekkire

Meclis-i Meşâyih Ta'lîmâtname'si'nin yedinci maddesinde ale'l-usûl me'zûniyet almayarak vazîfesini îfâ etmeyenler ve beşinci maddeye muhâlif hareket edenler haklarında icrâsı muharrer olan mu'âmele-i tevbihiyyenin derecâtı pek vâsî' ve te'mîn-i maksada gayr-i kâfi idiği mu'âmelât-ı câriyye ile sâbit olmasına binâen hıdemât-ı cihâtın bi-hakkın te'mîn-i îfâsına kâfil olmak üzere sâlifü'l-arz yedinci madde[de] münderic derecât-ı te'dibiyyenin

Birinci defasında ma'ât-tenbîh nısf muhassasât-ı şehriyyesi

İkinci defasında ma'ât-tevbîh bir aylık muhassasâtının tamamı kat'

Üçüncü defasında ref'-i cihet olunur.

Sûretinde ta'dîl ve tashîhi Meclis-i dâ'iyânemizce bi't-tezekkür takarrur eylemiş olduğundan sûret-i ma'rûza nezd-i sâmi-i cenâb-ı Fetvâ-penâhîlerinde de mazhar-ı tasvîb olduğu sûrette icrâ-yı îcâbına müsâ'ade buyurulması bâbında.

Vahyî, Mustafa Hâkî, Mustafa, Mehmed Gülşen, Tevfik

IST\_MFT\_MSH\_DFT02\_01741\_0001-0041-42

**Dergâh tahsisatlarının artırılması, eklemek ve et tayinatlarının bedel olarak değil de aynı olarak verilmesi talebi.**

Fî 26 Za. sene 1337 / Fî 23 Ağustos sene 1335 / - / Kırmızı 130 / Meclis 307 / 121837 - 105 husûsî / Tezkire-i Evkâf Nezâreti / - / 95 / Fî 26 Za. sene 1337 [23 Ağustos 1919] / Fî 23 Ağustos sene 1335

Müzekkire

Evkâf-ı Hümayûn Nezâret-i celîlesinden cevâben vârid olup havâle buyurulan merbût tezki-rede müstenid bulunduğu Levâzım Müdiriyyetinin iş'ârına atfen beyân olunmuş ise de arz ve beyândan müstağnî olduğu üzere tekâyâ ve zevâyâ ve mesâcid gibi bi'l-cümle me'âbid-i şerife ile sâir müessesât-ı dîniyye-i İslâmiyye'nin te'mîn-i idâre ve muhâfaza-i umrânı maksadıyla selâtîn-i izâm-behişt-makâm hazerâtıyla sâir ashâb-ı hayrât taraflarından vakf ve ta'yîn edilmiş olan muhassasât-ı nakdiyye ve ayniyyenin cibâyet ve tahsîli ve meşrûtün-lehlerine vakt ü

zamanıyla ve tamamıyla i'tâ ve tavsîli maksadıyla müteşekkil olan Evkâf Hazînesince yağların celbi husûsunda ihtiyâr edilen masrafın te'mîn ve telâfisi için bir mikdarının satılması gerçi becâ ise de Hazîne-i Evkâf'ın taht-ı zabt ve idâresinde bulunan birçok zeytinlikler hâsılât-ı vefîresi mevkûfün-aleyhlerinin ma'a ziyâde te'mîn-i idâresine kâfi ve fazlası da satılmağa vâfi idiği ma'lûm iken Levâzım İdâresince birkaç seneden beri ma'a't-teessûf i'tiyâd edilen noksânî-i te'diyât yüzünden hâl-i harâbîye yüz tutan ve ikâme-i şe'air-i dîniyyeye mahsûs olan hayrât-ı şerîfenin ma'âzallâhi te'âlâ noksân te'diyâtın devamı hâlinde dūçâr-ı ta'tîl ve indirâs olması pek de ba'îdül-ihimâl olmamasına ve ma'a-hâzâ ilcâât-ı zaman ile [0042] hüküm-fermâ olan galâ-yı es'ârdan en ziyâde müteessir ashâb-ı ma'âşın tehvîn ve ta'dîl-i ihtiyâcâtı emrinde kâffe-i devâir ve şu'ubât-ı hükûmet-i seniyyece büyük küçük bi'l-cümle ma'âşâta ve hattâ tanzîfât amelesine varıncaya kadar müstahdem ecîr muhassasâtına zamâim-i lâzıma icrâsı gibi bunca fedâkarlık ihtiyâr edildiği ve bu miyânda Evkâf Hazînesinin de me'mûrîn ve müstahdemînine fiât-ı mu'tedile ile yağ ve sabun tevzî'i tevessülâtında bulunduğu evrâk-ı havâdiste nazar-ı şükân ile görüldüğü bir sırada nafaka-i fukarâya müt'eallık tekâyâ muhassasât ve mu'ayyenâtının tamâmî-i i'tâsından imtinâ' ve ibâ makâsıd ve âmâl ashâb-ı hayrâta da bi't-tabî' muvâfık düşemeyerek bir vech ile layık ve revâ olamayacağı gibi esâsen sunûf-ı ehl-i ma'âş miyânında hiçbir sûretle nasîbedâr-ı zamâim olmağa mazhariyet şerefini ihrâz edemeyen ve bir vakitten beri et ve ekmeklerinin de kat'ile mukâbilinde lâ-şey kabîlinden bir bedel verilmekte bulunan tekâyâ-yı mezkûrenin şimdi muhassasât-ı sâiresinin dahi noksân i'tâsı cihetine gidilmesi sükkân-ı hayrâtı büsbütün dūçâr-ı zarûret edeceği derkâr ve bunun bi't-tabî' hükûmet-i seniyyece kabûl ve tecvîz buyurulmayacağı bedîdâr bulunmasına binâen tekâyâ ve sükkânının terfîh-i ahvâli esbâbının istikmâli zımnında nezâret-i müşârun-ileyhâya işbu müzekkirenin leffiyle cevâben tezkire-i aliyye şeref-tastîri menût-ı emr ü irâde-i aliyye-i cenâb-ı Fetvâ-penâhîleri olmağın ol bâbda.

Vahyî, Mustafa Hâkî, Seyyid Mehmed es-Sükûtî, Mustafa, Ali, Mehmed Gülşen, Tevfik

IST\_MFT\_MSH\_DFT02\_01741\_0001-0043

**Silivrikapı'da Topçubaşı Bâlî Ağa Dergâhı cami ve türbesinde, dergâha ait vakıf eşyasının adet ve cinslerinin belirtildiği listenin Evkaf Nezâretine gönderilmesi.**

Fî 20 Za. sene 1337 / Fî 18 Ağustos sene 1335 / - / - / 293 / Sîret / - / 94 / Fî 23 Za. sene 1337 [20 Ağustos 1919] / Fî 20 Ağustos sene 1335

Müzekkire

Silivrikapısı'nda Topçubaşı Bâlî Ağa Dergâh-ı şerîfinde kâin câmi'-i şerîf ve türbe-i münîfde bulunan teberrükât-ı vakfiyyeden mâ'adâ sırf dergâha âid olan eşyâ-i mevkûfenin mikdâr ve ecnâsını mübeyyin dergâh-ı mezkûr postnişini efendi tarafından tevdi' olunup merbûtan arz ve takdîm kılınan bir kıt'a cedvel muhteviyâtının ba'de'l-kayd i'ade olunmak üzere mezkûr cedvelin leffiyle Evkâf-ı Hümayûn Nezâret-i celîlesine tezkire-i aliyye tastîr buyurulması tezekkür kılındı ol bâbda.

Vahyî, Mustafa Hâkî, Seyyid Mehmed es-Sükûtî, Mustafa, Tevfik

IST\_MFT\_MSH\_DFT02\_01741\_0001-0044

**Şah Sultan Dergâhı'nda geçici olarak iskân edilen yangınzede bir ailenin dergâhtan tahliyesi.**

Fî 16 Za. sene 1337 / Fî 13 Ağustos sene 1335 / - / - / - / Sîret / Şah Sultân Tekkesi hakkında Yedinci Merkezin müzekkiresi / 93 / Fî 16 minhü [13 Ağustos 1919] / Fî 13 minhü

**Müzekkire**

Şah Sultân Dergâh-ı şerîfinin selamlık kısmına muvakkaten iskân edilmiş olan harîkzede bir âilenin orada devâm-ı ikâmeti mahzûru müstevceb olmakta bulunduğundan tahliyesi hususunun Evkâf-ı Hümayûn Nezâret-i celîlesine iş'âr buyurulması dergâh-ı mezkûr şeyhi efendinin ifâdesine atfen fî 12 Zilka'de sene 1337 ve 29 Ağustos sene 1335 târih ve 92 numaralı müzekkire-i dâ'iyânemizle arz olunmuş idi. Dergâh-ı mezkûrun merbût bulunduğu Yedince Merkez-i Tekâyâ Postnişinliğinden husûs-ı mezkûra dâir vârid olup mûndericâtı şeyh-i mûmâ-ileyhin ifâdesini müeyyid ve câlib-i nazar-ı dikkat olan rapor müzekkire-i sâbıkaya binâen tastîr buyurulacak tezkire-i aliyye-i cenâb-ı Meşîhat-penâhîlerine leffen nezâret-i müşârun-ileyhâya irsâl buyurulmak üzere rabten arz ve takdîm kılınmağla ol bâbda.

Vahyî, Seyyid Mehmed es-Sükûtî, Mustafa, Tevfik

IST\_MFT\_MSH\_DFT02\_01741\_0001-0045

**Bahariye'de Şah Sultan Dergâhı'nda geçici olarak iskân edilen Bütçe Kalemi kâtiplerinden Muzaffer Bey'in dergâhtan tahliyesi.**

Fî 12 Za. sene 1337 / Fî 9 Ağustos sene 1335 / - / - / - / Sîret / - / 92 / Fî 12 minhü [9 Ağustos 1919] / Fî 9 minhü

**Müzekkire**

Bahariye'de kâin Şah Sultân Dergâh-ı şerîfinin selamlık dâiresine harîkzede olmak dolayısıyla muvakkaten ikâme edilmiş olan Evkâf-ı Hümayûn Nezâret-i celîlesi Bütçe Kalemi ketebesinden Muzaffer Bey mutasarrıf olduğu hânelerinin bedel-i icârından istifâde etmek maksadıyla henüz dergâhı terk etmediğinden ve devâm-ı ikâmeti eyyâm-ı mahsûsada mukâbele için gelecek züvvâra mâni' ve dergâhca bazı güne mazarratı dâ'î bulunduğundan bahisle tahliyesi hakkında mukaddemâ takdîm kılınan 13 Kânûn-ı sâni sene 1335 târihli ve 3 numaralı müzekkire mazrûfen nezâret-i müşârun-ileyhâya irsâl buyurulduğu hâlde henüz tahliye edilmediği ve mûmâ-ileyhin devâm-ı ikâmeti dergâha âid vezâifin ta'tiline sebebiyet vereceği cihetle biran evvel tahliyesi esbâbının istikmâli bu kere dahi dergâh-ı mezkûr postnişini Şeyh Saim Efendi tarafından ifâde ve taleb edilmiş ve fî'l-hakîka dergâhın bu sûretle işgâli hem şart-ı vâkıfa muhâlif ve hem de mahzûru müeddî bulunmuş olduğundan serî'an tahliyesi hususunun nezâret-i müşârun-ileyhâya iş'âr buyurulması bâbında.

Vahyî, Mustafa Hâkî, Seyyid Mehmed es-Sükûtî, Mustafa, Ali, Mehmed Gülşen, Tevfik

IST\_MFT\_MSH\_DFT02\_01741\_0001-0046

**Vefat eden cihât sahibinin görevi niyâbeten küçük çocuğuna verilmesi gibi, görevden alınanların da bu şekilde çocuklarına niyâbeten tevcih edilip edilemeyeceğinin Şûrâ-yı Devlete sorulması.**

Fî 4 Za. sene 1337 / Fî 2 Ağustos sene 1335 / - / - / - / Sîret / - / 91 / Fî 8 minhü [5 Ağustos 1919] / Fî 6 minhü

Müzekkire

Tevcih-i Cihât Nizâm-nâmesi'nin on birinci ve on ikinci maddelerinin esbâb-ı mûcibe lâyhalarında ashâb-ı cihât vezâifinin el-yevm nisâbından dûn olması erbâb-ı cihât için âilelerinin âtileri nâmına kendileri tarafından tasarrufât icrâsına müsâ'id olmadığı ve tekâ'üd sandıklarıyla da râbitaları bulunmadığı gibi ashâb-ı cihât miyânında vazîfelerini doğrudan doğruya mütevellîlerinden alan ve binâen-aleyh bütçedeki zamm-ı vezâif karşılığından müstefîd olmayanlar dahi bulunduğu cihetle vefâtlarında sagîr evlâdının medâr-ı ma'îşetlerini nazar-ı dikkatten dûr tutmamak lüzûmu bedîdâr olmağla cihât-i ilmiyye ashâbından birinin vefâtında kebîr evlâdı olmayıp ve yâhûd olan kibârı müsâbakada kazanamayıp da bir veya müte'addid sagîr evlâdı bulunur ise hem bunlar medâr-ı ma'îşetten mahrûm bırakmamak hem pederlerinden kalan cihât için bi-hakkın ehil olarak yetişebilmeleri zımnında kendilerine bir mehil verilmiş olmak üzere niyâbetle tevcih husûsundaki mesâğ kabul edilerek bu sûretle ashâb-ı cihâtın vefâtlarıyla âilelerinin ducâr-ı perîşânî olmaktan vikâyeleri nazar-ı dikkate alınmıştır. Ancak ashâb-ı cihâtın birinin ve bi'l-hâssa postnişinlik ciheti mutasarrıflarının îcâb-ı şer'î ve nizâmîye binâen uhdelere cihetin ref'iyle inhilâl eden cihâtın merfû'un-anhın evlâd-ı sığarı bulunduğu takdirde vefât eden ashâb-ı cihâtın evlâd-ı sığarı misilli bunlar hakkında dahi sâlifü'l-arz maddeler ahkâmı tatbik olunup olunamayacağının Şûrâ-yı Devletten istifsâr buyurulması bâbında.

Vahyî, Mustafa Hâkî, Seyyid Mehmed es-Sükûtî, Mustafa, Mehmed Gülşen, Tefvik

IST\_MFT\_MSH\_DFT02\_01741\_0001-0047

**Aksaray'da Sekbanbaşı diğer adıyla Olanlar Dergâhı postnişini Şeyh Safvet Efendi'nin talebi üzerine, dergâhta bir temizlikçi ile bir kapıcı istihdamı.**

Fî 2 Za. sene 1337 / Fî 31 Temmuz sene 1335 / - / - / 256 - 257 / Sîret / - / 90 / Fî 4 minhü [1 Ağustos 1919] / Fî 2 minhü

Müzekkire

Aksaray'da kâin Sekbanbaşı nâm-ı diğer Olanlar Dergâh-ı şerîfi cennet-mekân Fâtih Sultân Mehmed Hân Hazretlerinin ümerâ-yı askerîyesinden Yâkub Ağa merhûmun âsâr-ı hayriyyesinden olmasına nazaran akârât-ı vakfiyyesi olmak kaviyyen muhtemel bulunduğu hâlde el-yevm üç yüz altmış beş gurusân ibâret pek cüz'î tahsîsâtı mevcûd idiğinden evvel emirde Evkâf-ı Hümayûn Kuyûd-ı Vakfiyye İdâresince dergâh-ı mezkûra dâir kuyûd ve şürûtun mevcûd olup olmadığına istifsârı ve dergâh binâsının vüs'atine binâen yalnız tanzîfât ve tathîrâtına şehri beş altı yüz gurus sarf edilmekte olduğundan ve evkâf-ı mazbûtadan bulunduğu bir ferrâş ve bir bevâb istihdamıyla zarûrî olan hıdemât-ı bedenîyyesi îfâ ettirmek üzere lâ-ekal şehri altı

yüz guruşun ayrıca tahsîs talebini hâvî mezkûr dergâh postnişini Şeyh Safvet Efendi tarafından i'tâ olunup kırâet ve merbûtan arz ve takdîm olunan iki kıt'a takrîr mündericâtı muvâfık-ı hâl ve nazar-ı dikkate alınmağa şâyân görülmüş olmağla icâbı icrâ ve neticesi inbâ olunması husûsunun mezkûr takrîrlerin leffiyle bâ-tezkire-i aliyye Evkâf-ı Hümâyûn Nezâret-i celîlesine iş'âr buyurulması bâbında.

Vahyî, Mustafa Hâkî, Seyyid Mehmed es-Sükûtî, Mustafa, Tevfik

IST\_MFT\_MSH\_DFT02\_01741\_0001-0048

**İzmit'te meşihatleri münhal Rifâî, Kâdirî, Bayram Paşa ve Şeyh Mehmed Efendi zâviyelerinin deruhte ve vakfiye kayıtlarıyla, maaş miktarlarının Evkaf Nezâretinden istenmesi.**

Fî gurre-i Za. sene 1337 / Fî 30 Temmuz sene 1335 / - / - / - / Sîret / - / 89 / Fî 4 minhü [1 Ağustos 1919] / Fî 2 minhü

Müzekkire

Nefs-i İzmit kasabasında kâin Rifâî ve Kâdirî ve Bayram Paşa ve Şeyh Mehmed Efendi zâviyeleri meşihat cihetlerinin münhal bulunduğu İzmit Encümen-i Meşâyihinden vârid olup merbûtan takdîm kılınan 24 Şevvâl sene 1337 târihli ve 9 numaralı müzekkire-i cevâbiyyeden müstebân olup cihât-ı mezkûre için buraca tâlibler bulunduğundan mezkûr zâviyeler meşihatlerinin der'uhde ve tedâvül ve vakfiye kayıtlarıyla vezâîfi makâdirinin inbâsı husûsunun bâ-tezkire-i aliyye Evkâf-ı Hümâyûn Nezâret-i celîlesine iş'âr ve merbût müzekkirenin yine i'ade olunmak üzere leffen tesyâr buyurulması bâbında.

Mustafa Hâkî, Seyyid Mehmed es-Sükûtî, Tevfik

IST\_MFT\_MSH\_DFT02\_01741\_0001-0049

**Urfa'da Hindiyan Tekkesi postnişini Abdurrahman Efendi'nin azledilerek yerine Seyyid İbrâhim Efendi tayin edilmişse de Abdurrahman Efendi'nin askerden dönüp firar etmediğinin anlaşılmasıyla görevine iadesi.**

Fî selh-i Şevvâl sene 1337 / Fî 29 Temmuz sene 1335 / - / - / 226 / Sîret / - / 88 / Fî 4 minhü [1 Ağustos 1919] / Fî 2 minhü

Müzekkire

Urfa'da kâin Hindiyan Tekkesi meşihat ciheti hakkındaki inhâ âidiyeti cihetiyle Meclis-i Meşâyihce icâbı tezekkür ve ifâ olunmak üzere ol bâbdaki evrâk ile huzûr-ı sâmi-i cenâb-ı Meşihat-penâhîlerine takdîm kılındığına dâir Evkâf-ı Hümâyûn Nezâret-i celîlesinden vârid olup havâle buyurulan 19 Ramazan sene 1337 ve 18 Haziran sene 1335 târihli ve 120372 umûmî, 80 husûsî numaralı tezkire ve melfûfâtı kırâet olundu. Evrâk-ı mezkûre müeddâlarına nazaran zikr olunan Hindiyan Tekkesinin postnişinlik ciheti bâ-berât-ı âlî Şeyh Abdurrahman Efendi'nin uhdesinde iken mûmâ-ileyhin taht-ı silâha alınması üzerine terk-i hizmet ve askerden firâr ettiğine ve yerine vekîl bırakmadığına dâir mahallî evkâf me'mûrluğundan vukû' bulan iş'âra mebnî cihet-i mezkûre mûmâ-ileyhin uhdesinden ref' ve Seyyid İbrâhim Efendi uhdesine tevcih olunduğu ve ahîran Şeyh Abdurrahman Efendi terhîs olunup vazîfesini da'vâ ettiği



esnâda Seyyid İbrahim Efendi uhdesine Sakıbiye Tekkesi meşîhati tevcih olunmasından dolayı Hindiyân Tekkesi meşîhatinden keff-i yed eylediğinden inhilâl eden cihet-i mezkûrenin i'âdeten mûmâ-ileyh Şeyh Abdurrahman Efendi'ye tevcihi Urfa Encüme-i Meşâyihince tezekkür edilmiş ise de bu sûret tevcihin kabûlünü mûmâ-ileyh hakkında mukaddemâ vukû' bulan hilâf-ı hakikat isnâdâtı bir nevi' kabûl demek olacağını ve isnâdât-ı vâkı'a tamamen hilâf-ı hakikat bulunduğunu iddi'â ile ref'in keen lem-yekün addiyle tashih-i mu'amele olunmasını talep etmesi üzerine zikr olunan Encümen-i meşâyihce icrâ kılınan tahkikât neticesinde mûmâ-ileyh Şeyh Abdurrahman Efendi'nin vazifesini terk etmemiş ve askere sevk edildiği zamanda da vekil bırakmış ve askerde iken firâr etmemiş ve mezkûr tekke seferberlik dolayısıyla uzun bir müddet cihet-i askeriyyeden işgâl edilmiş olduğu ve cihetin uhdesinden ref'i hilâf-ı hakikat iş'ardan münba'is bulunduğu cihetle istid'âsı vechile yeniden tevcihe mahal olmayıp tashih-i mu'amele olunması tensib edilmiş olduğu mezkûr encümen-i meşâyihin evrâk-ı melfûfe miyânında bulunan 13 ve 27 Receb sene 1337 târihli ve 4 ve 5 numaralı mazbataları mûndericâtından anlaşıldığından encümen-i mezkûrun kararı Meclis-i dâ'iyânemizce dahi tasvib edilmekle muhâlif-i nizâm olarak icrâ edilmiş olan ref' ve tevcihin "keen lem-yekün" addiyle mezkûr Hindiyân Tekkesi postnişinlik cihetinin kemâ-kân Şeyh Abdurrahman Efendi uhdesinde bulunduğu kaydı mahalline şerh verilmek sûretiyle tashih-i mu'amele edilerek keyfiyyetin mahalline iş'âr olunması husûsunun cevâben nezâret-i müşârun-ileyhâya ve melfûfât-ı mezkûrenin i'ade ve tesyâr buyurulması tezekkür kılındı ol bâbda.

Vahyî, Mustafa Hâkî, Seyyid Mehmed es-Sükûtî, Tevfik

IST\_MFT\_MSH\_DFT02\_01741\_0001-0050

**Bir şahsın, vefatından sonra hulefâsı var iken meşîhati hulefâsına tahsis ederek vakfetse; böyle bir durumda, hulefâsının meşîhatte hak iddia edip edemeyeceğinin Fetvahaneden sorulması.**

Fî 27 Şevvâl sene 1337 / Fî 26 Temmuz sene 1335 / - / - / - / Sîret / - / 87 / Fî 27 minhü [26 Temmuz 1919] / Fî 26 minhü

Müzekkire

Zeyd vakfiye-i ma'mûlün-bihâsında derûnunda zikrullah ifâsına mahsûs dergâhında kendi vefâtından sonra meşîhat vazîfesini mürîdânının intihâbıyla yalnız hulefâsına tahsîs bi'z-zikr ederek şart eylese Zeyd'in halîfesi mevcûd iken hulefâ-i hulefâsının şart-ı mezkûr mücebince meşîhat-i mezkûreyi iddi'âya salâhiyeti olup olmayacağının beyân buyurulması zımnında müzekkire-i dâ'iyânemizin Fetvâhâne-i âlîlerine havâle buyurulması bâbında.

Vahyî, Seyyid Mehmed es-Sükûtî, Mustafa, Tevfik

IST\_MFT\_MSH\_DFT02\_01741\_0001-0051

**Aksaray Olanlar Dergâhı'nda mevlit okunması ve aşure pişirilmesi için vakfedilen ve önceki şeyhlerin vârislerinde olduğu bildirilen paranın tahsil edilerek, şu anki dergâh şeyhi Safvet Efendi'ye teslimi ve vakfiyelerin kaydedilmesinin Evkaf Nezâretinden istenmesi.**

Fî 23 Şevvâl sene 1337 / Fî 22 Temmuz sene 1335 / - / - / - / 248 / Sîret / - / 86 / Fî 27 minhü [26 Temmuz 1919] / Fî 26 minhü

## Müzekkire

Aksaray'da kâin Olanlar Dergâh-ı şerîfinde mevlid ve mi'râc-ı şerîf kırâeti ve aşure tabhı için üç kıt'a vakfiye mücebince otuz bin guruş nukûd-ı mevkûfenin vaktiyle dergâh-ı mezkûr şeyhi Veysi Efendi'ye verilerek ondan oğlu Şeyh Hüsnü Efendi'ye ve onun vefâtıyla da mevcûd veresine intikâl ettiğinden şürût-ı vâkıfı icrâ ettirmek üzere meblağ-ı merkûmun tahsîli ve mezkûr vakfiyelerin kayıd olunması husûslarının nezâret-i müşârun-ileyhâya iş'âr buyurulması talebini hâvî dergâh-ı mezkûr şeyhi Safvet Efendi tarafından Meclis-i dâ'iyânemiz riyâsetine i'tâ olunan takrîr ve mezkûr vakfiyeler lede'l-mütâla'a fi'l-hakika nukûd-ı mevkûfe-i mezbûrenin zâhire ihrâcıyla şürût-ı vâkıfın infâzı vecâibden bulunmuş olmağla nezâret-i müşârun-ileyhâ devâir-i âidesince mu'âmele-i mukteziyyenin icrâsı ve matviyyen takdîm kılınan sâlifü'l-arz üç kıt'a vakfiyenin kaydıyla i'âdesi zımnında merbût takrîr ve vakfiyelerin leffîyle nezâret-i müşârun-ileyhâya tezkire-i aliyye tastîr buyurulması bâbında.

Vahyî, Mustafa Hâkî, Mustafa, Tevfik

IST\_MFT\_MSH\_DFT02\_01741\_0001-0052

**Aksaray Olanlar Dergâhı'nın dükkân haline getirilen dergâh kapısının tahliyesiyle, gereği olmayan diğer kapının kapatılması.**

Fî 20 Şevvâl sene 1337 / Fî 19 Temmuz sene 1335 / - / - / - / Sîret / - / 85 / Fî 20 minhü [19 Temmuz 1919] / Fî 19 minhü

## Müzekkire

Aksaray'da kâin Olanlar Dergâh-ı şerîfinin şeyh-i sâbık Efendi'nin damadı tarafından dükkân hâline ifrâ edilmiş olan bir kapısının tahliyesi ve lüzûmu olmayan diğer küçük kapının sedd ü bendi hakkında icâb eden mu'âmelenin icrâsı talebini hâvî dergâh-ı mezkûr postnişini efendi tarafından Meclis-i dâ'iyânemiz riyâsetine i'tâ olunan merbût takrîr lede'l-mütâla'a mündericâtına nazaran icrâ-yı icâbı zımnında leffîyle Evkâf-ı Hümayûn Nezâret-i celîlesine tezkire-i aliyye tastîr buyurulması tezekkür kılındı.

Vahyî, Mustafa Hâkî, Seyyid Mehmed es-Sükûtî, Mustafa, Mehmed Gülşen, Tevfik

IST\_MFT\_MSH\_DFT02\_01741\_0001-0053

**İstanbul'daki bütün tekke ve zaviyelerin geçmiş yıllar ve bu seneki üç aylara ait verilmeyen zeytinyağı muhassasâtının verilmesinin Evkaf Nezâretine bildirilmesi.**

Fî 18 L. sene 1337 / Fî 17 Temmuz sene 1335 / - / - / - / Sîret / - / 84 / Fî 20 minhü [19 Temmuz 1919] / Fî 19 minhü

## Müzekkire

Dersâadet ve Bilâd-ı selâsede kâin bi'l-cümle tekâyâ ve zevâyânın geçen ve evvelki senelerle bu sene Ramazân-ı şerîfine ve şühûr-ı sâireye âid zeytinyağı muhassasâtından birçok matlûbâtı olup bu bâbda meşâyih taraflarından vukû' bulan mürâca'ata cevâben mevcûd yağ olmadığı beyân olunmakta ve erbâb-ı istihkâk ise istifâ-yı matlûb edememelerinden nâşi dûçâr-ı zarûret ve muzâyaka olmakta bulunduğû hâlde İstiklâl Gazetesi'nin 16 Temmuz sene 1335 târih ve 202 numaralı nüshasında Evkâf-ı Hümayûn Nezâret-i celîlesinin mukaddemâ Edremid'den

celb ettirmiş olduğu zeytinyağlarından fazla bulunan on bin kilosunun fûrûht olunmak üzere mevki'-i müzâyedeye çıkarıldığı istihbâr kılındığı fıkrası görüldüğünden bahisle zikr olunan yağlardan erbâb-ı istihkâk matlûbâtının tesviyesi hakkında mu'âmele-i mukteziyyenin ifâsı istid'âsına dâir Üsküdar ve İstanbul ve Boğaziçi umûm meşâyihî nâmına Meclis-i dâ'iyânemiz riyâsetine i'tâ olunan takrîr lede'l-kırâe sûret-i istid'â muvâfık-ı hâl ve maslahat görülmekle erbâb-ı istihkâk matlûbâtının tesviyesiyle tevâlî-i zarûrete meydan verilmemesi husûsunun bâ-tezkire-i aliyye nezâret-i müşârun-ileyhâya iş'âr buyurulması tezekkür kılındı ol bâbda.

Vahyî, Mustafa Hakî, Seyyid Mehmed es-Sükûtî, Mustafa, Mehmed Gülşen, Tevfik

IST\_MFT\_MSH\_DFT02\_01741\_0001-0054

**Selimiye Dergâhı şeyh nâibi Esad Efendi'nin görevinden ayrılmasıyla dergâh muhassasatındaki hakkının ödenmesi.**

Fî 17 L. sene 1337 / Fî 16 Temmuz sene 1335 / - / - / - / Sîret / - / 83 / Fî 17 minhü [16 Temmuz 1919] / Fî 16 minhü

Müzekkire

Selimiye Dergâh-ı şerîfi şeyh nâibi Esad Efendi'nin vukû'-ı infisâline mebnî dergâh-ı mezkûr muhassasât ve mu'ayyenâtının 1 Haziran sene 1335 târihinden i'tibâren iş'âr-ı ahîre değin tevkîf olunması hakkında Evkâf-ı Hümayûn Nezâret-i celîlesine tezkire-i aliyye tastîr buyurulması fî 21 Haziran sene 1335 târihli ve 76 numaralı müzekkire ile arz olunmuş idi. Bi'l-umûm tekâyâ misilli dergâh-ı mezkûr mu'ayyenâtı üç aylık olarak peşînen Haziran sene-i minhü mâhı ta'yîni dahi verilmiş olduğu bi'l-âhare vukû' bulan ihbârdan anlaşıldığından henüz tesviye olunmayan muhassasâtının Şeyh Esad Efendi'nin infisâli târihi olan 21 Haziran sene-i minhü târihine kadar kıste'l-yevm hesabıyla mûmâ-ileyhe tesviye ve ifâ olunması lâzım geleceğinin nezâret-i müşârun-ileyhâya iş'âr buyurulması bâbında.

Vahyî, Mustafa Hakî, Seyyid Mehmed es-Sükûtî, Mustafa, Mehmed Gülşen, Tevfik

IST\_MFT\_MSH\_DFT02\_01741\_0001-0055

**Eyüp'te Kaşgarî Abdullah Efendi diğer adıyla Murtaza Efendi Dergâhı meşihat ve tevliyetlerine ait tedavül kayıtlarının Evkaf Nezâretinden istenmesi.**

Fî 17 L. sene 1337 / Fî 16 Temmuz sene 1335 / - / - / - / Sîret / - / 82 / Fî 17 minhü [16 Temmuz 1919] / Fî 16 minhü

Müzekkire

Eyüpsultân civârında Kaşgarî Abdullah Efendi nâm-ı diğerle Murtaza Efendi Dergâh-ı şerîfi meşihat ve tevliyet cihetlerinin bidâyet-i tevcihinden i'tibâren tedavül kayıtlarının müsâra'aten ihrâc ve irsâli husûsunun Evkâf-ı Hümayûn Nezâret-i celîlesine iş'âr buyurulması bâbında.

Vahyî, Mustafa Hakî, Seyyid Mehmed es-Sükûtî, Mustafa, Mehmed Gülşen, Tevfik

IST\_MFT\_MSH\_DFT02\_01741\_0001-0056-57

**Eğrikapı'da Hırâmî Ahmed Paşa Zaviyesi şeyhi ve zaviyede bulunan mescidin imam ve hatibi Şeyh Mehmed Ali Efendi'nin vefatıyla yerine, büyük oğlu Şeyh Cemaleddin Efendi'nin vekâleten tayini.**

Fî 10 Şevvâl sene 1337 / Fî 9 Temmuz sene 1335 / - / - / - / Sîret / - / 81 / Fî 15 minhü [14 Temmuz 1919] / Fî 14 minhü

Müzekkire

Eğrikapı hâricinde Seyyid Cemaleddin-i Uşşâkî Hazretlerinin medfûn bulunduğu Hırâmî Ahmed Paşa Zâviyesi şeyhi ve zâviye derûnunda bulunan mescid-i şerîfi imâm ve hatibi Şeyh Mehmed Ali Efendi'nin 25 Mart sene 1335 târihinde vukû'-ı vefâtına binâen inhilâl eden meşîhat ve imâmet ve hitâbet ile cihât-ı sâire-i ilmiyye ve bedeniyenin uhdesine tevcîhi istid'âsına dâir müteveffâ-yı mûmâ-ileyhin kebîr oğlu Cemaleddin Efendi'nin takdîm ettiği arzuhâl üzere zâviye-i mezkûr meşîhat ve cihât-ı sâiresinin der'uhde ve şürût-ı tevcîhiye kayıtları hakkında Meclis-i dâ'iyânemiz ifâdesiyle isti'lâmı havî yazılan tezkire-i aliyye-i cenâb-ı Meşîhat-penâhilerine cevâben Evkâf-ı Hümâyûn Nezâret-i celîlesinden vârid olup havâle buyurulan merbût 13 Ramazan sene 1337 ve 12 Haziran sene 1335 târihli ve 120256 umumî, 77 husûsî numaralı tezkire ve melfûfâtı kırâet ve icâbı müzâkere olundu.

Tezkire ve melfûfâtı müeddâlarına nazaran İstanbul'da Eğrikapı hâricinde kâin merhûm Hırâmî Ahmed Paşa Zâviyesinin yevmî on akçe vazîfe ile şeyh-i zâviye ciheti tarikat-i aliyye-i Şa'bâniyye hulefâsından Salih Efendi niyâbetiyle 19 Rebî'ülâhîr sene 1292 târihinde sagîr Mehmed Ali Efendi'ye ve şehîr yirmi sekiz gurus on para vazîfe ile Eğrikapı hâricinde kâin mescid-i şerîfde imâmet ciheti 9 Safer sene 1312 târihinde zâviyye-i mezkûre şeyhi mûmâ-ileyh Ali Efendi'ye ve mescid-i şerîf-i mezkûra minber vaz'ıyla câmi'-i şerîfe tahvîl etmiş olan merhûm Sabih Ali Efendi Vakfından almak üzere şehîr altı gurus on para vazîfeli câmi'-i şerîf-i mezkûrda hitâbet ciheti 27 Rebî'ülâhîr sene 1312 târihiyle Şeyh Ali Efendi'ye müvecceh olduğu ve yine müşârun-ileyh Hırâmî Ahmed Paşa Vakfından yevmî birer akçe vazîfeli kayyım ve âbkeş ve mûmâ-ileyh Sabih Ali Efendi Vakfından yevmî iki akçe vazîfeli sermahfil devirhân cihetleri 5 Ramazan sene 1310 târihiyle Hasan ve müşârun-ileyh Hırâmî Ahmed Paşa Vakfından yevmî beş akçe vazîfeli müezzin ciheti 5 Cumâdelûlâ sene 1267 târihiyle Mehmed Halid Efendilerin uhdelerinde iken mûmâ-ileyhimden Hasan Efendi'nin cinâyetle mahkûmiyetine ve Mehmed Halid Efendi'nin de vukû'-ı vefâtına binâen cihât-ı ânife usûlen ehline tevcîhine kadar 28 Mart sene 1333 târihinde mûmâ-ileyh Şeyh Ali Efendi'ye vekâleten tevdi' olunduğu Kuyûd-ı Vakfiyye İdâresinden mukayyed olduğu anlaşılmıştır. [0057] Müsted'î Hâfız Cemaleddin Efendi müte'addid şehâdetnâmeler müeddâlarına ve icrâ kılınan tahkîkât-ı mahsûsaya nazaran pederi müteveffâ-yı mûmâ-ileyhin hayatından vefâtına değin bir hayli zaman cihât-ı mezkûre vezâifini gayr-i resmî olarak vekâleten hüsn-i ifâ etmiş ve el-yevm bilâ-terk ifâ etmekte bulunmuş ve bu sûretle gerek meşîhat ve gerek vezâif-i sâire-i mezkûreye iktidârını fi'len isbât etmiş ise de tarikat-i aliyye-i Uşşâkiyye'den bulunan zâviye-i mezkûre meşîhatının tevcîhi bi'l-cümle Uşşâkî dergâhları gibi Kasımpaşa'da kâin Pîr Hüsameddin-i Uşşâkî Hânkâh-ı şerîfi postnişinliğinin inhâsına mütevakıf olduğu Mecliste mukayyed bin iki yüz yirmi târihli fermân-ı âlî-şânı müeyyid 10 Cumâdelûlâ sene 1258 târihli fermân-ı âlî iktizâsından bulunmuş olmasıyla mûmâ-ileyh Cemaleddin Efendi Hânkâh-ı

pîr-i müşârun-ileyhte ikmâl-i seyr u sülûk ederek ahz-ı icâzetle hakkında inhâ vukû'una değin pederi müteveffâ-yı mûmâ-ileyhin uhdesinde asâleten ve vekâleten bulunmakta iken inhilâl eden zâviye-i mezkûre meşihat ve imâmet ve hitâbet ve cihât-ı sâire-i ma'rûzaya kemâ-kân tam vezâif-i mu'ayyene ile zimmetini? ve bilâ-fâsıla ifâ-yı vekâlet etmekte bulunduğu cihetle târih-i vekâletinin pederinin vefâtı târihi olan 25 Mart sene 1335'den i'tibâriyle ol vechile mu'amele-i kuyûdiyye icrâsı tensîb edilmekle sûret-i ma'rûza rehîn-i tasvîb-i sâmi-i cenâb-ı Meşihat-penâhileri buyurulduğu takdîrde müzekkirenin leffiyle Evkâf-ı Hümâyûn Nezâret-i celilesine tezkire-i aliyye tastîr buyurulması bâbında.

Vahyî, Mustafa Hakî, Mustafa, Mehmed Gülşen, Tevfik

IST\_MFT\_MSH\_DFT02\_01741\_0001-0058

**Aksaray'da Olanlar Dergâhı'nın mahzenlerinde birikmiş süprüntü ve pisliklerin temizliğinin yapılmasının şehremanetine bildirilmesi.**

Fî 9 Şevvâl sene 1337 / Fî 8 Temmuz sene 1335 / - / - / - / Sîret / - / 80 / Fî 10 minhü [9 Temmuz 1919] / Fî 9 minhü

Müzekkire

Aksaray'da kâin Olanlar Dergâh-ı şerîfinin alt katı dâiren mâdâr mahzenlerden ibâret olup altı ay mukaddem ta'yîn olunan postnişini Şeyh Safvet Efendi'nin ta'yîninden evvel bir hayli senelerden beri süprüntü ve müzahrafât-ı mezkûr mahzenlere atıldığı ve suyollarının dahi arasında bozulmasıyla derûnuna cereyân eden sularla karıştığı cihetle hâsıl olan ta'affünât sebebiyle gerek dergâh-ı mezkûrda sâkin olanlar ve gerek civârda bulunanlar için sıhhat-i umûmiyye nokta-i nazarından bu halde bırakılması kat'iyen tecvîz edilemeyeceğinden ve esâsen dergâhın hademesi ve hademe tahsîsâtı olmadığı cihetle tarafından tanzîfât-ı mukteziyenin icrâ ettirilmesi mümkün olamayacağından tanzîfât-ı lâzime icrâ ettirilmesi hususunun îcâb eden mahalle iş'ârı hakkında mu'amele-i lâzimenin ifâsı şeyh-i mûmâ-ileyh tarafından bâ-müzekkire ifâde ve beyân olunmuş ve mevsim-i sayfın en şiddetli bir zamanda şu hâlin devamı sıhhat-i umûmiyye nokta-i nazarından câlib-i dikkat ve müstevceb-i mahzûr mevâddan bulunmuş olduğundan ser'ân tathîri hakkında ta'alluku hasebiyle Şehremânet-i aliyyesine tezkire-i aliyye tastîr buyurulması bâbında.

Vahyî, Mustafa, Tevfik

IST\_MFT\_MSH\_DFT02\_01741\_0001-0059

**Çarşamba'da İsmet Efendi Dergâhı meşihatine kendileri tayin edilmesi gerekirken, usulsüz olarak Mustafa Hâki Efendi'nin tayin edildiğine dair, Sıddık ve Nimetullah efendiler tarafından sunulan iddianın, Şûrâ-yı Devlet ve Evkaf Mahkemesine havale edilmesinin nizamın uygun olmaması.**

Fî 6 Şevvâl sene 1337 / Fî 5 Temmuz sene 1335 / - / - / - / Sîret / - / 79 / Fî 10 Şevvâl sene 1337 [9 Temmuz 1919] / Fî 9 Temmuz sene 1335

Müzekkire

Der'aliyye'de Çarşamba civârında kâin merhûm Şeyh İsmet Efendi Dergâh-ı şerîfi meşihat cihetinin bilâ-sebebi nizâmî uhdesinden ref' edildiğinden bahisle Nimetullah Efendi ve evlâd-ı

vâkıftan olmasıyla cihet-i mezkûrenin uhdesine tevcihi lâzım geldiği hâlde Şeyh Mustafa Hâkî Efendi'ye tevcih kılındığı beyânıyla taleb-i ma'deleti mutazammın Sıddık Efendiler tarafından vukû' bulan müsted'âyât ve lede'l-muhâbere Evkâf-ı Hümâyûn Nezâreti makâmından vârid olan tezkire-i cevâbiyye üzerine bu bâbda Meclis-i Meşâyihce vâkı' olacak mütâla'anın inbâsına dâir sebk eden tebliğe cevâben makâm-ı celil-i Fetvâ-penâhîlerinden alınıp Şûrâ-yı Devlete havâle kılınmış olan tezkireye melfûf Meclis-i mezkûrun fi 21 Muharrem sene 1337 ve fi 28 Teşrîn-i evvel sene 1334 târihli ve 48 numaralı müzekkiresinde dermiyân olunan mütâla'a muvâfık-ı usûl ve nizâm olmasına binâen cihet-i mezkûrenin Nimetullah Efendi'den ref'iyle Hâkî Efendi'ye tefvizi hakkında Şûrâ-yı Evkâfca müttehaz karar fesh olunarak ahkâm-ı vakıfnâme ile usûl ve nizâmına tevfiikan islâh-ı mu'âmele olunmak üzere işin el-yevm merci'-i tedkiki olan Meclis-i Meşâyihce tevdî'i Mülkiye ve Ma'ârif Dâiresinden bâ-mazbata ifâde edildiğinden evrâk-ı mevcûdenin takımıyla gönderildiğine dâir vârid olup havâle buyurulan fi 5 Receb sene 1337 ve fi 7 Nisan sene 1335 târihli ve 342257 umûmî 21 husûsî numaralı merbût tezkire-i sâmiyeye binâen icâb-ı maslahat derdest-i tedkik iken Şûrâ-yı Devletin zikrolunan kararından bahisle cihetin uhdesine i'âdesini müsted'î mûmâ-ileyh Şeyh Nimetullah Efendi tarafından takdîm olunan arzuhal "Bu mes'eleye mûte'allik Meclis-i Meşâyih'de bulunan evrâk ile beraber Evkâf Mahkemesine tevdî'i" işâret-i celile-i Meşihat-penâhîleriyle Meclis-i dâ'iyânemiz riyâsetine havâle buyurulmuştur. Evrâk-ı mezkûrenin mahkeme-i mezkûreye tevdî'i her hâlde bir hikmet ve maslahata mebnî olacağı vâreste-i iştibâh olmakla beraber müstağnî-i arz ve îzâh olduğu üzere bi'l-umûm cihâtın tevcih ve azl mu'âmelâtı fi 2 Ramazan sene 1331 târihli Tevcih-i Cihât Nizâmnâmesi ahkâmınca mehâkimden nez' ve Dersââdette Şûrâ-yı Evkâfa ve taşrada imtihan Meclislerine ve bi'l-umûm tekâyâ ve zevâyâya âid cihât-ı ilmiyye ve bedeniyenin tevcih ve azil mu'âmelâtı da fi 6 Şevvâl sene 1336 târihli Meclis-i Meşâyih Nizâmnâmesi mücebince ve Tevcih-i Cihât Nizâmnâmesi ahkâmı tatbik olunmak üzere Meclis-i dâ'iyânemize muhavvel bulunduğundan husûs-ı mebhûsün-anh hakkındaki evrâkın Mahkeme-i Evkâfa havâle buyurulması sırf tevcih ve azil husûsuna ma'tûf ise sâlifü'l-arz tezkire-i sâmiyede mahkî Şûrâ-yı Devlet kararı ve nizâmnâme-i mezkûru ahkâmıyla Mahkeme-i Evkâfın salâhiyetinden hâric ve Meclis-i dâ'iyânemize âid bulunduğu cihetle keyfiyyetin huzûr-ı sâmi-i cenâb-ı Fetvâ-penâhîlerinden bir kere arz ve istizânı tensib edilmekle ol bâbda.

Vahyî, Mustafa Hâkî, Seyyid Mehmed es-Sükûtî, Mustafa, Mehmed Abdülbâkî, Tefvik

IST\_MFT\_MSH\_DFT02\_01741\_0001-0060

**Mevlevîhane Yenikapısı'nda Hacı Mahmud Mescidi meşihatine Ali Hüsameddin Efendi'nin tayin edilmesi sebebiyle, dergâhın muhassasatının kendisine verilmesi.**

Fi 8 Şevvâl sene 1337 / Fi 7 Temmuz sene 1335 / Hüsâm / - / - / Sîret / [Mühür] Ali Hüsameddin / 78 / Fi 18 minhü [17 Temmuz 1919] / Fi 12 minhü

Müzekkire

Mevlevîhâne Yenikapısı hâricinde evkâf-ı mülhakadan Hacı Mahmud Mescid-i şerîfinde tarikat-i aliyye-i Şa'bâniyye usûl ve ezkârı icrâsına meşrût meşihat cihetinin fi 12 Receb sene 1337 târihinden i'tibâren tarikat-i aliyye-i mezkûre meşâyihinden Ali Hüsameddin Efendi uhdesine tevcih buyurulup berât-ı âlisi de istihsâl edilmiş olduğundan târih-i mezkûrdan i'tibâren

dergâh-ı mezkûr muhassasâtının şeyh-i mûmâ-ileyhin bâlâya mevzû' mührünün tatbîkiyle mûmâ-ileyh nâmına itâsı zımında işbu müzekkire İstanbul vilâyeti Evkâf Müdîriyyet-i aliyesine takdîm kılındı.

Vahyî, Mustafa Hakî, Seyyid Mehmed es-Sükûtî, Mustafa, Mehmed Abdülbâki, Tevfik

IST\_MFT\_MSH\_DFT02\_01741\_0001-0061

**Seyyid Nizameddin ve Seyyid Seyfullah dergâhları meşihatının, evlatlarından Seyyid Kenan ve Seyyid Turhan efendilere tevcihine dair verilen karara, Meclis azasından Ali Efendi'nin muhalif rey kullanarak; "Meclis şeriatı aykırı karar alıyor" şeklinde ağır ithamlarda bulunması sebebiyle, Meclis-i Meşâyih heyetinin, bir daha kendisiyle çalışılmayacağını meşihat makamına arzemesi.**

Fî 6 Şevvâl sene 1337 / Fî 5 Temmuz sene 1335 / - / - / - / Sîret / - / 77 / Fî 8 minhü [5 Temmuz 1919] / Fî 7 minhü

Müzekkire

Kutbü'l-ârifin Seyyid Nizameddin ve Seyyid Seyfullah efendiler hazerâtı dergâh-ı şerîfleri meşihat cihetlerinin evlâd-ı müşârun-ileyhimâdan oldukları hükmen sâbit olan sagîrân Seyyid Kenan ve Seyyid Turhan efendilerin uhdelerinde kemâ-kân bi'l-asâle ibkâsıyla nâib-i mansûbları Şeyh Adli ve Mustafa efendilerin mezkûr niyâbetlerde ibkâları hakkında a'zâdan Şeyh Ali Efendi'nin muhâlif-i re'y bulunmasına karşı ittifâk-ı ârâ ile verilen kararın selh-i Ramazan sene 1337 târihli mazbatasına Şeyh Ali Efendi'nin ilsâk etmek istediği esbâb-ı muhâlefeti mutazammın pek muassal varakanın esbâb-ı hilâfî beyândan ibâret olmayup müdde'iler tarafından verilecek Meclis aleyhinde bir iddi'ânâme mâhiyetinde olduğu cihetle mazbatamızın zîrine ilsâkı muhâlif-i usûl görülmekle ancak hülâsasını imzâsı mahalline yazabileceği ve bir de mezkûr varakada muharrer (derûn-ı mazbatada muharrer karâr-ı vâkı' min külli'l-vücûh şer' ve nizâma muhâlif olmağla Meclis-i mezkûrun salâhiyeti hâricinde bazı şeyleri hâvî bulunduğu) ibâresinin ve emsâli cümlelerin kat'iyen kabûl olunamayacağından bu sözleri geri alması ve almadığı takdirde çünkü lehü'l-hamd hey'et-i dâ'iyânemiz kâffe-i mukarrerâtında şer'-i şerîf ve nizâmâtı rehber bilerek mu'âmelâtımızın hakîkatine kâni' ve salâhiyet-i şer'îye ve kânûniyyemizi müdrik bulunduğu-muzdan kendisiyle kat'iyen teşrîk-i mesâ'î bizim için dâire-i imkândan hâric kalacağını mûmâ-ileyhe tefhîmi karâr-gîr olarak keyfiyyet efendi-i mûmâ-ileyhe tebliğ olundukda sözlerinden bir kelimesini geri almayacağına dâir evvelki ifâdesinde musır bulunduğunu îmâen Meclisi terk ettiğinden ber-vech-i ma'rûz hey'et-i dâ'iyânemiz mûmâ-ileyh ile ba'demâ teşrîk-i mesâ'î edemeyeceğini huzûr-ı sâmi-i cenâb-ı Meşihat-penâhîlerine arza mecbûriyet hâsıl olmağla ol bâbda.

Vahyî, Mustafa Hakî, Seyyid Mehmed es-Sükûtî, Mustafa, Mehmed Abdülbâki, Tevfik

IST\_MFT\_MSH\_DFT02\_01741\_0001-0062

**Askerlerden tahliye edilen Selimiye Dergâhı'nın şeyh nâibi Esad Efendi'nin görevini terk etmesiyle, yerine yeni nâib tayin edilinceye kadar dergâha zararlı şahısların girmesinin önlenmesi.**

Fî 20 Ramazan sene 1337 / Fî 19 Haziran sene 1335 / - / 99 / - / 218 / Sîret / 76 / Fî 22 minhü [21 Haziran 1919] / Fî 21 minhü



## Müzekkire

İşgâl-i askerî altına alınarak bu kere tahliye edilen Selimiye Dergâh-ı şerîfinin şeyhi ve bekçisi bulunmamasından dolayı bazı esâfil ve eşhâs-ı şerîreye melce olduğundan bahisle bu hâl-i esef-âvere nihâyet verilmesi için iktizâ-yı hâlin ifâsı Polis Müdüriyeti ifâdesiyle Üsküdar Mu-tasarıflığının 19 Nisan sene 1335 târihli tezkiresinde iş'âr olunduğundan sûret-i iş'âra nazaran ifâ-yı iktizâsına müsâ'ade-i atebe-i Meşihat-penâhîleri şâyân buyurulmasına dâir Evkâf-ı Hümâyûn Nezâret-i celîlesinden vârid olup havâle buyurulan 11 Haziran sene 1335 târihli 120214 umûmî ve 74 husûsî numaralı merbût tezkire mündericâtına nazaran dergâh-ı mezkûr şeyh nâibi Mehmed Esad Efendi'nin vazîfesini tamamen terk ettiği anlaşıldığından niyâbet-i mezkûreden azli hakkında takdîm kılınan 18 Haziran sene-i minhü târihli ve 72 numaralı müzekkire tasvîb-i sâmi-i cenâb-ı Fetvâ-penâhîlerine iktirân etmiş ve yerine diğer münâsibinin intihâbına âid mu'âmele derdest bulunmuş olmakla beraber neticeleninceye değin dergâhta her ne kadar bekçi sıfatıyla bir kimse bulundurulması esbâbına dahi teşebbüs olunmuş ise de şeyh nâibi dergâha yerleşinceye değin zabıta tarafından dahi takayyüdât-ı mahsûsa icrâsı her vechile münâsib olacağından ol bâbda me'mûrîn-i âidesine teblîgât ifâ buyurulmasının Dâhiliyye ve cereyân-ı mu'âmeleden bahisle mezkûr dergâhın mu'ayyenât ve muhassasâtından mukaddemâ şeyh nâibine tefrik edilmiş olan mikdârının 1 Haziran sene 1335 târihinden itibaren iş'âr-ı ahîre kadar mevkûf tutulması husûsunun dahi Evkâf-ı Hümâyûn Nezâret-i celîlelerine iş'âr buyurulması tezekkür kılındı ol bâbda.

Vahyî, Mustafa Hakî, Mustafa, Ali, Tevfik

IST\_MFT\_MSH\_DFT02\_01741\_0001-0063

**Eyüp'teki Özbekler Tekkesi'nin, Harbiye Nezâreti Levazım İdâre-i Umûmiyyesi tarafından işgal edilen üç odasının tahliye edilmesi.**

Fî 19 Ramazan sene 1337 / Fî 18 Haziran sene 1335 / - / - / - / Sîret / - / 75 / Fî 19 minhü [18 Haziran 1919] / Fî 18 minhü

## Müzekkire

Eyüpsultân civârında kâin Özbekler Tekkesinin üç odası Harbiye Nezâret-i celîlesi Levâzım İdare-i Umûmiyyesi tarafından işgâl edilmiş olması binâsı ahşab olan tekkenin harâbîsini mücib olmağla beraber şart-ı vâkıf mücebince kesîr bulunan dervîşânın mütebâkî birkaç hücreye sığışmaya mecbûr kalmaları dahi hıfzı's-sihha nokta-i nazarından mahzûru müstevceb bulunduğu Tekâyâ Müfettişliğinden i'tâ edilen raporda ifâde ve beyân edilmiş ve şu hâlin devamı gayr-i câiz olduğu müstağnî-i arz ve îzâh bulunmuş olduğundan hasbe'l-mevsim sıcakların istidâdıyla bir gûne hastalık zuhûruna meydan bırakılmaksızın hemen mezkûr üç odanın tahliyesi esbâbının istikmâli zımında Evkâf-ı Hümâyûn Nezâret-i celîlesine tezkire-i aliyye şeref-tastîr buyurulması tezekkür kılındı ol bâbda.

Vahyî, Mustafa Hakî, Seyyid Mehmed es-Sükûtî, Mustafa, Tevfik

IST\_MFT\_MSH\_DFT02\_01741\_0001-0064A

**Eyüp'teki Özbekler Tekkesi'nin Harbiye Nezâreti Levazım İdâre-i Umûmiyyesi tarafından işgal edilen üç odasının tahliyesi ve gerekli temizliğinin yapılmasına dair müfettiş raporu.**

Bâb-ı Fetvâ Meclis-i Meşâyih

Meclis-i Meşâyih-i Kirâm Riyâset-i celîlesine

Eyüpsultân civârında Özbekler Kalenderhânesi derûnunda üç odanın cihet-i askerîden işgal edildiği ve bu işgâlin Dergâh-ı şerîfin harâbîsini müstelzem bulunduğu cihetle hücûrât-ı mezkûrenin tahliyesi bu def'a vukû' bulan teftîşâtım esnâsında postnişîni Şeyh Mehmed Behlül Efendi tarafından talep edilmesi üzerine tedkik-i keyfiyyet eylediğimde Harbiye Nezâret-i celîlesi Levâzım-ı Umûmiyyesi tarafından Eyüpsultân'da kâin Salih Mahmud Paşa Câmi'-i şerifi erzâk anbarı ve dergâh-ı mezkûrun üç odası da mezkûr anbarın kalem odası ittihâz edildiği ve ber-vech-i ma'rûz harâbî-i dergâha sebep olmasıyla her hâlde tahliyesi muktezî bulunduğu anlaşıldığından icâbı teemmül olunmak ve bir de vaz'-ı aslîsi nezâfet ve letâfet ile müesses bulunan dergâhların emr-i tanzîfinde fevka'l-âde ihtimâm lâzım geldiği hâlde dergâh-ı mezkûrun gerek hücûrâtı ve gerek hey'et-i umûmiyye-i dâhiliyesi son derecede mülevves bir hâlde bulunduğundan bu bâbda tathîrât-ı mukteziye icrâsı için postnişîn efendinin Meclis-i âlîlerine celbiyle tenbîhât-ı lâzime icrâ buyurulmak üzere işbu rapor bi't-tanzîm takdîm kılındı.

Fî 11 Haziran sene 1335 [11 Haziran 1919]

[Mühür:] Meclis-i Meşâyih Müfettişliği

[İmzâ]: Fahreddin

Metn-i raporda arz ve beyân eylediğim işgâl-ı askerînin hıfzı's-sıhha nokta-i nazarından dahi mahzûrdan sâlim olmadığı gibi hücûrât-ı meşgûlenin sekenesi mütebâkî hücrelere taksîm edilmiş bulunduğunu ayrıca arz ederim.

Müfettiş Fahreddin

IST\_MFT\_MSH\_DFT02\_01741\_0001-0064

**Şeyh Ebülvefâ Türbesi'nin Münir Efendi'den münhal türbedarlık vazifesine Ahmed Efendi'nin tayini.**

Fî 19 Ramazan sene 1337 / Fî 18 Haziran sene 1335 / - / - / - / Sîret / - / 74 / Fî 19 minhü [18 Haziran 1919] / Fî 18 minhü

Vesîka Taraf-ı Riyâsetten

Şeyh Ebülvefa -kuddise sırruhu'l-a'lâ- türbe-i şerîfesinin Münir Efendi'den münhal türbedârlığına tarîkat-i aliyye-i Şa'bâniyye hulefâsından Ahmed Efendi, Meclis-i Meşâyih kararı ve işâret-i aliyye-i hazret-i Fetvâ-penâhî ile ta'yîn buyurulmuş olmağla vazîfesine mübâşeret etmek üzere işbu vesîka mûmâ-ileyhe i'tâ kılındı.

Tevfik

IST\_MFT\_MSH\_DFT02\_01741\_0001-0065

**Eyüp'teki Özbekler Tekkesi'nin temizliğine dikkat edilmesi ve uygunsuz kişilerin dergâha girip çıkmasına engel olunması.**

Fî 19 Ramazan sene 1337 / Fî 18 Haziran sene 1335 / - / - / - / Sîret / - / 73 / Fî 19 minhü [18 Haziran 1919] / Fî 18 minhü

Müzekkire

Eyüpsultân'da Yedinci Merkez-i Tekâyâ Bulunan İzzet Mehmed Paşa Dergâh-ı şerîfi Postnişînlğine

Merkezleri dâhilinde kâin Özbekler Kalenderhânesi sekenesinden iki şahs-ı leîmin geçen gece tekkeye âlüfte getirmeye mücâsereti görölerek polis ma'rifetiyle def' ettirildiği ihbâr olunması üzerine keyfiyyet gönderilen müfettiş efendi ma'rifetiyle bi't-tahkîk tebeyyün etmekle eşhâs-ı merkûme hemen tekkeden tard ve ihrâc ettirilmiştir. Tekkenin derûn [ve] birûnu şâyân-ı hayret bir derecede mülevves bulunduğu müfettiş-i mûmâ-ileyhin meşhûdu olduğu bâ-rapor beyân edilmiştir. Ber-vech-i muharrer vukû'ât ve adem-i nezâfet gibi her iki hâlin ne derece mûcib-i esef ve müstelzim-i tevbih bir keyfiyyet olduğu müstağnî-i îzâh idiğinden evveleminde kemâl-i sür'atle tekkenin tathîriyle beraber emr-i ehemmi-i nezâfete fevka'l-âde dikkat ve i'tinâ etmelerinin mezkûr Kalenderhâne şeyh vekîli ile sekenesine şiddetle tenbîhi ve nihâyet üç gün zarfında muvâfık-ı matlûb bir sûrette tathîrât ve tanzîfât icrâ etmedikleri halde haklarında icâb eden mu'amele icrâ olunmak üzere neticenin inbâsı ve ba'demâ Kalenderhâneye gelip gidecek keşânın hüsn-i hâl ashâbından olmalarının tahkîk ve tedkiki husûsunda tatbiki lâzım gelen usûlün şeyh vekîliyle bi'l-istişâre kararlaştırılarak şiddetle tatbikine taraf-ı şerîflerinden dahi kemâ-yelik dikkat ve i'tinâ olunarak bu misilli ahvâl-i müessife vukû'una meydan bırakılmaması ve'l-hâsıl gerek orada ve gerek merkez dâhilinde bulunan sâir tekâyâ ve zevâyâda nizâmnâme ve ta'lîmât-nâmeler ahkâmının tamamıyla tatbikiyle tekkelerin şuûn-ı umûmiyyelerine dâir raporların muntazaman Meclis'e irsâli ve işbu müzekkire mündericâtının mülhakât tekâyâ meşâyihine dahi tebliği lüzûmu Meclis kararıyla beyân olunur efendim.

Tevfik

IST\_MFT\_MSH\_DFT02\_01741\_0001-0066

**Askerlerden tahliye edilen Selimiye Dergâhı'nın şeyhi Mehmed Hidayet Efendi'nin nâibi olan Kelâmî Dergâhı şeyhi Esad Efendi'nin azledilmesi ve yerine münasip bir zatın tayini.**

Fî 19 Ramazan sene 1337 / Fî 18 Haziran sene 1335 / - / - / - / Sîret / - / 72 / Fî 19 minhü [18 Haziran 1919] / Fî 18 minhü

Müzekkire

Seferberlik dolayısıyla işgâl-i askerî altına alınarak bu kere tahliye edilmiş olan Selimiye Dergâh-ı şerîfinin hâlî bırakılmış olmasından bazı esâfil ve eşhâs-ı şerîreye melce olduğundan bahs ile bu hâl-i esef-âvere nihâyet verilmesi için müsâra'aten iktizâ-yı hâlin ifâsı Polis Müdüriyyeti ifâdesiyle Üsküdar Mutasarrıflığının 19 Nisan sene 1335 târîhli tezkiresine atfen iktizâsının ifâsı hakkında Evkâf-ı Hümâyûn Nezâret-i celîlesinden vârid olup havâle buyurulan 11 Haziran sene 1335 târîhli ve husûsî yetmiş dört numaralı tezkire kırâet ve icâbı müzâkere olundu.

Dergâh-ı mezkûr meşîhat ciheti bi'n-niyâbe uhdesinde bulunan Mehmed Hidayet Efendi'nin nâibi Kelâmî Dergâhı şeyhi Mehmed Esad Efendi'nin orada ikâmet etmeyip İstanbul'daki dergâhında ikâmet ettiği cihetle ta'yîninden beri vazîfe-i niyâbeti bi-hakkın îfâ etmemekte olduğu gibi bu kere tamamen terki tezkire-i mezkûre mündericâtından anlaşıldığından niyâbet-i mezkûrede bekâsı câiz olamayacağından dâimâ orada bulunarak vazîfesini kemâ hiye hakkuhâ îfâ edecek münâsib bir nâib ta'yîn olunmak üzere mûmâ-ileyhin niyâbetten azli tezekkür edilmekle karîn-i tasvîb-i sâmi-i cenâb-ı Meşîhat-penâhîleri buyurulduğu hâlde müzekkire-i dâ'iyânemizin işâret-i aliyye-i cenâb-ı Fetvâ-penâhîleriyle tevşîh buyurulması bâbında.

Vahyî, Seyyid Mehmed es-Sükûtî, Mustafa, Tevfik

IST\_MFT\_MSH\_DFT02\_01741\_0001-0067

**Urfa'daki Sâkıbiye Dergâhı şeyhi Sâbir Efendi'nin vefatıyla, yerine Seyyid İbrâhim Efendi b. Seyyid Mehmed Efendi'nin tayini.**

Fî 26 Şa'bân sene 1337 / Fî 27 Mayıs sene 1335 / - / - / 203 / Sîret / Urfa'da Sâkıbiye Tekkesi meşîhatine dâir / 71 / Fî 3 Ramazan sene 1337 [2 Haziran 1919] / Fî 2 Haziran sene 1335

Müzekkire

Nefs-i Urfa kasabasında kâin Sâkıbiye Dergâh-ı şerîfi postnişîni Şeyh Sâbir Efendi'nin üç yüz otuz beş sene-i mâliyesinde vukû'-ı vefâtına mebnî inhilâl eden dergâh-ı mezkûrun şehri yüz seksen guruş vazîfe ile meşîhat ve kırk beş guruşla meşîhate meşrût imâmet ve nezâret ve elli guruşla beher gün hatm-i şerîf icrâsıyla akabinde du'âhânlık cihetlerinin mukayyed vakfiyesinde muharrer şürûta tevfiikan mesbûku'l-imtihân Seyyid İbrahim Efendi ibn-i es-Seyyid Mehmed Efendi uhdesine tevcih olunduğuna dâir Urfa Encümen-i Meşâyihinden bi't-tanzîm Meclis-i dâ'iyânemiz riyâsetine mürsel 13 Nisan sene 1335 târihli mazbata ve melfûfu vakfiye sûreti kıraet ve tedkik olundu.

Meşîhat-i mezkûre cihetinin müseccel vakfiye mücebince Kerkük'te Talebânî Hânkâhı postnişînlerinin intihâbıyla tevcihi meşrût olup mûmâ-ileyh Seyyid İbrahim Efendi ber-müceb-i şart-ı vâkıf müntahab olduğu ve uhdesinde bulunan Hindiyân Tekkesi meşîhatinden keff-i yed eylediği ve mârru'l-arz Sâkıbiye Dergâhı meşîhat ve cihât-ı sâiresi şimdiye kadar berâta rabt olunmaksızın ber-vech-i meşrûtiyet Talebânî Dergâhı postnişînliğinin inhâsıyla tevcih olunup hizmetleri mu'attal kalmadığı netîce-i tedkikâttan müstebân olmasına ve tevcih-i vâkı' şart-ı vâkıfa ve ahkâm-ı nizâmiyyeye muvâfık görölmesine binâen tasdik edilmekle rehîn-i tasvîb-i sâmi-i cenâb-ı Meşîhat-penâhîleri buyurulduğu takdîrde mu'âmele-i mukteziyye icrâ ve lâzım gelen berât-ı âlî tastîr ve isrâ olunması husûsunun işbu müzekkire ve merbût mazbata ve vakfiye sûretlerinin leffiyle bâ-tezkire-i aliyye Evkâf-ı Hümâyûn Nezâret-i celîlesine iş'âr buyurulması bâbında.

Vahyî, Mustafa Hakî, Seyyid Mehmed es-Sükûtî, Mustafa, Ali, Mehmed Abdülbâki, Tevfik

IST\_MFT\_MSH\_DFT02\_01741\_0001-0068

**Çarşamba'da Murad Molla Dergâhı Kütüphanesi'nden daha önce hâfız-ı kütüb Hacı Hazmi Efendi tarafından, Müessesât-ı İlmiyye-i Vakfiyye ve Mebâni-i Hayriyye idarelerine gönderilen altı sandık kitabın kütüphaneye iadesi.**

Fî 26 Şa'bân sene 1337 / Fî 27 Mayıs sene 1335 / - / Müzekkire 387 / 182 / Sîret / Murad Molla Dergâhı Kütüphânesi hakkında / 70 / Fî gurre-i Ramazan sene 1337 [31 Mayıs 1919] / Fî 31 Mayıs sene 1335

Müzekkire

Çarşamba'da kâin Murad Molla Dergâh-ı şerîfi derûnundaki kütüphanenin Hâfız-ı kütüb-i evveli Hoca Hazmi Efendi tarafından mezkûr kütüphanede mevcûd kitâblardan altı sandık kütüb-i nefîsenin altı ay mukaddem mülgâ Müessesât-ı İlmiyye-i Vakfiyye ve bi'l-âhare Mebânî-i Hayriyye idârelerine nakl olunduğu vukû' ihbâr üzerine keyfiyyet müfettişlik vâsıtasıyla bi't-tahkîk sıhhati merbût rapor müfâdıdan anlaşılmagla kütüb-i mezkûrenin hemen mahalline i'âdesiyle neticesinin ve evvelce esbâb-ı naklinin muvazzahan inbâsı husûsunun bâ-tezkire-i aliyye Evkâf-ı Hümâyûn Nezâret-i celîlesine iş'âr buyurulması tezekkür kılındı ol bâbda.

Vahyî, Mustafa Hakî, Seyyid Mehmed es-Sükûtî, Mustafa, Ali, Mehmed Abdülbâki,  
Tevfik

IST\_MFT\_MSH\_DFT02\_01741\_0001-0069

**Aksaray Sofular Mahallesi'nde Şeyh Alaaddin Dergâhı şeyhi Salih Nazım Efendi'nin vefatı üzerine küçük oğlu Ali Efendi'ye Sofular Dergâhı şeyhi Yusuf Selâhaddin Efendi vekil tayin edildiğinden, dergâhın Ramazâniyye tayinatının kendisine verilmesi.**

Fî 28 Şa'bân sene 1337 / Fî 28 Mayıs sene 1335 / - / - / - / Sîret / [Mühür:] Yusuf Salahaddin / 69 / Fî 28 minhü [29 Mayıs 1919] / Fî 28 minhü

Müzekkire

Aksaray civârında Sofular Mahallesi'nde kâin Şeyh Alaaddin Dergâh-ı şerîfi postnişini Şeyh Salih Nazım Efendi'nin vukû'-ı vefâtına mebnî sagîr mahdûmu Ali Efendi kesb-i iktidâr ve ehliyet edinceye değin Sofular Dergâh-ı şerîfi postnişini Şeyh Yusuf Salahaddin Efendi vekil ta'yîn edilmiş olmasıyla beher sene Hazîne-i Hâssa-i Şâhânedan Ramazâniye olarak dergâh-ı mezkûra ihsân buyurulmakta olan mu'ayyenâtın vekil-i mûmâ-ileyhin bâlâya mevzû' mührüyle i'tâ buyurulması zımnında mercî'-i âlisine işbu müzekkire takdîm kılındı.

Vahyî, Mustafa Hakî, Seyyid Mehmed es-Sükûtî, Mustafa, Ali, Mehmed Abdülbâki,  
Tevfik

IST\_MFT\_MSH\_DFT02\_01741\_0001-0070-71-72

**Konya'da Mevlânâ Dergâhı eski postnişini Abdülhalim Çelebi Efendi ile şimdiki postnişin Veled Çelebi'nin postnişinlik iddiaları hakkında Meclis-i Meşâyihin mütalaası.**

Fî 24 Şa'bân sene 1337 / Fî 24 Mayıs sene 1335 / - / - / - / Sîret / - / 68 / Fî 25 Şa'bân sene 1337 [26 Mayıs 1919] / Fî 25 Mayıs sene 1335

[Müzekkire]

Dergâh-ı Mevlâna -kuddise sırruhü'l-a'lâ- Hazretleri postnişîn-i sâbıkı Abdülhalim Çelebi Efendi tarafından bir sebeb-i şer'î ve kânûniye müstenid olmayarak hükûmet-i sâbıkaca azl ile mağdûr edildiğinden bi'l-bahs makâmına i'âdesi sûretiyle temâdi-i mağdûriyetine nihâyet verilmesi hakkında atabe-i seniyye-i hazret-i Hilâfet-penâhiye takdîm olunup Bâb-ı Fetvâ'ya tevdî' buyurulan isti'tâfnâmeler ile makâm-ı sâmi-i Sadâret-penâhiye bi'l-i'tâ kezâlık Bâb-ı Fetvâya irsâl olunan istidanâme ve makâm-ı âli-i Meşihat-penâhîlerine takdîm ve keşide olunan müte'addid arzuhâl ve telgrafnâmeler ile makâm-ı Hazret-i Mevlânâ postnişînliğinin ancak kendi şu'belere hâs olduğuna dâir tarafdârlarından bir iki çelebi ile galleye müstahık olmayan ba'îdî'n-neseb evlâd-ı inâstan birkaç çelebi tarafından sâbık çelebi Abdülhalim Efendi'nin i'âdesi talep olduğuna istihbâr ettiğinden muhâfaza-i hukûku istirhâmını hâvî postnişîn-i lâhık Veled Çelebi Efendi'nin istid'ânâmesi ve bu husûsa mütedâir tevdî' buyurulan bi'l-cümle evrâk birleştirilerek tedkîk ve mütâlâ'a olundu.

Makâm-ı âli-i Meşihat-penâhîlerine takdîm olunup evrâk-ı mezkûre miyânında mevcûd olan ve beyân-ı mütâlâ'a zımında Meclis-i Meşâyih reis-i esbakı Elif Efendi'ye tevdî' olunan 5 Haziran sene 1326 târihli ve çelebiyândan on sekiz zâtın imzâsını muhtevî istid'ânâme ile aynı meâl ve imzâlar ile reis-i mûmâ-ileyhe irsâl kılınan muhtırada Abdülhalim Çelebi Efendi'nin Konya'daki vazîfe-i meşîhati terk ile ekser evkâtını hâiz olduğu sıfat ve makâma yakışmayacak bir hâlde Dersââdette imrâr etmekte olduğundan azliyle çelebilik makâmına Veled Çelebi Efendi'nin ta'yîni istid'â olunmağla reis-i mûmâ-ileyhin kendi nâmına makâm-ı âli-i Meşihat-penâhîlerine takdîm ettiği takrîrde netice-i mütâlâ'ası olarak Abdülhalim Çelebi Efendi hakkındaki isnâdâtın buraca da şâyi' olduğu ve Veled Çelebi Efendi'nin postnişînliğe [0071] ehliyet ve kifâyeti derkâr bulunduğu dermiyân olunmasına ve mütâlâ'a-i mezkûreden bahisle makâm-ı âli-i Fetvâ-penâhîlerinden taraf-ı sâmi-i Sadâret-penâhiye sebk eden iş'ara binâen lede'l-arz Abdülhalim Efendi'nin azliyle yerine Veled Çelebi'nin ta'yînine irâde-i seniyye şeref-sâdır olmuştur. Çelebi-i lâhık Veled Çelebi'nin mevki' ve makâmıyla gayr-ı mütenâsib ahvâl ve harekâta tasaddî ve evkâf-ı Celâliyye hâsılâtını meşrûnun-lehlerine sarf etmeyerek isrâf ve izâa ettiği gibi Mevlevî Taburu teşkil ederek bir takım fukarâ-yı Mevleviyye'nin çöllerde telef ve perîşân olmalarına bâdî olduğuna ve sâireye dâir ahîran Konya'daki Çelebiyân'dan müte'addid mühür ve imzâyı hâvî gönderilen şikâyetnâme üzerine sebk eden isti'lâma cevâben mahallince icrâ kılınan tahkîkâtı hâvî Konya vilâyet-i aliyyesinden bâ-tahrîrât gönderilen evrâk-ı tahkîkiyye mündericâtıyla mevâdd-ı müştekâ-bihâ te'yîd ve bu misilli ahvâlinde dolayı mûmâ-ileyh Veled Çelebi Efendi'nin makâm-ı âli-i Hazret-i Mevlânâ postnişînliğinde bekâsı câiz olmadığından azli Dâhiliyye Nezâret-i celîlesinden mevrûd tezkirelerle de te'kîd olduğu misilli vilâyet-i mezkûreden muahharan çekilen telgrafnâmede dahi sâbık Çelebi Abdülhalim Efendi'nin makâm-ı Hazret-i Mevlânâ postnişînliğinde bulunduğu müddet zarfında hüsn-i idâresi meşhûd ve meşîhate ehliyet ve kifâyeti Konyaca cümle indinde ma'lûm olduğuna binâen tûl müddet keşmekeşde kalması muvâfık-ı maslahat olmayan postnişînliğe kendisinin i'âdeten ta'yîni ehemmiyetle iş'âr olunmuş ve sâbık ve lâhık çelebi efendiler haklarında Konya'daki evlâd-ı zükûrdan olan Çelebiyân ile Dersââdet ve taşrada kâin Mevlevîhâneler meşâyihinin bir def'aya mahsûs olmak üzere re'yelerine mürâca'at olunarak istihsâl edilen ârâ lede't-tasnîf neticesinde lâhık Çelebi Veled Efendi'nin kazanmış olduğu on iki re'ye karşı sâbık Çelebi Abdülhalim Efendi'nin elli yedi re'ye ile ihrâz-ı ekseriyyet eylediği anlaşılmıştır.

[0072] Îcâb-ı keyfiyyet lede'l-müzâkere bu kere sâbık Çelebi Abdülhalim Efendi lehinde makâmât-ı resmiyye ve gayr-i resmiyyeden tevârüd eden iş'ârât ve müsted'ayâtın şikâyet-i sâbika ile te'âruz etmesi ve reîs-i esbak Elif Efendi'nin şüyû'a müstenid mütâla'anâmesinden başka elde bir vesîka-i mu'tebere bulunmaması mu'âmele-i sâbikanın isâbet ve selâmeti hakkında cây-ı teemmül olmakla beraber ber-minvâl-i ma'rûz tasnîf edilmiş olan ârâ netîcesinde çelebi-i sâbık Abdülhalim Efendi'nin ihrâz-ı ekseriyyet etmiş olmasına nazaran bu bâbda tercîhen iktizâ eden mu'âmelenin îfâsı menût-ı re'y-i âlî-i hazret-i Meşîhat-penâhîleridir ol bâbda.

Vahyî, Mustafa Hakî, Seyyid Mehmed es-Sükûtî, Mustafa, Ali, Mehmed Abdülbâki,  
Mehmed Gülşen, Tevfik, Abdullah.

IST\_MFT\_MSH\_DFT02\_01741\_0001-0073

**Eğrikapı'da Hırâmî Ahmed Paşa Zaviyesi şeyhi ve zaviyedeki mescidin imamı Mehmed Ali Efendi'nin vefatıyla, münhal cihetlerin vekâleten büyük oğlu Şeyh Cemaleddin Efendi'ye tevcihi.**

Fî 24 Şa'bân sene 1337 / Fî 24 Mayıs sene 1335 / - / - / - / Sîret / - / - / Fî 24 minhü [25 Mayıs 1919] / Fî 24 minhü

Müzekkire

67

Eğrikapı hâricinde Seyyid Cemaleddin-i Uşşâkî Hazretlerinin medfûn bulunduğu Hırâmî Ahmed Paşa Zâviyesi şeyhi ve zâviye derûnunda bulunan mescid-i şerîfî imâmı Şeyh Mehmed Ali Efendi'nin 25 Mart sene 1335 târihinde vukû'-ı vefâtına binâen inhilâl eden ciheteyn-i mezkûreteyn ile müteveffâ-yı mûmâ-ileyh uhdesinde bulunan cihât-ı sâirenin uhdesine tevcihi istid'âsına dâir müteveffânın kebîr oğlu Cemaleddin Efendi'nin arzuhâli ve kuyûd-ı lâzimenin ihrâcî zımında yazılıp İstanbul Evkâf ve Kuyûd-ı Vakfiyye müdîriyyetlerinden derkenâr olunan ve Levâzım Müdîriyyetinden verilen müzekkirelerin leffiyle Evkâf-ı Hümâyûn Nezâret-i celîlesinden vârid olup havâle buyurulan 22 Nisan sene 1335 târihli ve husûsî 55 numaralı tezkire kırâet olundu.

Îcâbı lede'l-müzâkere mu'âmeleli evrâk-ı mezkûre mündericâtına nazaran dergâh ve mescid-i şerîf-i mezkûrun meşîhat ve imâmet ve hitâbet cihetleri asâleten ve müezzin ve kayyım ve sermahfil ve devirhân cihetleri tam vazîfe ile vekâleten müteveffâ-yı mûmâ-ileyh Şeyh Mehmed Ali Efendi uhdesinde bulunduğu anlaşılmış ve müsted'î Hâfız Cemaleddin Efendi müte'addid şehâdetnâmeler müeddâlarıyla ve icrâ kılınan tahkîkât-ı mahsûsaya nazaran pederi müteveffâ-yı mûmâ-ileyhin bir hayli zaman ma'zeretine binâen cihât-ı mezkûre vezâifini gayr-i resmî olarak vekâleten hüsn-i îfâ etmiş ve el-yevm îfâ etmekte bulunmuş ise de tarikat-i aliyye-i Uşşâkiyye'den bulunan dergâh-ı şerîf-i mezkûr meşîhatının tevcihi bi'l-cümle Uşşâkî dergâhları gibi Kasımpaşa'da kâin Pîr Hüsameddin-i Uşşâkî Hânkâh-ı şerîfi postnişînliğinin inhâsına mütevakıf olduğu Mecliste mukayyed bin iki yüz yirmi târihli fermân-ı âlî-şânı müeyyid 10 Cumâdelülâ sene 1258 târihli fermân-ı âlî iktizâsından bulunmuş olmasıyla hânkâh-ı pîr-i müşârun-ileyhte ikmâl-i seyr u sülûk ederek ahz-ı icâzetle hakkında inhâ vukû'una değin şimdilik meşîhat ve cihât-ı sâire-i ma'rûzaya kemâ-kân tam vazîfe ile vekâleten ta'yîni ve bilâfâsıla îfâ-yı vekâlet etmekte bulunduğu cihetle târih-i vekâletinin pederinin vefâtı târihinden



i'tibâr olunması tensîb edilmekle rehîn-i tasvîb-i sâmi-i cenâb-ı Meşîhat-penâhîleri buyurulduğu takdîrde mu'âmele-i mukteziyyenin icrâsı ve hitâbet ve cihât-ı sâire-i ma'rûzanın Kuyûd-ı Vakfiyye İdâresinden der'uhde kayıdlarının ihrâc ve inbâsı husûslarının müzekkire-i dâ'iyânemizin ve yine i'âde olunmak üzere evrâk-ı matviyyenin leffiyle Evkâf-ı Hümâyûn Nezâret-i celîlesine tezkire-i aliyye tastîr buyurulması bâbında.

Vahyî, Mustafa Hakî, Seyyid Mehmed es-Sükûtî, Mustafa, Ali, Mehmed Abdülbâki, Gülşen, Tevfik

IST\_MFT\_MSH\_DFT02\_01741\_0001-0074

**Aksaray'da Olanlar Dergâhı eski şeyhinin ailesi tarafından satılan eşyaların geri alınması, dergâhın bir bölümünü kiralayıp dükkân haline getiren kiracı ile dergâhta şeyhin izni olmadan ikamet edenlerin dergâhtan tahliyesi.**

Fî 22 Şa'bân sene 1337 / Fî 22 Mayıs sene 1335 / - / - / - / Sîret / - / - / Fî 24 minhü [24 Mayıs 1919] / Fî 24 minhü

66

Müzekkire

Der'aliyye'de Aksaray'da kâin Olanlar Dergâh-ı şerîfi postnişîni Şeyh Safvet Efendi'nin mürâca'atına binâen Meclis-i dâ'iyânemiz müfettişi ma'rifetiyle icrâ ettirilen tahkîkât neticesinde i'tâ olup merbûtan arz ve takdîm kılınan rapor mündericâtına nazaran dergâhta bir kaç takım âilenin fuzûlî ikâmet etmekte oldukları ve şeyh-i sâbık müteveffâ Hüsnü Efendi veresesı tarafından dergâhın bir kapı dâhilî tahta ile bulunup dükkân şeklinde âhara îcâr edildiği ve dergâha âid birçok eşyâ müteveffâ-yı mûmâ-ileyhin muhallefâtı deyü hafidîne teslim ve bir mikdâr eşyâ da sirkat olunduğu ve semâhhâne müşrif-i harâb olup mûmâ-ileyh Şeyh Safvet Efendi'nin mürâca'atına mebnî Mebânî-i Hayriyye İdâresinden pek az malzeme-i inşâiyye getirilmiş ise de ta'mîrâtı icrâ edilmediği anlaşılmış olduğundan şeyh-i mûmâ-ileyhin rızâsı olmadığı hâlde sâkin olan âileler ile kapı dâhilindeki müste'cirin hemen çıkarılmasına teşebbüs olunarak muhâlefet edenler haklarında ta'kîbât-ı kânûniyye icrâsı ve dergâhın süknâsına mülkiyet iddi'asında bulunan şeyh-i müteveffânın veresesine mahkeme-i âidesine mürâca'at etmeleri Meclisten tefhîm olunmağla tahliyesi için gönderilecek me'mûrun dahi ol vechile beyân-ı keyfiyyetle emr-i tahliyenin dûçâr-ı tehhur edilmemesi ve iki sûretle zâyî' edilmiş olan emvâl-i vakfın aynen veya bedelen istirdâdı hakkında kezâlik turuk-ı kânûniyye'ye tevessül olunması ve mürûr-ı zamân ile daha ziyâde harâbiyete sebep olmamak üzere semâhhânenin müsâra'aten ta'mîr ve termîmi husûslarının bâ-tezkire-i aliyye Evkâf-ı Hümâyûn Nezâret-i celîlesine iş'âr ve sâlifü'l-arz raporun leffen tesyâr buyurulması bâbında.

Vahyî, Mustafa Hakî, Mustafa, Ali, Mehmed Abdülbâki, Gülşen, Tevfik

IST\_MFT\_MSH\_DFT02\_01741\_0001-0075

**Bursa'nın Alipaşa Mahallesi'ndeki Çarşamba Dergâhı şeyhi Ali Efendi ile çocukları Ali Rıza ve Süleyman Hayri efendilerin vefatlarıyla; meşihatın, Bursa'daki Hüsameddin Dergâhı şeyh vekili Dâvud Efendi b. Hacı Hayrullah Efendi'ye tevcihi.**

Fî 21 Şa'bân sene 1337 / Fî 21 Mayıs sene 1335 / - / - / 198 / Sîret / - / - / Fî 21 minhü [22 Mayıs 1919] / Fî 21 minhü

65

Bursa'da Çarşamba Tekkesi Meşihat Ciheti Hakkında Müzekkire

Bursa'da Alipaşa Mahallesi'nde kâin tarikat-i aliyye-i Halvetiyye'den Çarşamba Dergâhı şeyhi Ali Efendi'nin mukaddemâ vukû'ı vefâtıyla meşihat-i mezkûrenin Şeyh Şemseddin Efendi niyâbetiyle sagîr mahdûmu Süleyman Hayri'ye tevcihi Meclis-i idâre-i vilâyetin 14 Şubat sene 1325 târih ve 145 numaralı mazbatasıyla inhâ olunup berât-ı âlîsi vürûd etmeksizin sagîr-i mezbûr kebîr olduğu hâlde 17 Şubat sene 1333 târihinde ve mezbûrun iki yaşındaki oğlu Ali Rıza'nın da 18 Ağustos sene 1334 târihinde vefâtı vukû' bulmağla inhilâl eden ve elde mevcûd ve sicilde mukayyed vakfiyesi olmadığından cihât-i gayr-i meşrûtadan addolunan meşihat-i mezkûre için müsâbaka imtihânı i'lân olunarak tâlibler miyânında yevm-i imtihânda münferid kalan medîne-i mezbûre Hüsameddin Dergâhı şeyh vekili mesbûku'l-imtihân tarikat-i Halvetiyyetü'l-Misriyye meşâyihiinden Cumavî Şeyh Davud Efendi ibn-i el-Hâc Hayrullah'a tevcih edildiğine dâir encümen-i meşâyihiinden tanzîm ve irsâl olunup merbûtan arz ve takdîm kılınan 25 Zilhicce sene 1336 ve 2 Teşrîn-i evvel sene 1334 târihli mazbata lede't-tedkîk mu'âmele-i câriyye ahkâm-ı nizâmiyyeye muvâfık görölmesine ve şeyh-i mûmâ-ileyhin tahsîl-i ulûm ve ikmâl-i seyr u sülûk ettiği celb ve mütâlâ'a olunan icâzetnâmelerden müstebân ve ehliyeti nümâyân olmasına binâen tevcih-i vâki' tasdik edilmekle rehîn-i tasvîb-i sâmi-i cenâb-ı Meşihat-penâhîleri buyurulduğu takdîrde mu'âmele-i mukteziyye icrâ ve berât-ı âlîsi bi't-tasfîr mahalline isrâ olunması husûsunun işbu müzekkire ve merbûtunun leffiyle bâ-tezkire-i aliyye Evkâf-ı Hümâyûn Nezâret-i celîlesine iş'âr buyurulması bâbında.

Vahyî, Mustafa Hakî, Seyyid Mehmed es-Sükûtî, Mustafa, Ali, Tevfik

IST\_MFT\_MSH\_DFT02\_01741\_0001-0076

**Afyonkarahisar'da tarikat-ı Nakşibendiyye'den, Buhara Tekkesi'nin vakfiye suretinin Evkaf Nezâretinden istenmesi.**

Fî 18 Şa'bân sene 1337 / Fî 18 Mayıs sene 1335 / - / - / 190 / Sîret / Karahisâr-ı Sâhib'de Buhara Nakşibendî Tekkesi meşîhati hakkında / 64 / Fî 19 minhü [20 Mayıs 1919] / Fî 19 minhü

64

Müzekkire

Karahisâr-ı sâhib'de kâin Nakşibendî Tekkesi meşihat-i münhalesinin tevcihi hakkında istifsâr-ı mu'âmeleye dâir mahallî encümen-i meşâyihi ri'yâsetinden Meclis-i dâ'iyânemiz ri'yâsetine vârid olup merbûtan arz ve takdîm kılınan tahrîrâtta bahs olunan mezkûr tekkenin vakfiyesi mukayyed ise sûretinin irsâli olmadığı takdîrde Kuyûd-ı Vakfiyye İdâresince mevcûd olan ma'lûmât-ı kaydiyyenin inbâsı husûsunun Evkâf-ı Hümâyûn Nezâret-i celîlesine iş'âr buyurulması bâbında.

Vahyî, Mustafa Hakî, Mustafa, Mehmed Gülşen, Tevfik

IST\_MFT\_MSH\_DFT02\_01741\_0001-0077

**Eyüp'te Kâşgarî Abdullah Efendi diğer adıyla Murtaza Efendi Dergâhı mescidinin müezzinlik, kayyımlik, devirhanlık ve salâ cihetleri mutasarrıfı Bahaeddin Efendi'nin vefatıyla, münhal cihetlerin dergâhın postnişin vekili Şeyh Hasan Fehmi Efendi'ye vekâleten tevcihi.**

Fî 12 Şa'bân sene 1337 / Fî 12 Mayıs sene 1335 / - / - / - / Sîret / - / - / Fî 11 Şa'bân sene 1337 [12 Mayıs 1919] / Fî 12 Mayıs sene 1335

63

Müzekkire

Hazret-i Ebâ Eyyûb el-Ensârî civârında kâin Kaşgârî nâm-ı diğerle Murtaza Efendi Dergâhı Mescid-i Şerîfinin müezzinlik ve kayyım ve devirhân ve salâcılık cihetlerinin mutasarrıfı Şeyh Mehmed Bahaddin Efendi'nin vukû'-ı vefâtına mebnî cihât-ı mezkûre asâleten tevcih olununcaya değin fî 17 Nisan sene 1335 târihinde postnişin vekâletine ta'yîn buyurulmuş olan Şeyh Hasan Fehmî Efendi'nin şimdilik cihât-ı mezkûre vekâletine dahi târih-i mezkûrdan mu'teber olmak üzere ta'yîni tensîb edilmekle tasvîb-i sâmi-i cenâb-ı Meşîhat-penâhîlerine iktirân eylediği hâlde mu'âmele-i kaydiyyenin ifâsı zımnında müzekkirenin mazrûfen Evkâf-ı Hümâyûn Nezâret-i celîlesine irsâl buyurulması bâbında.

Vahyî, Mustafa Hakî, Mustafa, Tevfik

IST\_MFT\_MSH\_DFT02\_01741\_0001-0078

**Mevlevîhanekapısı'nda Tarsûsî Mehmed Efendi Dergâhı'ndaki caminin imamı Mustafa Efendi'nin, dergâhın ve caminin bir kısmına eşyalarını yerleştirmesi ve dergâhı tahliye edememesinden dolayı, kendisine maaş kesim cezası verilmesi.**

Fî 6 Şa'bân sene 1337 / Fî 6 Mayıs sene 1335 / - / - / - / Sîret / Tarsusî Tekkesi imâmı hakkında / - / Fî 10 minhü [11 Mayıs 1919] / Fî 10 minhü

62

Müzekkire

Mevlevîhanekapısı civârında kâin Tarsusî Mehmed Efendi Dergâh-ı şerîfi derûnundaki câmi'-i şerîfin imâmı Mustafa Efendi dergâh hüçûrâtından bazılarıyla câmi'-i şerîfe bazı eşhâs ikâme ve eşyâ vaz'ıyla işgâl ederek edâ-yı salât ve icrâ-yı usûl tarîkine mâni' olduğu vukû' bulan ihbâr üzerine bi't-tahkik anlaşılmış ve tahliyesi için ol bâbdaki ta'lîmâtnâme ahkâmına tevfiikan kendisine tenbîh ve ihtâr müzekkireleri gönderilmiş olduğu hâlde henüz tahliyeden imtinâ' etmekde bulunmuş olmasına binâen mezkûr ta'lîmâtnâmenin yedinci maddesinin üçüncü fıkrası mücebince vazîfe-i şehriyyesinin nisfinin kat'ı iktizâ etmekle ol cihetle icrâ-yı îcâbiyla neticesinin inbâsı husûsunun Evkâf-ı Hümâyûn Nezâret-i celîlesine iş'âr buyurulması tezekkür kılındı ol bâbda.

Vahyî, Mustafa Hakî, Seyyid Mehmed es-Sükûtî, Ali, Tevfik

IST\_MFT\_MSH\_DFT02\_01741\_0001-0079

**Adana'da Hintli Şeyh Murad Tekkesi'nin vakfiye suretinin Evkaf Nezâretinden istenmesi.**

Fî 8 Şa'bân sene 1337 / Fî 8 Mayıs sene 1335 / - / - / 181 / Sîret / - / 61 / Fî 10 minhü [11 Mayıs 1919] / Fî 10 minhü

Müzekkire

Adana Encümen-i Meşâyihinden vukû' bulan talebe mebnî nefis-i Adana'da kâin Hindî Şeyh Murad Tekkesinin vakfiyesi mukayyed ise bir sûret-i musaddakasının ihrâcıyla irsâli ve mukayyed olmadığı hâlde oraca da bir kere taharrî olunmak üzere Defter-i Hâkânî Emânetine tesyâr olunmak üzere işbu müzekkirenin mazrûfen Evkâf-ı Hümâyûn Nezâret-i celîlesine irsâl buyurulması bâbında.

Vahyî, Seyyid Mehmed es-Sükûtî, Mustafa, Ali, Tevfik

IST\_MFT\_MSH\_DFT02\_01741\_0001-0080

**Şeyh Ebülvefâ Türbesi türbedarlarından vefat eden Ahmed Münir Efendi'nin yerine tayin yapılacağından; türbede kaç türbedar olduğu, deruhte kaydı ve maaş miktarlarının Evkaf Nezâretinden istenmesi.**

Fî 10 Şa'bân sene 1337 / Fî 10 Mayıs sene 1335 / - / - / - / Sîret / - / - / Fî 10 minhü [11 Mayıs 1919] / Fî 10 minhü

60

Müzekkire

Der'aliyye'de Şeyh Ebülvefa Hazretleri türbe-i şerîfesi türbedârlarından Ahmed Münir Efendi'nin vukû'-ı vefâtına mebnî inhilâl eden cihetin tâlibleri bulunduğundan türbe-i müşârun-ileyhte kaç türbedârlık var ise der'uhte kayıdlarıyla şart-ı tevcîh ve mikdâr-ı vezâifi kayıdlarının ihrâc ve inbâsı zımında müzekkirenin mazrûfen Evkâf-ı Hümâyûn Nezâret-i celîlesine irsâl buyurulması bâbında.

Vahyî, Mustafa, Ali, Tevfik

IST\_MFT\_MSH\_DFT02\_01741\_0001-0081

**Unkapanı'nda Seyyid Ahmed Buhârî Dergâhı'nın açık ve faaliyette olması hasebiyle, dergâh muhassasâtının verilmesi.**

Fî 9 Şa'bân sene 1337 / Fî 10 Mayıs sene 1335 / Hüsâm / - / - / Sîret / - / - / Fî 9 Şa'bân sene 1337 [10 Mayıs 1919] / Fî 10 Mayıs sene 1335

59

Müzekkire

Unkapanı'nda kâin Seyyid Ahmed el-Buhârî Dergâh-ı şerîfi el-yevm ma'mûr ve küşâde ve derûnunda şeyhi efendi tarafından icrâ-yı ezkâr ve it'âm-ı ta'âm olunmakta idiğinden muhassasâtının it'âsı zımında işbu müzekkire takdîm kılındı.

Vahyî, Mustafa, Tevfik

IST\_MFT\_MSH\_DFT02\_01741\_0001-0082

**Memurlara yapılacak pahalılık zammından tekkelerde ikamet edenlerle meşâyih de faydalandırılmasının Meclis-i Mahsûs-ı Vükelâya arz edilmesi.**

Fî 29 Receb sene 1337 / Fî 30 Nisan sene 1335 / - / - / - / - / 58 / Fî 7 Şa'bân sene 1337 [8 Mayıs 1919] / Fî 7 Mayıs sene 1335

Müzekkire

Dersaâdet ve taşrada mevcûd tekâyâ ve zevâyâdan bir kısmına Hazîne-i Evkâftan bir mikdâr erzâk muhassas olup onunla hem şeyh âileleri ve hem de müridân alâ kadri'l-îmkân i'âşe olunagelmekte iken harb-i umûmî dolayısıyla erzâkın şeyh efendilerle âileleri aded-i nüfûsuna göre pek cüz'î bir mikdâr verilmek usûl ittihâz edilmiş ve pirinç yerine en âdî bulgur, yağ yerine pek âdî zeytin yağı verilmek aynen i'tâsından sarf-ı nazar edilerek kıyyesine altı gurus on para bedel verilmektedir. Esâsen kalîl olan mu'ayyenâtın bu sûretle tenkîsi meşâyihin ailelerini idare etmeyip hele mukâbele-i şerîfe günleri gelen müridânı it'âm imkân haricinde kalmış ve şu hâl meşâyih-i dâ'iyânını her sınıf ahâlîden ziyâde muzâyakaya ducâr ettiği gibi bazılarını isticlâb-ı erzâk-ı mukaddere için vazîfe-i mukaddeselerini terke mecbûr etmiştir. Meşâyih-i mûmâ-ileyhim şu hâl-i esef-iştimalî mükerreren Evkâf-ı Hümâyûn Nezâret-i celîlesine arz ve tehvîn-i ihtiyâclarını istirhâm eyledikleri ve birkaç defa da Meclis-i dâ'iyânemizden ol bâbda takdîm kılınan müzekkireye binâen makâm-ı âlî-i Meşihat-penâhîlerinden nezâret-i müşârun-ileyhâya tezkire tastîr buyurulduğu hâlde semere hâsıl olmamıştır.

Ahîran hiç olmazsa me'mûrîn ve müstahdemîn-i devlet haklarında tatbîk olunan bahalılık zammında kendilerinin dahi istifâde ettirilmesi istirhâmını hâvî Dersaâdet ve taşrada bulunan bi'l-umûm meşâyih nâmına merâkiz-i tekâyâ meşâyihî efendilerin makâm-ı fehâmet-ittisâm-ı Meşihat-penâhîlerine takdîm ettikleri mahzar üzerine Meclis-i dâ'iyânemiz kararıyla şeref-tastîr buyurulan tezkire-i aliyye-i nezâret-i müşârun-ileyhâdan gelen ve merbûtan arz ve takdîm kılınan 8 Nisan sene 1335 târihli tezkire-i cevâbiyede: Dergâh ve tekâyânın muhassasâtı şahsa âid vazîfe mâhiyetinde olmayıp âid olduğu tekâyâ fukarâsının ta'âmiyyesi olmasına mebnî şimdiye kadar i'tâ edilen tahsîsât-ı fevka'l-âdelerden istisnâ edildikleri gibi bu defa da bahalılık zammında bi't-tabi' nazar-ı dikkate alınmadıkları ve bu cihetten tervîc-i iş'âra da bütçenin müşâ'id olmadığı ve ancak şeyh efendilerin şahıslarına âid vazîfeleri bulunduğu takdîrde bu gibi muhassâsatın emsâli miyânında zamdan istifâdeleri tabiî bulunduğu beyân edilmiştir. Devlet-i ebed-müddet-i Osmâniyye'de meşâyih ve dervîşânın sûrî ve ma'nevî vezâif-i âliyyeleri mine'l-kadîm selâtîn-i izâm -nevverallâhu merâkidehum- hazerâtı ve ekâbir-i ümmet taraflarından enzâr-ı takdîre alınarak onların terfihleri emrinde nice emvâl ve nukûd-ı vakf edildiği müstağnî-i izâh olup bu sınıf-ı dâ'iyânî böyle emsâli nâ-mesbûk galâ zamanında şimdiye kadar her türlü tahsîsât-ı fevka'l-âdeden mahrûm bırakan nezâret-i müşârun-ileyhâya bahalılık zammından mahrûmiyetlerini dahi o esâsa ibtinâ ettirmekte olması nezd-i dekâyık-vefd-i cenâb-ı Meşihat-penâhîlerinde karîn-i kabûl olamayacağı i'tikâdındayız zamdan istifâde edebilecekleri iş'âr olunan ma'âşât-ı zâtiyye bahsine gelince onda bir tekke şeyhinin ma'âş-ı zâtîsi olmayıp olanlar da yirmiden yüz elli gurusu kadar mikdâr içinde cüziyyâtan ibâret bulunduğundan mebhûsün-anh ma'âşâtın istifâde imkânı olmadığı ve mûmâ-ileyhimin muzâyaka ve perîşânî-i ahvâlî hükûmet-i seniyyenin re'fet ve merhametine şâyân bir dereceye geldiği ve kendilerinin

bir çâre-i halâs imkânı olmadığı arz ile terfih-i hâlleri zımnında şân-ı merâhim-nişân-ı saltanat-ı seniyyeye yakışan her ne mu'âmele lâzım ise biran evvel icrâsı husûsunun Meclis-i Mahsûs-ı Vükela-yı Fihâmda müzâkere buyurulmasını istirhâm eyleriz ol bâbda.

Vahyî, Mustafa Hakî, Seyyid Mehmed es-Sükûtî, Mustafa, Ali, Mehmed Abdülbâki, Tefvik

IST\_MFT\_MSH\_DFT02\_01741\_0001-0083

**Sultan Selim Camii civarında Cebecibaşı Mahallesi'nde Yanyalı Hacı Mustafa İsmet Efendi Dergâhı vakfiye suretinin Evkaf Nezâretinden istenmesi.**

Fî 20 Receb sene 1337 / Fî 22 Nisan sene 1335 / - / - / - / Sîret / - / 57 / Fî 25 minhü [26 Nisan 1919] / Fî 26 minhü

Müzekkire

İstanbul'da Sultân Selim Câmi'-i şerîfi civârında Cebecibaşı Mahallesi'nde kâin Yanyavî el-Hâc Mustafa İsmet Efendi Dergâh-ı şerîfinin vakfiyesi makâmında Kuyûd-ı Vakfiyye Kaleminde mukayyed 25 Rebî'ülevvel sene 1291 târihli huzûr-ı i'lâm-ı şer'îsinden başka mevcûdiyeti haber verilen vakfiyesinin mütâla'asına lüzûm görüldüğünden kaydından bir sûret-i musaddakasının ihrâcıyla serî'an irsâli hakkında Evkâf-ı Hümâyûn Nezâret-i celîlesine tezkire-i aliyye tastîr buyurulması tezekkür kılındı ol bâbda.

Mustafa Hakî, Seyyid Mehmed es-Sükûtî, Mustafa, Ali, Mehmed Abdülbâki, Tefvik

IST\_MFT\_MSH\_DFT02\_01741\_0001-0084

**Manisa'nın Niflizâde Mahallesi'nde Uşşâkî Tekkesi meşihatine tayinini talep eden Şeyh Abdi Dede'nin mahallinden imtihanının yapılarak bildirilmesi.**

Fî 20 Receb sene 1337 / Fî 22 Nisan sene 1335 / - / Kırmızı 38 / 157 / Sîret / - / 56 / Fî 25 minhü [26 Nisan 1919] / Fî 26 minhü

Müzekkire

Manisa'da Uşşâkî Tekkesi meşihat cihetinin uhdelerine tevcihîni istid'â eden Şeyh Abdî Dede ve Şeyh Hâfız Abdülkadir efendilerin istid'ânâmeleriyle ol bâbdaki vakfiye ve evrâk-ı sâirenin leffîyle istifsâr-ı mu'âmeleyi mutazammın Manisa Müftülüğünden vârid olup havâle buyurulan 1 Nisan sene 1335 târihli ve 5 numaralı arıza ve melfûfâtı mütâla'a ve icâbı müzâkere olundu.

Sâlifü'z-zıkr vakfiye mündericâtına nazaran Manisa'da Niflizâde Mahallesi'nde kâin Uşşâkî Tekkesi meşihat ciheti Pîr Hüsameddin-i Uşşâkî Hazretleri Hânkâh-ı şerîfi postnişinlerinin re'y ve ma'rifetleriyle tevcih olunması meşrût cihâttan olduğu anlaşılmış ve müsted'ilerden Şeyh Abdi Dede Efendi mezkûr hânkâh postnişini efendi tarafından inhâ edilmiş olmasına binâen nizâmnâme ahkâmına tevfikân mahallî encümen-i meşâyihince bi'l-imtihan ehliyeti tebeyyün ettiği hâlde münhal meşihatın mûmâ-ileyhe tevcihi hakkında mu'âmele-i mukteziyyenin ifâsı lâzım geleceğinin cevâben iş'âr ve melfûfât-ı mezkûrenin leffen i'ade ve tesyâr buyurulması tezekkür kılındı ol bâbda.

Mustafa Hakî, Seyyid Mehmed es-Sükûtî, Mustafa, Ali, Mehmed Abdülbâki, Tefvik

IST\_MFT\_MSH\_DFT02\_01741\_0001-0085

**Vefat eden Şeyhülislam Cemaleddin Efendi'nin cenazesi Cağaloğlu'nda Said Molla Beyefendi'nin konağından kaldırılacağı için, şeyh ve dervişlerin özel kıyafetleriyle cenazede hazır bulunmaları gerektiğinin bildirilmesi.**

- / Fî 24 Nisan sene 1335 / - / - / - / - / 55 / Fî 21 Receb sene 1337 [22 Nisan 1919] / Fî 23 Nisan sene 1335

İ'ân

Meclis-i Meşâyihden:

Şeyhülislâm-ı esbak merhûm Mehmed Cemaleddin Efendi Hazretlerinin cenâzesi Nisan'ın yirmi beşinci Perşembe günü kable'z-zevâl sâ'at on birde Said Molla Beyefendi'nin Cağaloğlu'nda kâin konaklarından kaldırılacağından meşâyih-i kirâm ve ihvân-ı tarîkatin kisve-i mahsûsalarıyla hazır bulunmaları niyâz olunur.

Mustafa Hakî, Seyyid Mehmed es-Sükûtî

IST\_MFT\_MSH\_DFT02\_01741\_0001-0086

**Mevlevîhanekapısı'ndaki Tarsûsî Mehmed Efendi Dergâhı'nın bazı hücreleriyle caminin belli kısımlarını işgal eden ve tahliye etmeyen cami imamı Mustafa Efendi'ye gönderilen ihtarname.**

Fî 18 Receb sene 1337 / Fî 20 Nisan sene 1335 / - / - / - / Sîret / - / 54 / Fî 20 minhü [21 Nisan 1919] / Fî 21 minhü

Müzekkire

Mevlevîhânekapısı Kurbünde Tarsusî Mehmed Efendi Dergâh-ı şerîfi İmâmı Mustafa Efendi'ye İmâmı bulunduğunuz dergâh-ı şerîf odalarının bazıları ve câmi'-i şerîf, tarafınızdan işgâl edilerek edâ-yı salât ve icrâ-yı usûl-i tarîkate mâni' olduğu bi't-tahkîk anlaşılmış ve tahliye etmeniz için ol bâbdaki ta'lîmât-nâme ahkâmına tevfiқан tenbîh ve ihtâr müzekkireleri gönderilmiş olduğu hâlde henüz tahliyeden imtinâ' ettiğiniz Dergâh-ı şerîfin postnişini efendi tarafından verilen arzuhâl mündericâtından anlaşılmış olmağla bir haftaya kadar tahliye etmediğiniz takdirde mezkûr ta'lîmât-nâmenin yedinci maddesi mücebince nısf ma'âşınız kat' olunacağı beyân olunur.

Vahyî, Mustafa Hakî, Seyyid Mehmed es-Sükûtî, Mustafa, Ali, Tefvik

IST\_MFT\_MSH\_DFT02\_01741\_0001-0087

**Eyüp'te Kâşgarî Abdullah Efendi diğer adıyla Murtaza Efendi Dergâhı meşihat, imamet ve hitabetinin mutasarrıfı Bahaeddin Efendi'nin vefatıyla, vekâleten bu görevlere tayin edilen Şeyh Sadeddin Efendi'nin yerine Hasan Fehmi Efendi'nin tayini.**

Fî 13 Receb sene 1337 / Fî 19 Nisan sene 1335 / - / - / - / Sîret / - / 53 / Fî 17 minhü [19 Nisan 1919] / Fî 19 minhü

Müzekkire

Hazret-i Ebâ Eyyûb el-Ensârî -radiye anhü'l-Bârî- civârında kâin Kaşgarî Abdullah Efendi nâm-ı diğerle Murtaza Efendi Dergâh-ı şerîfi meşihat ve imamet ve hitâbet cihetleri vekâletinde



bulunan Şeyh Sadeddin Efendi'nin yerine Şeyh Hasan Fehmî Efendi ta'yîn kılındığına dâir mürsel müzekkire-i dâ'iyânemiz mündericâtına nazaran tedkîkât-ı kaydiyye icrâ olunarak cihât-ı mezkûre vekâletine Sadeddin Efendi'nin ta'yînine dâir kayda destres olunamadığı gibi cihât-ı mezkûrenin sûret-i inhilâlüne dâir de sarâhat olmadığından Kuyûd-ı Vakfiyye İdâresince tesviye-i kayd husûsunda tereddüd hâsıl olduğundan keyfiyyetin Meclis-i Meşâyihce tavzîh ve iş'ârı hakkında Evkâf-ı Hümâyûn Nezâret-i celîlesinden vârid olup havâle buyurulan merbût fî 10 Receb sene 1337 ve fî 12 Nisan sene 1335 târihli ve husûsî 47 numaralı tezkire kırâet olundu.

Dergâh-ı mezkûr postnişini ve imâmet ve hitâbet cihetleri mutasarrıfı Mehmed Bahaeddin Efendi'nin vukû'-ı vefâtına ve taht-ı silâhta bulunan mahdûmunun hayat ve memâtı mechûl bulunduğuna binâen âkîbeti ta'yîn edinceye değin cihât-ı mezkûre vezâifinin ber-vech-i hasbî Şeyh Sadeddin Efendi tarafından vekâleten ifâ olunması hakkında Meclis-i dâ'iyânemizden tanzim olunup mazrûfen nezâret-i müşârun-ileyhâya irsâl buyurulan 27 Safer sene 1337 ve 28 Teşrîn-i sâni sene 1335 târihli ve 59 numaralı müzekkire zahrına Kuyûd-ı Vakfiyye İdâresinden yazılan 3 Rebî'ülevvel sene 1337 ve 7 Kânûn-ı evvel sene 1334 târih ve 3716 numaralı derkenârla hitâbet-i mezkûreye dâir olunan istizâha gurre-i Rebî'ülâhir sene 1337 ve 4 Kânûn-ı sâni sene 1335 târih ve 3 numaralı derkenârla izâhât-ı lâzime i'tâ edildiği kayden tebeyyün etmiş ve bu kere vekâlet-i mezkûreye Hasan Fehmî Efendi'nin ta'yînine dâir olan fî 26 Mart sene 1335 târihli ve 28 numaralı müzekkirede dahi esbâb-ı mûcibe ber-tafsîl beyân edilmiş olduğundan müdîriyyet-i mûmâ-ileyhâca tahrîrât-ı kaydiyye icrâsıyla tasvîb-i sâmi-i cenâb-ı Meşihat-penâhîlerine iktirân eden iki kıt'a müzekkire-i mukaddime-i ma'rûza vechile mu'âmele-i kaydiyye icrâ olunması husûsunun müzekkirenin leffiyle cevâben iş'âr buyurulması tezekkür kılındı.

Vahyî, Mustafa Hakî, Seyyid Mehmed es-Sükûtî, Mustafa, Ali, Tefvik

IST\_MFT\_MSH\_DFT02\_01741\_0001-0088

**Mihrişah Sultan Türbesi hatm-i hâce görevlilerinden Hafız Kâzım'dan münhal cihetin Rifat Efendi'ye ve Saim Efendi'den boşalan cihetin de Nizameddin Efendi'ye tevcihi.**

Fî 15 Receb sene 1337 / Fî 17 Nisan sene 1335 / - / Kırmızı 70 / 156 / Sîret / - / 52 / Fî 17 Receb sene 1337 [19 Nisan 1919] / Fî 19 Nisan sene 1335

Müzekkire

Mihrişah Sultân türbe-i şerîfesinde hatm-i hâce cihetlerinden Hâfız Kazım Efendi'den inhilâl eden cihetin, Rifat Efendi'ye ve Saim Efendi'nin isti'fâsına mebnî inhilâl eden cihetin Nizameddin Efendi'ye tevcihi hakkında Meclis-i dâ'iyânemizden takdîm olunup mazrûfen irsâl buyurulan 8 Mart sene 1335 târihli ve sekiz numaralı mazbatanın i'âdesiyle ciheteyn-i mezkûreteynin 23 Teşrîn-i sâni sene 1334 târihinde Kazım Efendi'nin mahlûlünden a'mâ Hâfız Osman Efendi'ye tevcih olunmuş olduğu Kuyûd-ı Vakfiyye Müdîriyyetinden ifâde kılınmağ-la mu'âmele-i lâzimenin icrâsı için keyfiyyetin Meclis-i Meşâyihce tedkiki hakkında Evkâf-ı Hümâyûn Nezâret-i celîlesinden vârid olup havâle buyurulan 10 Nisan sene 1335 târihli ve 118456 umûmî ve 44 husûsî numaralı tezkire kırâet olundu.

Sâlifü'l-arz ciheteynin mûmâ-ileyh Osman Efendi uhdesine tevcih olduğu beyân olunmakta ise de ciheteynden biri mukaddemâ Kazım Efendi'nin vefâtıyla ve diğeri bi'l-âhare fî 4 Mart sene 1335 târihinde Saim Efendi'nin isti'fâsıyla inhilâl etmiş olmasına ve mûmâ-ileyh Osman

Efendi'ye tevcih târihinde cihetin henüz Saim Efendi uhdesinde bulunmasına binâen cihetey-nin tevhîden tevcihine imkân olmadığı gibi melfûf mazbata zahrına Şûrâ-yı Evkâftan muhar-rer derkenârda dahi mezkûr olduğu üzere Meclis-i Meşâyih Nizâmnâmesi mücebince cihât-ı mezkûrenin tevcih ve ref' mu'âmelâtı Meclis-i dâ'iyânemize âid bulunduğu cihetle Meclisimizin kararı olmadığı hâlde mûmâ-ileyh Osman Efendi'ye vukû' bulan tevcihin "keen lem-yekûn" hükmünde tutulması lâzım geldiğinden tasdik-i âlîye iktirân eden mazbata-i mütekaddime mündericâtı vechile müteveffâ Kazım Efendi'den inhilâl eden cihet-i mezkûrenin Rifat ve Saim Efendi'den inhilâl edenin Nizameddin Efendiler nâmlarına mu'âmele-i kaydiyyeleri icrâ ve berât-ı âlîlerinin tastîr ve i'tâsı husûsunun cevâben iş'âr ve işbu müzekkire ve melfûf mazba-tanın leffen tesyâr buyurulması tezekkür kılındı ol bâbda.

Vahyî, Mustafa Hakî, Seyyid Mehmed es-Sükûtî, Mustafa, Ali, Mehmed Abdülbâki,  
Tevfik

IST\_MFT\_MSH\_DFT02\_01741\_0001-0089

**Merdivenköy Şahkulu Sultan Zaviyesi türbedarı Şeyh Abdullah Efendi'nin yerine, Ahmed İsmet Efendi'nin tayini.**

Fî 15 Receb sene 1337 / Fî 16 Nisan sene 1335 / - / - / - / Sîret / - / 51 / Fî 15 minhü [16 Nisan 1919] / Fî 16 minhü

Müzekkire

Nerdübanlı karyesinde Şahkulu Sultân Zâviyesi türbedârlık cihetinin Ahmed İsmet Efendi uh-desine tevcihi hakkındaki fî 17 Mart sene 1335 târihli ve 10 numaralı mazbata-i dâ'iyânemiz üzerine tedkikât-i kaydiyye icrâ olunarak zâviye-i mezkûre zâviyedârlığı unvânı fî 22 Şevvâl sene 1268 târihinde türbedârlığa tahvîl olunarak 26 Kânûn-ı sâni sene 1330 târihine kadar o sûretle tevcihâtı icrâ edilmiş ve târih-i mezkûrdan i'tibâren Meclis-i Meşâyih mazbatası ve Şûrâ-yı Evkâfin kararı mücebince unvân-ı mezkûr vaz'-ı aslîsi vechile zâviyedârlığa bi't-tahvîl Şeyh Abdullah Efendi'ye tevcih olunmuş olmasına ve cihet-i mebhûsa bin doksan târihinden beri zâviyedâr unvânıyla mütedâvil olup başkaca türbedâr unvânıyla cihet kaydına destres olunama-mış ise de unvân-ı mezkûrun türbedârlığa tahvîli sûretiyle tesviye-i kaydı münâsib olacağına dâir Kuyûd-ı Vakfiyye Kalemi ifâdesiyle Evkâf-ı Hümayûn Nezâret-i celîlesinden vârid olup havâle buyurulan 8 Receb sene 1337 ve 10 Nisan sene 1335 târihli ve 118459 umûmî ve 46 husûsî numaralı tezkire-i cevâbiye kırâet olundu.

Mezkûr mazbatada dahi arz olunduğu vechile zâviyye-i mezkûrenin zâviyedâr ve türbedârlık cihetlerinin Mehmed Ali Baba'nın mahlûlünden Ahmed Baba'ya tevcihi hakkındaki Meclis-i Meşâyih'in 24 Muharrem sene 1325 târihli mazbatasında münderic ve mahkî mülgâ Cihât İdâresinden muhrec kayıdda mahall-i mezkûrda hem türbedârlık ve hem zâviyedârlık cihet-leri mevcûd olduğu tasrîh edilmiş olmasına ve zâviyye-i mezkûre zâviyedârlık cihetlerinin tevcihinden sarf-ı nazar olunması fermân-ı âlî iktizâsından bulunan zevâyâdan ve derûnunda Şahkulu Sultân'ın türbesi mevcûd bulunmasına binâen tarikat-i aliyye-i Nakşibendiyye usûl ve ezkârı icrâ etmek şartıyla türbedârlık cihetinin mûmâ-ileyh İsmet Efendi uhdesine tevcihi tensîb edilmiş ve mülgâ Cihât İdâresinin unvânı bi'l-âhare Kuyûd-ı Vakfiyye İdâresine tahvîl olunmasına göre kayd-ı sâbıkın mevcûd olacağı ve binâen-aleyh türbedârlık cihetinin kaydı

bulunabileceği derkâr bulunmuş olduğundan bir def'a daha tedkîkât-ı kaydiyye icrâsıyla müte-kaddem mazbata mündericâtı vechile tesviye-i kayd ve îfâ-yı mu'âmele olunması husûsunun cevâben izbâr buyurulması tezekkür kılındı ol bâbda.

Vahyî, Mustafa Hakî, Seyyid Mehmed es-Sükûtî, Mustafa, Ali

IST\_MFT\_MSH\_DFT02\_01741\_0001-0090

**Sultanahmet Arasta'daki Rifâî Dergâhı postnişininin, belirtilen tarihte Meclis-i Meşâyihe çağırılması.**

Fî 15 Receb sene 1337 / Fî 16 Nisan sene 1335 / - / - / Müzekkire / Fî 15 minhü [16 Nisan 1919] / Fî 16 minhü

50

Sultânahmed'de Arasta'da Rifâ'î Dergâhı Postnişinliğine

Bazı husûsun istifsârı zımnında Nisan'ın on dokuzuncu cumartesi günü Meclis-i Meşâyihe gelmeleri siyâkında müzekkire terkîm kılındı.

Tevfik

IST\_MFT\_MSH\_DFT02\_01741\_0001-0091

**Kasımpaşa'da Pîr Hüsameddin Uşşâkî Dergâhı postnişininin, Manisa'da Uşşâkî Dergâhı hakkında yapılacak müzakere için, belirtilen günde Meclis-i Meşâyihe çağırılması.**

Fî 15 Receb sene 1337 / Fî 16 Nisan sene 1335 / - / - / Taraf-ı Riyâset'ten / Fî 15 minhü [16 Nisan 1919] / Fî 16 minhü

49

Kasımpaşa'da Kâin Pîr Hüsameddin-i Uşşâkî Hazretleri Dergâh-ı şerîfi Postnişinliğine

Manisa'da kâin Uşşâkî Tekkesi meşihat ciheti hakkında müzakere olunmak üzere ve mezkûr tekkeye dâir nezd-i âlilerinde bir gûnâ evrâk var ise müstashiben önümüzdeki Cumartesi veya Pazartesi günü Meclis'e teşrîf buyurmaları siyâkında müzekkire takdîm kılındı.

Tevfik

IST\_MFT\_MSH\_DFT02\_01741\_0001-0092

**Eyüp'te Kâşgarî Abdullah Efendi diğer adıyla Murtaza Efendi Dergâhı meşihat vekâletine Şeyh Fehmi Efendi tayin edildiği için, dergâhın tayinat ve muhassasatının kendisine verilmesi.**

- / Fî 16 Nisan sene 1335 / - / - / - / Sîret / - / 47 - 48 / Fî 14 Receb sene 1337 [16 Nisan 1919] / Fî 16 Nisan sene 1335

[Mühür:] Fehmî 1331

Müzekkire

Eyüpsultân'da kâin Kaşgarî Abdullah Efendi nâm-ı diğer Murtaza Efendi postnişinliğine asâleten münâsibi ta'yîn olununcaya değin şimdilik vekâletine Şeyh Fehmî Efendi ta'yîn edilmiş olmağla mütedâhil mu'ayyenâtıyla ba'demâ verileceklerin mûmâ-ileyh nâmına ve bâlâdaki tatbîk

mührüyle tesviye ve i'tâsı zımında işbu ilmühaber Evkâf-ı Hümâyûn Levâzım Müdîriyyet-i behiyyesine isrâ kılındı.

Eyüpsultân'da kâin Kaşgârî Dergâh-ı şerîfî meşîhat ciheti asâleten münâsibine tevcîhine değin vekâletine şimdilik Şeyh Fehmî Efendi ta'ýîn edilmiş olmağla Pertevniyal Vâlide Sultân Vakfı'ndan dergâh-ı mezkûr muhassasâtının ba'demâ mûmâ-ileyhin bâlâya matbû' tatbîk mührüyle i'tâsı zımında işbu ilmühaber i'tâ kılındı.

Vahyî, Mustafa Hakî, Seyyid Mehmed es-Sükûtî, Mustafa, Ali

IST\_MFT\_MSH\_DFT02\_01741\_0001-0093

**Meclis-i Meşâyih kâtibi Hüsameddin Efendi'nin hastalığından dolayı izninin bir müddet daha uzatılması.**

Fî 13 Receb sene 1337 / Fî 14 Nisan sene 1335 / - / - / - / Sîret / - / 46 / Fî 13 minhü [14 Nisan 1919] / Fî 14 minhü

Müzekkire

Meclis-i Meşâyih kâtibi Hüsameddin Efendi dâ'îlerinin rahatsızlığına mebnî bir mâh me'zûniyeti husûsu 7 Cumâdelâhire sene 1337 târihinde mücebine işâret-i aliyye-i Meşîhat-penâhîlerine iktirân etmişidi. Mûmâ-ileyhin bir müddet daha tedâvî veistirâhate ihtiyâcı bulunduğundan me'zûniyet-i sâbıkasının müddet-i münâsibe ile temdîdine müsâ'ade-i sâmiye-i Fetvâ-penâhîleri şâyân buyurulması bâbında.

Vahyî, Seyyid Mehmed es-Sükûtî, Mustafa Hakî, Mustafa, Ali, Mehmed Abdülbâki, Tefvik

IST\_MFT\_MSH\_DFT02\_01741\_0001-0094

**Tekke merkezi olan Üsküdar Mevlevîhanesi'ne ait postnişinlik mührünün muamelelerde kullanılması için, Evkaf Nezâretine gönderilen ilmühaber.**

- / Fî 14 Nisan sene 1335 / - / - / - / Sîret / - / 45 / - / Fî 14 minhü [14 Nisan 1919]

Müzekkire

Üsküdar Mevlevîhânesi müstakil merâkiz-i tekâ[yâ]dan olmağla mu'âmelâtı için postnişinlik mühr-i resmîsi olan bâlâya matbû' mührün kabûl olunması zımında Evkâf-ı Hümâyûn Nezâret-i celîlesiyle şu'ubât-ı vakfiyye'ye ibrâz olunmak üzere işbu vesîka i'tâ kılındı.

Vahyî, Mustafa Hakî, Mustafa, Ali, Tefvik

IST\_MFT\_MSH\_DFT02\_01741\_0001-0095

**Fatih Nişancı'da Hamzazâde diğer adıyla Şeyh Mehmed Efendi Zaviyesi'nin meşîhat ve diğer vazifelere ait deruhte ve tevcih kayıtlarıyla; vazife yapmış şeyhlerinin isimleri ve aldıkları maaş miktarlarının Evkaf Nezâretinden istenmesi.**

Fî 11 [Receb sene 1337] / Fî 12 Nisan sene 1335 / - / - / - / Sîret / - / 44 / Fî 11 minhü [12 Nisan 1919] / Fî 12 minhü

Müzekkire

Fâtih'te Nişancı civârında Hamzazâde nâm-ı diğer Şeyh Mehmed Efendi Zâviyesinin meşihat ve cihât-ı sâiresi deruhde ve şürût-ı tevcîhiyye kayıtlarının ve şimdiye kadar güzêrân olan meşâyihin târih-i tevcîhleriyle esâmî ve mensûb oldukları turuk-ı aliyye hakkındaki ma'lûmât-ı kuyûdiyyenin ve vezâifî makâdirinin ber-tafsîl beyânı zımında işbu müzekkirenin mazrûfen Evkâf-ı Hümâyûn Nezâret-i celîlesine irsâl buyurulması bâbında.

Vahyî, Mustafa Hakî, Mustafa, Ali, Mehmed Abdülbâki, Tefvik

IST\_MFT\_MSH\_DFT02\_01741\_0001-0096

**Beşiktaş Maçka'daki Şeyh Fahreddin Efendi Dergâhı postnişini Muhyiddin Efendi'nin; hademe-i hümâyûn imamı Hafız Osman Efendi'yi vekil bırakarak Bartın'a gitmesi için, kendisine üç ay izin verilmesi.**

Fî 11 Receb sene 1337 [12 Nisan 1919] / Fî 12 Nisan sene 1335 / - / - / - / - / - / 43 / Minhü Müzekkire

Beşiktaş'ta Maçka'da kâin Şeyh Fahreddin Efendi Dergâhı postnişini Şeyh Muhyiddin Efendi mesâlih-i zâtîyyesini tesviye etmek üzere üç mâh müddetle Bartın'a azîmet edeceğini ve müddet-i mezkûre zarfında hademe-i hümâyûn imâmı hulefâ-yı Şa'bâniyye'den Hâfız Osman Efendi'yi tevkîl eyleyeceğini ifâde etmiş ve ol vechile kendisine me'zûniyet i'tâ edilmiş olmağla işbu vesîka yedine i'tâ kılındı.

Vahyî, Seyyid Mehmed es-Sükûtî, Mustafa Hakî, Mustafa, Ali, Mehmed Abdülbâki, Tefvik

IST\_MFT\_MSH\_DFT02\_01741\_0001-0097

**Merdivenköy'de Şahkulu Sultan Zaviyesi türbedarlığına Ahmed İsmet Efendi tayin edildiği için, zaviyenin muhassasat ve tayinatının kendisine verilmesi.**

- / Fî 9 Nisan sene 1335 / - / - / Müzekkire / Fî 8 minhü [9 Nisan 1919] / Fî 9 minhü [Mühür:] Es-Seyid Ahmed İsmet

42

Nerdüban karyesinde kâin Şahkulu Sultân Zâviyesi türbedârlik ciheti fazîletli Ahmed İsmet Efendi uhdesine tevcîh buyurulduğundan fî 17 Mart sene 1335 târihinden i'tibâren mu'ayyenât ve muhassasâtın efendi-i mûmâ-ileyh nâmına ve bâlâya matbû' tatbik mührüyle tesviye ve i'tâsı zımında işbu müzekkire Üsküdar Evkâf Me'mûriyyet-i behiyyesine isrâ kılındı.

Vahyî, Mustafa, Ali, Tefvik

IST\_MFT\_MSH\_DFT02\_01741\_0001-0098

**Eyüp'te Kâşgarî Abdullah Efendi diğer adıyla Murtaza Efendi Dergâhı meşihat vekâletine Şeyh Fehmi Efendi tayin edildiği için, dergâhın tayinat ve muhassasatının kendisine verilmesi.**

Fî 11 Receb sene 1337 [12 Nisan 1919] / Fî 12 Nisan sene 1335 / - / - / - / - / - / 41 / Minhü [Mühür:] Fehmî 1331

(İmâmet ve hitâbet yalnız Evkâf'a yazılacaktır.)

Evkâf-ı Hümâyûn Nezâret-i celîlesine

Bahriye Nezâret-i celîlesine

Hazîne-i Hâssa-i Şâhâne Müdiriyyet-i Umûmiyyesine

Eyüpsultân'da kâin Kaşgârî Abdullah Efendi nâm-ı diğer Murtaza Efendi Dergâh-ı şerîfi postnişinlik ciheti asâleten bir zâta tevcîh olununcaya değin şimdilik Evkâf'a (imâmet ve hitâbet cihetleri) vekâletine Şeyh Fehmî Efendi ta'yîn olunduğundan 1 Nisan sene 1335 târihinden i'tibâren mu'ayyenât ve muhassasâtının mûmâ-ileyh nâmına ve bâlâyâ matbû' mühr ile i'tâ olunması zımında işbu ilmühaber takdîm kılındı.

Vahyî, Seyyid Mehmed es-Sükûtî, Mustafa, Ali, Tevfik

IST\_MFT\_MSH\_DFT02\_01741\_0001-0099

**Koska'da Abdüsselâm Efendi diğer adıyla Sadeddin Dergâhı meşihatine Şeyh Yusuf Zahir Efendi tayin edildiği için, dergâhın muhassasat ve tayinatının kendisine verilmesi.**

Fî 8 Receb sene 1337 / Fî 9 Nisan sene 1335 / Hüsâm / - / - / - / Sîret / - / 40 / Fî 8 minhü [9 Nisan 1919] / Fî 9 minhü

[Mühür:] Yusuf Zahir

Müzekkire

Koska'da Abdüsselâm Dergâh-ı şerîfi meşihat ciheti bu kere fî 31 Mart sene 1335 târihinde Şeyh Yusuf Zahir Efendi uhdesine tevcîh edildiğinden Bahriye Nezâret-i celîlesinden dergâh-ı mezkûra muhassas olan ta'âmiyye ve nân-ı azîzin ba'demâ şehir-i mûmâ-ileyh nâmına bâlâda matbû' mührünün tatbîkiyle i'tâsı zımında işbu müzekkire nezâret-i müşârun-ileyhâya takdîm kılındı.

Vahyî, Mustafa Hakî, Seyyid Mehmed es-Sükûtî, Mustafa, Ali, Tevfik

Dergâh-ı mezkûrun nâm-ı diğeri (Âsitâne'de Hasanpaşa Hânı civârında Sadeddin Dergâhı) olduğu şerh verildi.

Fî 14 Nisan sene 1335

Vahyî, Mustafa Hakî, Seyyid Mehmed es-Sükûtî, Mustafa, Ali, Tevfik

IST\_MFT\_MSH\_DFT02\_01741\_0001-0100

**Sultanselim civarında Çerağihamza Mahallesi'nde Lebîb Efendi Dergâhı tayinat ve muhassasatının, dergâhın şeyhi Seyyid Ahmed Cemaleddin Efendi'nin mührüyle verilmesi.**

- / Fî 7 Nisan sene 1335 / Sîret / - / - / - / Hülâsa: Müzekkire / Fî 6 minhü [7 Nisan 1919] / Fî 7 minhü

39

[Mühür:] Es-Seyyid Ahmed Cemaleddin bin Emin

Sultânselim civârında Çerâğî Hamza Mahallesi'nde kâin tarîkat-i aliyye-i Rifâ'iyye'den Lebîb Efendi Dergâhı meşihatine bi'n-niyâbe mutasarrıf olan Bedreddin Efendi'nin vukû'-ı vefâtına

binâen dergâh-ı mezkûr mu'ayyenât ve muhassasâtının ba'demâ asıl şeyhi olan Ahmed Cema-leddin Efendi nâmına ve bâlâda matbû' tatbîk mühriyle i'tâ olunması zımında işbu müzekkire İstanbul vilâyeti Evkâf Müdîriyyet-i aliyyesine tesyâr olundu.

Vahyî, Mustafa, Ali, Tevfik

IST\_MFT\_MSH\_DFT02\_01741\_0001-0101

**Meclis-i Meşâyih Tahrir Kalemi birinci sınıf kitâbetlerine Hüsameddin Efendi ile Müfettiş muavini Fahreddin Efendi'nin tayini, ikinci ve üçüncü sınıf kitâbetlerine münasiplerinin tayini ve ayrıca Başkâtib Mustafa Sîret Efendi'nin maaşına da zam yapılması talebi.**

Fî 3 Receb sene 1337 / Fî 5 Nisan sene 1335 / - / - / - / - / 38 / Fî 6 minhü [7 Nisan 1919] / Fî 7 minhü

38

Müzekkire

6 Şevvâl sene 1336 târihli nizamnâme mücebince tecdîden teşkîl olunan Meclis-i dâ'iyânemiz Dersaadet ve taşrada bulunan bi'l-cümle tekâyânın umûrunu rü'yet ve nizâmnâmenin beşinci maddesi mücebince bi'l-umûm meşâyihin terâcim-i ahvâlini ve tekâyâ ve zevâyâyâ âid vakfiyeleri kayıd ve tescîl ile mükellef olup ahkâm-ı nizâmiyyenin tamâmî-i tatbîki bir hey'et-i tahrîriyyenin mevcûdiyetine mütevakkıf bulunduğu hâlde Meclisin umûr-ı tahrîriyye kadrosu bir başkâtib ve bir de ikinci sınıf kâtibden teşkil edilmiştir. Hâl-i hâzır ile mesâlih-i rûz-merre bir sa'y-i fevka'l-âde semeresi olarak tesviye ve ifâ olunmakta ise de Dersaadet ve taşradan hasbe'n-nizâm taleb olunup peyderpey vürûd eden terâcim-i ahvâl ve vakfiyelerin tescîl-i mu'amelâtı te'cîl olunmakta olduğundan Meclis-i dâ'iyânemizin vezâif-i mühimmesi nisbetinde bir hey'et-i kalemiyye teşkîli mübremiyeti tahakkuk etmiştir. Binâen-aleyh kalem kadrosunun kemâ-kân bir başkâtib ve iki birinci sınıf ve iki ikinci sınıf ve bir üçüncü sınıf kitâbetten teşkîli ve birinci sınıf kitâbetin birine el-yevm ikinci sınıf kitâbette müstahdem Hüsameddin Efendi'nin kıdem ve ehliyetine binâen terfî'i ve diğerine Dâru'l-Hikmeti'l-İslâmiyye Kalemi birinci sınıf ketebesinden olup müfettiş mu'âvini sıfatıyla Meclis-i Meşâyih'de müstahdem Fahreddin Efendi'nin mücerreb olan ehliyet ve kifâyetine mebnî ma'âş-ı hâlisine iki yüz gurusu zammıyla nakli ve mütebâkî iki ikinci ve bir üçüncü sınıf kitâbetlere dahi ehil ve muktedir münâsib ketebe ta'yini ve Bâb-ı Vâlâ-yı Fetvâ-penâhîlerinin otuz beş senelik kudemâ-yı me'mûrîninden bulunan Başkâtib Mustafa Sîret Efendi dâ'ileri ifâ-yı vazîfe uğrunda gece ve gündüz çalışmak sûretiyle ancak bir hey'et-i tahrîriyyenin görebileceği mikdârda vezâifi tahammül ve tesviye etmekte olduğu gibi me'mûriyet-i sâbıkasının ilgâsından dolayı dört seneden ziyâde açıkta kalarak fakr-ı zarûrete dahi ducâr idiğinden ezher cihet taltîf-i sâmi-i cenâb-ı Meşihat-penâhîlerine sezâvâr bulunduğundan ma'âşına mikdâr-ı münâsib zammıyla terfîh ve testîri husûslarına müsâ'ade-i kerem-âde-i hazret-i veliyyü'n-ni'amîleri şâyân buyurulması bâbında.

Vahyî, Seyyid Mehmed es-Sükûtî, Mustafa Hakî, Mustafa, Mehmed Abdülbâki, Ali, Tevfik



IST\_MFT\_MSH\_DFT02\_01741\_0001-0102

**Ayaspaşa'da Ali Baba Dergâhı'nda, şeyhi Resmî Efendi'nin izni olmadan yerleştirilmiş olan iki kiracının dergâhtan tahliyeleri.**

Fî 30 Cemâziyelevvel sene 1337 / Fî 2 Nisan sene 1335 / - / - / - / Sîret / - / 37 / Fî 4 Receb sene-i minhü [5 Nisan 1919] / Fî 5 Nisan sene-i minhü

Müzekkire

Ayaspaşa'da kâin Ali Baba Dergâh-ı şerîfinin iki odasına biraderzâdeleri tarafından fuzûlî müdâhale olunarak kirâcı konulduğu ve kirâcıların dergâhta ikâmetleri mahzûru mûcib bulunduğu cihetle çıkartılması esbâbının istikmâli mezkûr dergâh postnişini Şeyh Resmi Efendi tarafından ifâde ve taleb olunması üzere keyfiyet lede't-tahkîk mukârin-i hakikat olduğu anlaşılmış ve müdâhale-i vâkı'anın tecvîz olunamayacağı derkâr bulunmuş olduğundan mezkûr odaların hemen tahliyesiyle şeyh-i mûmâ-ileyhe teslimi lüzûmunun Evkâf-ı Hümâyûn Nezâret-i celîlesine iş'âr buyurulması tezekkür kılındı.

Vahyî, Seyyid Mehmed es-Sükûtî, Mustafa, Ali, Tevfik

IST\_MFT\_MSH\_DFT02\_01741\_0001-0103

**İkinci Tekke Merkezi olan Merkez Efendi Hankahı postnişinliği vekâletine ait yeni gönderilen mührün muamelelerde kullanılmasının, İstanbul Evkaf Müdürlüğü ile Bahriye Nezâretine bildirilmesi.**

- / Fî 5 Nisan sene 1335 / - / - / - / Hülâsa: İstanbul Evkâf Müdiriyyet-i aliyyesine Bahriye Nezâret-i celîlesine / Fî 4 Receb minhü [5 Nisan 1919] / Fî 5 Nisan minhü

35

[Mühür:] Hazret-i Merkez Hânkâhı Postnişinliği Vekîli

İkinci merkez olan Merkez Efendi Hazretleri Hânkâh-ı şerîfi postnişin vekâletine mahsûs olan tatbîk mührü kazâen zâyi' edilmiş olmağla bâlâya mevzû' mührün fîmâ-ba'd tatbîk edilmesini mübeyyin işbu müzekkire takdîm kılındı.

Sîret

IST\_MFT\_MSH\_DFT02\_01741\_0001-0104

**Sultanahmet'te Arabacıbaşı Dergâhı postnişini İhsan Efendi'nin vefatı üzerine, yerine vekâleten oğlu Mustafa Şehabeddin Efendi tayin edildiği için, dergâhın tayinat ve muhassasatının kendisine verilmesi.**

Fî 3 Receb sene 1337 / Fî 5 Nisan sene 1335 / - / - / - / Sîret / - / 34 / Fî 4 Receb sene-i minhü [5 Nisan 1919] / Fî 5 Nisan sene-i minhü

[Mühür:] Mustafa Şehabeddin bin Bekir Sıdkı

36

Müzekkire

Sultânahmed Câmî'-i şerîfi civârında kâin Arabacıbaşı Dergâh-ı şerîfi postnişini İhsan Efendi'nin 18 Kânûn-ı sâni sene 1335 târihinde irtihâl-i dâr-ı bekâ etmesine mebnî mezkûr postnişinlik

vekâleti mahdûmu Mustafa Şehabeddin Efendi uhdesine tevcih buyurulduğundan dergâh-ı mezkûr mu'ayyenâtının mûmâ-ileyhin bâlâya matbû' mührüyle itâ olunması zımında işbu müzekkire Hazîne-i Hâssa-i Şâhâneye takdîm kılındı.

Vahyî, Mustafa, Mustafa Hakî, Tevfik

IST\_MFT\_MSH\_DFT02\_01741\_0001-0105

**Eğrikapı'da Seyyid Cemaleddin Uşşâkî Dergâhı meşihat ve dergâhtaki Hırâmî Ahmed Paşa Camii imamet cihetlerinin; deruhte, tevcih şartları ve maaş miktarı kayıtlarının Evkaf Nezâretinden istenmesi.**

Fî 29 C. sene sene 1337 / Fî 1 Nisan sene 1335 / - / - / 142 / Sîret / - / 33 / Fî 30 minhü [1 Nisan 1919] / Fî 2 minhü

Müzekkire

Eğrikapı hâricinde kâin Seyyid Cemaleddin-i Uşşâkî Dergâh-ı şerîfî meşihat ve dergâh derûnunda bulunan Hırâmî Ahmed Paşa Câmi'i imâmet cihetlerinin der'uhde ve şürût-ı tevcihiyye ve mikdâr-ı vezâif kayıtları sûretlerinin ihrâc ve irsâli zımında işbu müzekkirenin mazrûfen Evkâf-ı Hümâyûn Nezâret-i celîlesine irsâl buyurulması bâbında.

Vahyî, Seyyid Mehmed es-Sükûtî, Mustafa, Ali, Tevfik

IST\_MFT\_MSH\_DFT02\_01741\_0001-0106

**Koska'da Abdüsselâm Hankahı postnişini Şeyh Hikmet Efendi'nin, dergâhın harem dairesine kiracı yerleştirdiği için azledilmesi ve yerine Yusuf Zahir Efendi'nin tayini.**

Fî 29 C. sene sene 1337 / Fî 1 Nisan sene 1335 / - / - / - / Sîret / - / 32 / Fî 30 minhü [1 Nisan 1919] / Fî 2 minhü

Müzekkire

Koska'da kâin Abdüsselâm Hazretleri Hânkâh-ı şerîfinin harem dâiresi şeyh-i sâbık Hikmet Efendi tarafından İslâm ve Hristiyan bir takım eşhâsa îcâr edilmiş olduğu tahkikât-ı vâkı'adan anlaşılmış ve şeyh-i mûmâ-ileyhin bu misilli seyyiât-ı ahvâlinde dolayı uhdesinden cihet-i meşihat ref' olunarak Şeyh Yusuf Zahir Efendi'ye tevcih buyurulmuş olduğundan temâdî-i ikâmetleri biran bile câiz olmayan müste'cirîn-i merkûmeden dergâhın hemen tahliyesiyle şeyh-i mûmâ-ileyh Zahir Efendi'ye teslîmi husûsunun me'mûrîn-i âidesine ehemmiyetle emr ü havâle olunması hakkında Evkâf-ı Hümâyûn Nezâret-i celîlesine tezkire-i aliyye tastîr buyurulması tezekkür kılındı ol bâbda.

Vahyî, Seyyid Mehmed es-Sükûtî, Mustafa, Ali, Tevfik

IST\_MFT\_MSH\_DFT02\_01741\_0001-0107

**Eyüp Bahariye'de Şah Sultan Dergâhı Camii'nin zeytinyağı tahsisatının verilmesi.**

Fî 30 C. sene sene 1337 / Fî 2 Nisan sene 1335 / - / - / - / Sîret / - / 31 / Fî 30 minhü [1 Nisan 1919] / Fî 2 minhü

Müzekkire

Bahariye'de kâin Şah Sultân Dergâhı Câmi'-i şerîfi küşâde ve derûnunda edâ-yı salât ve erkân-ı tarikat-i aliyye icrâ olunmakta bulunduğundan muhassasâtından bulunan zeytun yağının i'tâsı zımında işbu müzekkirenin mazrûfen Evkâf-ı Hümâyûn Nezâret-i celîlesine irsâl buyurulması bâbında.

Vahyî, Seyyid Mehmed es-Sükûtî, Mustafa, Ali, Tevfik

IST\_MFT\_MSH\_DFT02\_01741\_0001-0108

**Koska'da Abdüsselâm Efendi Dergâhı meşihatine Şeyh Yusuf Zahir Efendi tayin edildiği için, dergâhın muhassasat ve tayinatının kendisine verilmesi.**

Fî 28 C. sene 1337 / Fî 31 Mart sene 1335 / - / - / - / Sîret / - / 30 / Fî 28 minhü [31 Mart 1919] / Fî 31 minhü

[Mühür:] Yusuf Zahir

Müzekkire

İstanbul vilâyeti Evkâf Müdîriyyet-i aliyyesine

Koska'da kâin kutbü'l-ârifin Abdüsselâm Hazretleri Hânkâh-ı şerîfi meşihati 28 Cemâziyelâhir sene 1337 ve 31 Mart sene 1335 târihinden i'tibâren Şeyh Yusuf Zahir Efendi uhdesine tevcih buyurulduğundan hânkâh-ı mezkûrun muhassasât ve mu'ayyenâtının târih-i mezkûrdan i'tibâren mûmâ-ileyh nâmına ve bâlâya matbû' tatbîk mührüyle tesviye ve i'tâ buyurulması zımında işbu müzekkire isrâ kılındı.

Vahyî, Ali, Seyyid Mehmed es-Sükûtî, Mustafa, Mehmed Abdülbâki, Mustafa Hakî, Tevfik

IST\_MFT\_MSH\_DFT02\_01741\_0001-0109

**Silivrikapı'da Topçubaşı Bâlî Ağa Dergâhı Mescidi müezzin ve birinci kayyımı olan Burhaneddin Efendi'nin askerden döndükten sonra göreve başlayacağı için, vekili Hacı Ahmed Efendi'ye verilmiş olan maaş cüzdanının alınarak kendisine verilmesi.**

Fî 23 C. sene 1337 / Fî 26 Mart sene 1335 / - / 192 / 97 / Sîret / - / 29 / Fî 23 minhü [26 Mart 1919] / Fî 26 minhü

Müzekkire

Silivrikapısı'nda Topçubaşı Bâlî Ağa Dergâhı Mescid-i şerîfinin müezzin ve kayyım-ı evveli Burhaneddin Efendi mukaddemâ taht-ı silâha alındığı esnâda vazîfelerinin îfâsına Hacı Ahmed Efendi'yi resmen tevkîl etmiş ise de ba'demâ bizzât îfâ-yı hizmet edeceğinden yedinde bulunan vazîfe cüzdanının bi'l-istirdâd tarafına teslimini istid'â etmiş ve keyfiyyet İstanbul vilâyeti Evkâf Müdîriyyetinden lede'l-isti'lâm vekil-i mûmâ-ileyh nâmına şehri yüz altmış iki gurus vazîfenin dâhil bulunduğu ve mezkûr vazîfenin nısfının vekile ve nısf-ı diğerinin asîle i'tâ kılındığı Mart sene 1335 târihli ve 384 numaları derkenârla beyân edilmiş olmasına binâen ber-vech-i istid'â mün'azil olan vekil-i mûmâ-ileyhten cüzdanın istirdâdıyla asîl Burhaneddin Efendi'ye teslim ve bu bâbda icâb eden mu'âmele-i kaydiyyenin îfâ olunması zımında müzekkirenin mazrûfen Evkâf-ı Hümâyûn Nezâret-i celîlesine irsâl buyurulması bâbında.

Vahyî, Seyyid Mehmed es-Sükûtî, Mustafa, Ali, Mehmed Abdülbâki, Tevfik

IST\_MFT\_MSH\_DFT02\_01741\_0001-0110

**Eyüp'te Kaşgarî Abdullah Efendi diğer adıyla Murtaza Efendi Dergâhı'nın meşihat, imamet ve hitabet vazifelerini vekâleten yürütmekte olan Şeyh Sadeddin Efendi'nin görevine son verilerek, yerine Kaptan Paşa Dergâhı postnişini Hacı Hasan Fehmi Efendi'nin tayin edilmesi.**

Fî 23 C. sene 1337 / Fî 26 Mart sene 1335 / - / - / - / Sîret / - / 28 / Fî 23 minhü [26 Mart 1919] / Fî 26 minhü

Müzekkire

Hazret-i Ebâ Eyyûb el-Ensârî -radiye anhu'l-Bârî- civârında kâin Kaşgarî Abdullah Efendi nâm-ı diğer Murtaza Efendi Dergâh-ı şerîfinin münhal olan meşihat ve imâmet ve hitâbet cihetleri vekâletine evvelce ta'yîn olunan Şeyh Sadeddin Efendi'nin hasbe'l-icâb vekâletine hitâm verilerek meşihat-i mezkûrenin şart-ı vâkıfa ve ahkâm-ı nizâmiyyeye tevfikân ehil ve münâsib bir zâta tevcih olununcaya değin cihât-ı mezkûre vezâifi Kaptan Paşa Dergâhı postnişini el-Hâc Hasan Fehmi Efendi tarafından vekâleten ifâ olunması mûmâ-ileyhin muvâfakatiyle tensîb edilmekle karîn-i tasvîb-i sâmi-i cenâb-ı Meşihat-penâhîleri buyurulduğu takdîrde mu'âmele-i kaydiyyenin ifâsı husûsunun bâ-tezkire-i aliyye Evkâf-ı Hümayûn Nezâret-i celîlesine iş'âr buyurulması bâbında.

Vahyî, Seyyid Mehmed es-Sükûtî, Mustafa, Ali, Mehmed Abdülbâki, Tevfik

IST\_MFT\_MSH\_DFT02\_01741\_0001-0111

**Balçık Dergâhı şeyhi Mehmed Hâlid Efendi ile Nakşi şeyhi Kadri Efendi'nin belirtilen vakitte Meclise gelmesinin, Eyüp'te İzzet Mehmed Paşa Dergâhı postnişinliğine tebliği.**

Fî 16 C. sene 1337 / Fî 19 Mart sene 1335 / - / - / - / - / 27 / Fî 16 C. sene-i minhü [19 Mart 1919] / Fî 19 Mart sene-i minhü

Eyüpsultân'da İzzet Mehmed Paşa Dergâhı Postnişinliğine

Müzekkire

Bazı husûsun istifsârı için Balçık Dergâhı şeyhi Mehmed Halid Efendi'nin şehr-i Mart'ın yirmi ikinci Cumartesi günü öğleden evvel behemehâl Meclis'e gelmesinin ve evvelce iş'âr olunduğu hâlde henüz gelmeyen Nakşi Şeyhi Kadri Efendi'nin dahi gelmesi için te'kîden tebliğe himmet buyurulması siyâkında müzekkire terkîm olundu.

Vahyî, Seyyid Mehmed es-Sükûtî, Mehmed Abdülbâki, Ali

IST\_MFT\_MSH\_DFT02\_01741\_0001-0112

**İstanbul'da yapılacak postnişinlik imtihanlarına Meclis-i Mesâlih-i Talebe azasından üç kişinin bulunmasına gerek olmamakla birlikte, bu hususta Şûrâ-yı Devletin kararının beklenmesi.**

Fî 12 C. sene 1337 / Fî 15 Mart sene 1335 / - / - / - / Sîret / - / 26 / Fî 12 minhü [15 Mart 1919] / Fî 15 minhü

Müzekkire

Meclis-i Meşâyih Nizâmnâmesi'nin dokuzuncu maddesi mücebince tekâyâ ve zevâyâyâ âid bi'l-umûm cihât-ı ilmiyye ve bedeniyenin tevcih ve ref'i ve tâliblerinin icrâ-yı imtihânları husûsunda Tevcih-i Cihât Nizâmnâmesi mücebiyle Şûrâ-yı Evkâf ve evkâf idârelerine mevdû' vezâifin İstanbul'da Meclis-i Meşâyih ve taşrada Encümen-i Meşâyih tarafından ifâsı lüzûmu gösterilmiş olmasına mebnî Tevcih-i Cihât Nizâmnâmesi'nin otuz birinci maddesi mücebince İstanbul postnişinlik imtihânlarında Meclis-i Mesâlih-i Talebe a'zâsından üç zâtın hazır bulunmasına lüzûm kalmamış ise de bu husûsun Şûrâ-yı Devletce taht-ı karâra alınması hakkında Meclis-i dâ'iyânemiz ifâdesiyle şûrâ-yı müşârun-ileyhâ ile sebk eden muhâberegâye cevâben Tevcih-i Cihât Nizâmnâmesi'nin mezkûr maddesi ta'dil olunmadıkça imtihânlarda zevât-ı ma'rûzanın bulunmaları lüzûmu beyân olunmuş ve madde-i mezkûrenin ta'dili hakkında tekarrar takdîm kılınan müzekkire üzerine makâm-ı sâmi-i cenâb-ı Meşihat-penâhîlerinden riyâset-i müşârun-ileyhâya tezkire-i aliyye tastîr buyurulmuş ve henüz cevâbı vürûd etmemiş olduğuna ve cevâbe intizâren imtihânların te'hîri câiz olamayacağı derkâr bulunduğu binâen ne vechile mu'amele olunmak lâzım geleceğinin bâ-işâret-i aliyye irâde ve fermân buyurulması bâbında.

Vahyî, Mustafa, Ali, Mehmed Abdûlbâki, Tevfik

IST\_MFT\_MSH\_DFT02\_01741\_0001-0113-114

**Karagümrük'te Şeyh Nureddin Cerrâhî Dergâhı meşihatının babası İsmâil Nimet Efendi'nin vefatıyla kendisine tevcihi gerekirken, amcazâdesi Fahreddin Efendi'ye tevcih edildiğine dair Gâlib Efendi'nin yaptığı başvuru hakkında nihai kararın Şûrâ-yı Devlete sorulması.**

Fî gurre-i C. sene 1337 / Fî 4 Mart sene 1335 / - / - / - / - / - / 25 / Fî 2 C. sene-i minhü [5 Mart 1919] / Fî 5 Mart sene-i minhü

Müzekkire

İstanbul'da Karagümrük civârında kâin Şeyh Nureddin-i Cerrâhî -kuddise sırruhû- Hazretlerinin Dergâh-ı şerîfi meşihatının pederi müteveffâ İsmâil Nimet Efendi'den intikâlen tamamıyla kendisine tevcihi lâzım gelirken hilâf-ı nizâm olarak amcazâdesi Fahreddin Efendi'ye tevcih edilmiş olduğundan bahisle müteveffâ-yı mûmâ-ileyhin sagîr mahdûmu Galib Efendi'nin vâlidisiyle beraber vukû' bulan mürâca'atları üzerine tevcih-i mezkûra dâir mahfûz bulunan evrâk dosyası Evkâf-ı Hümayûn Nezâret-i celîlesinden celb edilerek tedkik olundukta evrâk-ı mezkûre iki takım olup birisi Fahreddin Efendi'nin pederi müteveffâ Mehmed Rızaeddin Efendi'den mün-takil nısf hissenin ve biri dahi amcazâdesi İsmâil Nimet Efendi'den münhal diğer nısf hissenin muhtelif târihlerde mûmâ-ileyh Fahreddin Efendi'nin uhdesine tevcihleri hakkında olduğu görülmüş ve pederi Rızaeddin Efendi'den münhal nısf hissenin tevcihi hakkındaki birinci takım evrâk câlib-i nazar-ı dikkat bulunmuştur.

Şöyle ki: Dergâh-ı mezkûr meşihati birer nısf hisse olarak Mehmed Rızaeddin Efendi'yle biraderzâdesi İsmâil Nimet Efendi uhdeslerinde iken Mehmed Rızaeddin Efendi'nin 9 Mayıs sene 1329 târihinde vukû'-ı vefâtı üzerine mahdûmu Fahreddin Efendi 19 Mayıs sene 1329 târihli istid'ânâme ile pederinden münhal nısf hisse meşihatın Tevcih-i Cihât Nizâmnâme-i Atîki'nin on üçüncü maddesine tevfiikan uhdesine tevcihini istid'â etmiş ve Meclis-i Meşâyihden dahi cihet-i mezkûrenin mûmâ-ileyhin uhdesine tevcihine dâir mazbatası 7 Eylül sene 1329 târihiyle tanzîm edilmiş olduğu anlaşılmıştır. 29 numaralı ve 7 Eylül sene 1329 târihli mazbata-i

mezkûre Şûrâ-yı Evkâfda tedkîk olundukta 23 Temmuz sene 1329 târihli Tevcîh-i Cihât Nizâmnâme-i Cedîdi ahkâmına tevfiķan müteveffâ Rızaeddin Efendi'den münhal nısf hissenin müştereki bulunan diğerk nısf hissenin mutasarrıfı mûmâ-ileyh İsmâil Nimet Efendi'ye tevcihi icâb edeceğinden bahisle 6 Teşrîn-i evvel sene 1329 târihli kararnâme sûret-i musaddakasıyla mazbata-i mezkûre tekrar Meclis-i Meşâyihe i'ade olundukta Meclis-i Meşâyih 86 numaralı ve 26 Teşrîn-i sâni sene 1329 târihli derkenârında mu'âmele-i esâsiyyeyi teşkil eden istid'â târihiyle muharrer derkenâr ve havâlelerinin târihleri nizâmnâme-i cedîdin neşrinden mukaddem olduğu ve mûmâ-ileyh Fahreddin Efendi'nin bazı istîzâhât zımında Meclisce huzûruna lüzûm görüldüğü hâlde merbût rapor nâtik bulunduğuz üzere esîr-i firâş olmağla tanzîm kılınan mazbatanın takdîmi tehhura uğradığı ve bi'l-âhare mazbatası takdîm edildiği gün tabiî o günün târihi yazıldığı ve binâen-aleyh evrâkın nizâm-ı cedîd ile bir alâkası olmadığı gösterilmiş ve işbu mütâlâât Şûrâ-yı Evkâfın 153 numaralı ve 4 Kânûn-ı evvel sene 1329 târihli kararnâmesiyle tasdik olunduğuz görülmüştür. Meclis-i Meşâyihin kuyûd-ı mevcûdesine lede'l-mürâca'a ayrıca bir karar kaydına zafer-yâb olunamamış ve yalnız evrâk-ı müsvedde arasında mezkûr mazbatanın müsveddesi aynı tebyüzindeki târih ile [0114] müverrah bulunduğuz meşhûd olmağla ayrıca takdîm kılınmıştır. Binâen-aleyh tedkîkât-ı vâkı'a neticesinde Meclis-i Meşâyihin istid'ânâme târihine i'tibâr eylediği ve tevcih kararından ibâret bulunan mazbatanın tesvîd ve tanzîmi zamanındaki târihi nazar-ı i'tibâr almadığı anlaşılmış ve bu misilli hâdiselerde yekdiğeriyle müte'âriz mukaddem ve muahhar nizâmnâmelerin tatbîkinde mürâca'at ile karar târihlerinden hangisinin nazar-ı i'tibâr alınması lâzım geleceğuz husûsunda Meclis-i dâ'iyânemizce tereddüd edilmiştir.

Ber-vech-i ma'rûz nısf hissenin Fahreddin Efendi'ye tevcihinden on mâh kadar bir zaman mürûrundan sonra İsmâil Nimet Efendi'nin vefâtı üzerine uhdesindeki diğerk nısf hisse dahi nizâmnâme-i cedîd ahkâmına tevfiķan mûmâ-ileyh Fahreddin Efendi'ye tevcih olunmuştur. Hâlbuki nizâmnâme-i mezkûrun mevki'-i mer'iyette bulunduğuz 7 Eylül sene 1329 târihlerinde mevâdd-ı mahsûsasına tevfiķan Rızaeddin Efendi'den münhal nısf hisse müştereki bulunan İsmâil Nimet Efendi'ye tevhiiden tevcih edilmiş olsaydı bi'l-âhare İsmâil Nimet Efendi'nin vefâtıyla meşihat-i mezkûre tamamen bi'n-niyâbe mahdûmu sagîr Galib Efendi'ye tevcihi lâzım geleceğuz bedihî bulunmuş ve ancak kısmen nizâmnâme-i atîk ve kısmen nizâmnâme-i cedîd ahkâmına tevfiķan cihet-i mezkûre tamamıyla Fahreddin Efendi uhdesinde ictimâ' etmekle sagîr-i merkûm hâric kalmıştır. Binâen-aleyh tarafeynin hukûk-ı meşrû'a-i nizâmiyyelerinin vikâyesi husûsunda muktezâsıyla amel edilmek üzere Şûrâ-yı Devletce icâb eden bir karâr-ı nizâmî ittihâzı zımında husûs-ı mezkûra âid iki takım evrâk dosyalarıyla beraber işbu müzekkire-i dâ'iyânemizin şûrâ-yı müşârun-ileyhâ riyâset-i celîlesine irsâl buyurulması tezekkür kılındı ol bâbda.

Vahyî, Mustafa, Mehmed Abdûlbâki, Ali, Safvet

IST\_MFT\_MSH\_DFT02\_01741\_0001-0115

**Sultanahmet'te İskendergazi Mahallesi'nde İsmâil Efendi diğerk adıyla Özbekler Dergâhı'nın meşihati ile diğerk vazifelerinin deruhte ve maaş miktarına ait kayıtlarının Evkaf Nezâretinden istenmesi.**

Fî gurre-i C. sene 1337 / Fî 4 Mart sene 1335 / - / - / - / Sîret / - / 24 / Fî 2 C. sene 1337 [5 Mart 1919] / Fî 5 minhü

Müzekkire

Sultânahmed civârında İskendergazi Mahallesi'nde kâin esâsen tarîkat-i aliyye-i Nakşibendiyye'den İsmail Efendi ve el-yevm Özbekler Dergâhı denilmekle ma'rûf dergâhın meşîhatının ve derûnunda cihât-ı sâire-i ilmiyye ve bedeniyye var ise onların dahi der'uhde ve şürût-ı tevcihiyye ve mikdâr-ı vezâif kayıdlarının bâ-derkenâr beyânı zımında işbu müzekkirenin mazrûfen Evkâf-ı Hümâyûn Nezâret-i celîlesine irsâl buyurulması bâbında.

Mustafa, Vahyî, Ali, Mehmed Abdülbâki, Safvet

IST\_MFT\_MSH\_DFT02\_01741\_0001-0116

**Koska'da Abdüsselâm Dergâhı postnişini Hikmet Efendi'nin azledilmesi nedeniyle, yapılacak yeni tayine kadar dergâhın muhassasat ve tayinatının mevkuf tutulması.**

Fî 30 C. sene 1337 / Fî 3 Mart sene 1335 / - / - / - / Sîret / - / 23 / Fî 30 minhü [3 Mart 1919] / Fî 3 minhü

Müzekkire

Koska'da kâin Abdüsselâm Hazretleri Dergâh-ı şerîfi postnişini Hikmet Efendi'nin tahakkuk eden mesâvî-i ahvâline binâen uhdesinden cihet-i meşîhatın ref'i hakkında takdîm kılınan tezkiye fi 22 Cemâziyelevvel sene 1337 ve fi 23 Şubat sene 1335 târihinde mücebince işâret-i aliyye-i cenâb-ı Fervâ-penâhîlerine iktirân ettiği cihetle diğer münâsibi uhdesine tevcihiyle iş'âr-ı ahîre değin dergâh-ı mezkûr muhassasât ve mu'ayyenâtının mevkûf tutulması ve Nukûd-ı Mevkûfe İdâresine dahi ma'lûmât i'tâ olunması zımında işbu müzekkirenin mazrûfen Evkâf-ı Hümâyûn Nezâret-i celîlesine irsâl buyurulması tezekkür kılındı.

Vahyî, Seyyid Mehmed es-Sükûtî, Mustafa, Ali, Safvet

IST\_MFT\_MSH\_DFT02\_01741\_0001-0117-18

**Bazı meşihat ve görev tevcihlerinde usulsüzlükler olduğundan Meclis-i Meşâyihçe bir talimatname hazırlanıp tamimen neşredilmesi talep edilmişse de böyle bir talimata gerek olmadığı Evkaf Nezâretine bildirilmesi.**

Fî 28 Ca. sene 1337 / Fî 1 Mart sene 1335 / - / Kırmızı 34 / 73 / Sîret / - / 22 / Fî 30 Ca. sene 1337 [3 Mart 1919] / Fî 3 Mart sene 1335

Müzekkire

Münhal meşihatlerin meşrûtün-lehine veya müstahıkkına tevcihinden evvel hayrâtın ma'mûr ve vâridât-ı vakfın mevcûd ve hizmet-i münhalenin lâzımü't-tevcih olduğu tahakkuk ettirilmek muktezî olduğu hâlde Meclis-i Meşâyihçe Tevcih-i Cihât Nizâmnâmesi'nin bazı mevâd ile mütêârız olan Meclis-i Meşâyih Nizâmnâmesi'ne istinâden bilâ-tahkik bu misilli cihâtın tevcih edilegelmekte ve bu hâl fi'l-hâl i'mârî gayr-i kâbil hayrâta postnişini nasb olunarak fuzûlî ta'âmiyye i'tâsını ve aynı zamanda tevcih olunan meşihate meşrût tevliyetlerin tevcihiyle hukûk-ı vakfın ziyâ'ını müstelzem bulunmakta olduğu gibi batn-ı evvelde meşrûtün-leh var iken batn-ı sâni'deki bir sabiye tevcih-i meşihat gibi nizâmnâme hilâfında bazı hâlât dahi meşhûd olduğundan bahs ile sâlifü'z-zıkr Meclis-i Meşâyih Nizâmnâmesi'ne bu misilli cihâtın tevcihinden mukaddem hayrâtın ma'mûr ve vâridât-ı vakfın mevcûd ve cihet-i münhalenin tevcihi lâzım



olduğu tahakkuk ettirildikten sonra meşihatın tevcih olunması zemîninde bir fıkra ilâvesi ve yâhûd bunun bir ta'limât-nâme ile taht-ı te'mîne alınması husûsuna dâir Edirne vilâyeti Evkâf Müdüriyyetinden gelen tahrîrât üzerine ahîran neşr olunan Meclis-i Meşâyih Nizâmnâmesi'nin dokuzuncu maddesinde Şûrâ-yı Evkâfa ve evkâf idârelerine mevdû' vezâifin İstanbul'da Meclis-i Meşâyih ve taşrada encümen-i meşâyih taraflarından Tevcih-i Cihât Nizâmnâmesi ahkâmına tevfiikan icrâ olunacağı musarrâh olduğu gibi Tevcih-i Cihât Nizâmnâmesi'nin yirmi ikinci maddesinde hizmeti metrûk veya mu'attal veya bî-lüzûm olan cihetlerin kimseye tevcih olunmayacağı gösterilmesine nazaran gerek Meclis-i Meşâyihin ve gerek encümen-i meşâyihin tevcihte nizâmnâme-i mezkûr ahkâmını nazar-ı itibâra almaları tabii olup bu cihetlere itinâ olunduğu hâlde mahallince mülâhaza olunan mahzûra mahal kalmayacağı hâtıra gelmekte ise de mu'amelât-ı vakfiyye nokta-i nazarından pek de gayr-i vârid görülmeyen sûret-i iş'arın te'mini zımnında şûrâca yapılacak bir mu'amele görülmeyişinden encümen-i meşâyihlerce bu cihetlere itinâ olunmasını te'minen Meclis-i Meşâyihce bir ta'limât-nâme tertib ettirilerek ta'mimen tebliği Şûrâ-yı Evkâftan ifâde kılındığı beyânıyla Evkâf-ı Hümâyûn Nezâret-i celîlesinden vârid olup havâle buyurulan 19 Cumâdelûlâ sene 1337 ve 20 Şubat sene 1335 târihli ve husûsî yirmi numaralı merbût tezkire kırâet ve icâbı müzâkere olundu.

Meclis-i dâ'iyânemiz vezâif-i kânûniyyesini tamamıyla müdrik olup teşekkülü târihinden beri Dersââdette tekâyâyâ âid cihâtın tevcihinde Meclis-i Meşâyih Nizâmnâmesiyle Tevcih-i Cihât Nizâmnâmesi ahkâmı harfiyyen tatbik edildiği gibi taşrada encümen-i meşâyih hey'etleri tarafından mevrûd evrâk-ı tevcihiyyenin dahi ahkâm-ı mezkûreye mutâbakatı ba'de't-tedkik tasdik edilmekte olduğu ve kable't-tevcih Dersââdet'te Evkâf-ı Hümâyûn Nezâret-i celîlesinden [0118] ve taşralarda evkâf idârelerinden kuyûd-ı mukteziyye-i nizâmiyyeleri isti'lâm ile ona göre mu'amele-i lâzimesi ifâ olunmakta bulunduğu hâlde Edirne Evkâf Müdüriyyetinin hiçbir madde-i mu'ayyeneyi muhtevî olmayan ve sırf ihtimâlâta mebnî mülâhazadan ibâret bulunan iş'ar-ı vâki'ini Şûrâ-yı Evkâfın nazar-ı ehemmiyete alarak ihtimâlât-ı mezkûreyi bi'l-kabûl tervicini iltizâm etmesi şâyân-ı teessür görülmüştür. Şûrâ-yı müşârun-ileyhânın mülâhazâtı nazar-ı dikkate alınabilmek için iş'ar-ı vâki'ada batn-ı evvelde meşrûtün-lehi mevcûd iken batn-ı sâniiden bir sabîye meşihat cihetinin tevcihinden bahsedilen dergâhın ve Tevcih-i Cihât Nizâmnâmesi'nin bazı mevâddıyla müte'âriz bulunduğu dermiyân olunan Meclis-i Meşâyih Nizâmnâmesi'nin mevâdd-ı müte'ârizasının ta'yîn ve tasrihi muktezî bulunmuştur. Hizmeti metrûk veya mu'attal veya bî-lüzûm olan cihetlerin kimseye tevcih olunmaması hakkındaki madde-i nizâmiyye bahsine gelince şimdiye kadar bunun hilâfına olarak hiçbir cihetın tevcih olunmadığı gibi mu'ayyenât ve muhassasâtı olup da dergâhı mevcûd olmayan hiçbir cihet-i meşihat ve tekâyâyâ âid bu misilli cihât-ı sâire dahi tevcih olunmamıştır.

Binâen-aleyh ma'rûzât-ı mebsûtadan müstebân olacağı üzere Meclis ve Encümenler vazîfelerini ahkâm-ı nizâmiyyeye tevfiikan ifâ etmekte olduklarından bu bâbda ayrıca bir fıkra-i nizâmiyye ve yâhûd ta'limât-nâmeye ihtiyâc olmadığının cevâben nezâret-i müşârun-ileyhâya iş'ar buyurulması tezekkür kılındı ol bâbda.

Vahyî, Seyyid Mehmed es-Sükûtî, Mustafa, Mehmed Abdülbâki, Ali, Safvet

IST\_MFT\_MSH\_DFT02\_01741\_0001-0119

**Eyüp'te Şeyhülislam Feyzullah Efendi Dergâhı'nda iskân edilen yangınzedeler arasında uygunsuz hareketlerde bulunanların dergâhtan tahliyesi.**

Fî 24 Cemâziyelevvel sene 1337 / Fî 25 Şubat sene 1335 / - / - / - / Sîret / - / 21 / Fî 25 minhü [26 Şubat 1919] / Fî 26 minhü

Müzekkire

Hazret-i Ebâ Eyyûb el-Ensârî -radiye anhü'l-Bârî- civârında kâin merhûm Şeyhülislâm Feyzullah Efendi Dergâh-ı şerîfine harîk-zede yekdiğerine mahrem bir kadın ve bir erkek zâbitaca iskân ettirildiği ve ud çalmak ve iş ü işret etmek gibi nâ-sezâ ahvâlde bulundukları dergâh-ı mezkûr postnişîni Şeyh Râsih Efendi tarafından ifâde kılınmış ve dergâhlarda bu misilli eşhâsın ikâmeti gayr-i kâbil-i tecvîz bulunmuş olduğundan Mebânî-i Hayriyye İdâresince serî'an tahliyesi husûsunun bâ-tezkire-i aliyye Evkâf-ı Hümâyûn Nezâret-i celîlesine iş'âr buyurulması tezekkür kılındı ol bâbda.

Vahyî, Mustafa, Seyyid Mehmed es-Sükûtî, Ali, Mehmed Abdülbâki, Safvet

IST\_MFT\_MSH\_DFT02\_01741\_0001-0120

**Sultan II. Mahmud Han'ın, Bektaşî dergâhlarını Nakşibendî dergâhlarına çevrilmesine dair verdiği ferman suretinin Evkaf Nezâretinden istenmesi.**

Fî 22 Ca. sene 1337 / Fî 23 Şubat sene 1335 / - / - / - / Sîret / - / 20 / Fî 22 Ca. sene-i minhü [23 Şubat 1919] / Fî 23 Şubat sene-i minhü

Müzekkire

Cennet-mekân Sultân Mahmud Hân-ı sâni Hazretleri tarafından gürûh-ı Bektâşiyâna mahsûs tekkelerin tarîkat-i aliyye-i Nakşibendiyye tekkesine tahvîli hakkında iki yüz kırk bir târihlerinde sâdır olan fermân-ı âlî mündericâtının Meclisce bilinmesine lüzûm görüldüğünden Kuyûd-ı Vakfiyye İdâresinden bir kıt'a sûret-i musaddakasının ihrâcıyla serî'an irsâli zımınında işbu müzekkirenin mazrûfen Evkâf-ı Hümâyûn Nezâret-i celîlesine irsâl buyurulması bâbında.

Vahyî, Seyyid Mehmed es-Sükûtî, Mustafa, Mehmed Abdülbâki, Ali, Safvet

IST\_MFT\_MSH\_DFT02\_01741\_0001-0121

**Koska'da Abdüsselâm Dergâhı şeyhi Hikmet Efendi'nin dergâhın eşyalarını satması ve daha başka uygunsuz hareketleri sebebiyle görevinden azledilmesi.**

Fî 18 Ca. sene 1337 / Fî 19 Şubat sene 1335 / - / - / - / Sîret / - / 19 / Fî 19 Ca. sene 1337 [20 Şubat 1919] / Fî 20 Şubat sene 1335

Müzekkire

Koska'da kâin ehlullâh-ı kirâmdan Abdüsselâm Hazretlerinin medfûn bulunduğu Dergâh-ı şerîfi postnişîni Hikmet Efendi'nin bir hayli zamandan beri sefâhete inhimâk ile dergâh-ı şerîfte mevcûd eşyâyı satarak ahvâl-i sefîhesine sarf ettiği ihbâr olunup icrâ ettirilen tahkîkât ihbârâtı te'yîd ederek kendisi bundan evvel Meclis'e celb ve nesâyih ve tenbîhât-ı ekîde icrâ edilmiş olduğu hâlde ıslâh-ı nefis etmediği gibi bugünlerde dahi türbe-i şerîfenin sandukalarını kırıp sattığı ve

evvelce dergâhın her odasına müslim ve gayr-i müslim bir takım eşhâsı ikişer lira kira ile iskân ettiği ve onların eşyâsını dahi çalmakta olduğu haber verilmesi üzerine Meclis-i dâ'iyânemiz a'zâsından Şeyh Abdülbâki ve Şeyh Hüseyin ve sermüfettiş efendiler ma'rifetiyle mahallinde icrâ kılınan tahkîkât neticesinde hakikat bu merkezde olduğu tahakkuk etmiş ve ol bâbda tanzîm eyledikleri rapor merbûtan arz ve takdîm kılınmıştır. Ahvâl-i ma'rûza Tevcîh-i Cihât Nizâmnâmesi'nin elli üçüncü maddesi hükmünce şeyh-i mûmâ-ileyhin uhdesinden postnişînlîk cihetinin ref'ini müstelzem bulunduğundan ref'yle münâsib bir zâta tevcihi tezekkür kılınmağla rehîn-i tasvîb-i âlî-i cenâb-ı Meşihat-penâhîleri buyurulduğu takdîrde müzekkirenin işâret-i aliyye-i hazret-i Fetvâ-penâhîleriyle tevşîh buyurulması bâbında.

Vahyî, Mustafa, Mehmed Abdülbâki, Ali, Safvet

IST\_MFT\_MSH\_DFT02\_01741\_0001-0122

**Koska'da Abdüsselâm Dergâhı şeyhi Hikmet Efendi'nin dergâhın eşyalarını satması ve daha başka uygunsuz hareketleri sebebiyle, azledilerek dergâhtan ihraç edilmesi.**

Fî 18 Ca. sene 1337 / Fî 19 Şubat sene 1335 / - / - / - / Sîret / - / 18 / Fî 18 Ca. sene-i minhü [19 Şubat 1919] / Fî 19 Şubat sene-i minhü

Müzekkire

“Koska'da kâin Abdüsselâm Hazretleri Dergâh-ı şerîfi postnişîni Hikmet Efendi'nin tahakkuk eden mesâvî-i ahvâlinden dolayı nizâmnâme ahkâmına tevfiikan cihet-i meşihatın uhdesinden ref'i takarrur etmiş ve kendisi dergâhın sandıklarını bile satmakta bulunduğu bi't-tahkîk anlaşılmış olduğundan hemen dergâhtan ihrâcıyla leylek ve nehâran dergâha girmesinin men'i hakkıda tâbî' olduğu polis merkezine emr-i kat'î verilmesi ve harîk ikâ'ı gibi sû-i kasdına meydan verilmemek üzere tedâbîr-i mukteziyye ittihâzı hakkında tabî olduğu polis merkezine ser'ân emr-i kat'î i'tâsı zımında işbu müzekkirenin mazrûfen Polis Müdiriyyet-i Umûmiyyesine irsâl buyurulması tezekkür kılındı.”

Koska'da kâin Abdüsselâm Hazretleri Dergâh-ı şerîfi postnişîni Hikmet Efendi'nin dergâh-ı mezkûrun odalarını bir takım âilelere icâr eylediği ve gerek bu âilelerin ve gerek dergâhın eşyâsını sirkat etmekte olduğu ve dergâhın türbesindeki sandukalara varıncaya kadar aşırıp sattığı tahakkuk etmekle nizâmnâme ahkâmına tevfiikan cihet-i meşihatın uhdesinden ref'i takarrur etmiş ve yerine diğer bir zât ta'yîn olununcaya kadar dergâhın mûmâ-ileyhin tecâvüzâtından muhâfazası zarûrî bulunmuş olduğundan her türlü tecâvüz ve muhtemel bulunan sû-i kasdına meydan verilmemek üzere cihet-i meşhatiyle bir gûnâ alâkası kalmayan dergâh-ı mezkûre ba'demâ duhûl ve ikâmetine mâni' olunacak tedâbîr-i mukteziyye ittihâzı hakkında tâbî' olduğu polis merkezine ser'ân emr-i kat'î i'tâ buyurulması zımında işbu müzekkirenin mazrûfen Polis Müdiriyyet-i aliyyesine irsâl buyurulması tezekkür kılındı.

Vahyî, Mustafa, Ali, Mehmed Abdülbâki, Safvet

IST\_MFT\_MSH\_DFT02\_01741\_0001-0123

**Eyüp'te Molla Çelebi Dergâhı postnişini Hüseyin Efendi'nin askerde bulunduğu süre içinde, zevcesi tarafından dergâha yerleştirilen şahıslar ile boşadığı eşinin dergâhtan tahliyeleri.**

Fî 15 Ca. sene 1337 / Fî 16 Şubat sene 1335 / - / - / - / Sîret / - / 17 / Fî 18 minhü [19 Şubat 1919] / Fî 19 minhü

Müzekkire

Eyüpsultân civârında kâin Molla Çelebi Dergâh-ı şerîfi postnişini Hüseyin Efendi'nin askerde bulunduğu esnâda zevcesi tarafından dergâhın odalarına bir takım kimseler iskân edilmiş ve bi'l-âhare vazîfe-i askeriyyesinden avdetle zevcesini tatlik eylediği hâlde mutallakasıyla içlerinde uygunsuzları bulunan eşhâs-ı merkûme dergâhtan çıkmamakta oldukları Yedinci Merkez-i Tekâyâdan vukû' bulan iş'âr üzerine Meclis-i Meşâyih Sermüfettişliği tarafından icrâ olunan tahkîkâtı hâvî verilen ve merbûtan arz ve takdîm kılınan rapor mündericâtından anlaşılmıştır. Mebânî-i mukaddesenin bu misilli eşhâsa mesken ittihâzı şer'an ve nizâmen kâbil-i tecvîz olmayacağı derkâr bulunduğundan âidiyeti cihetiyle Mebânî-i Hayriyye İdâresince bilâ-imhâl dergâhın hemen tahliyesi esbâb-ı nizâmiyyesine tevessül ettirilmesi hakkında emr-i kat'î i'tâsî husûsunun Evkâf-ı Hümayûn Nezâret-i celîlesine iş'âr buyurulması tezekkür kılındı ol bâbda.

Mehmed Abdülbâki, Vahyî, Mustafa, Ali, Safvet

IST\_MFT\_MSH\_DFT02\_01741\_0001-0124

**Mevlevîhanekapısı'nda Mimar Acem Dergâhı şeyhi Mustafa Efendi'nin, dergâhta ve civardaki ceviz, dut ve sakız ağacı gibi ağaçları kesip sattığı ihbarı üzerine; Mustafa Efendi'nin Meclise çağrılarak alınan ifadesinin Evkaf Nezâretine gönderilmesi.**

Fî 14 Ca. sene 1337 / Fî 15 Şubat sene 1335 / - / Kırmızı 21 / 53 / Sîret / - / 16 / Fî 15 Ca. sene 1337 [14 Şubat 1919] / Fî 14 Şubat sene 1335

Müzekkire

Mevlevîhanekapısı civârında kâin Mi'mâr Acem Dergâh-ı şerîfi şeyhi Mustafa Efendi tevârih-i muhtelifede dergâh-ı mezkûr bahçesinde bulunan cesîm iki aded ceviz ve bir aded sagîr dut ağaçlarını ve mahall-i mezkûrda kâin câmi'-i şerîf havlusundaki kabristanda mevcûd servi ağaçlarından birinin nısfıyla kebîr sakız ağacının dallarını kat' ettirdiği ve ceviz ağacını otuz liraya fûrûht eylediği ihbâr ve tahkîkâttan anlaşıldığından mûmâ-ileyh hakkında muktezî mu'âmeninin Meclis-i dâ'iyânemizce ifâsına dâir Evkâf-ı Hümayûn Nezâret-i celîlesinden vârid olup havâle buyurulan fî 5 Cemâziyelevvel sene 1337 ve fî 6 Şubat sene 1335 târihli ve 116809 u[mûmî], 7 h[usûsî] numaralı merbût tezkire kırâet olundu.

Şeyh-i mûmâ-ileyh celb ve keyfiyyet istîzâh olundukta dergâhın bahçesinde bulunan kuru ceviz ağacını altı ay mukaddem kat' ettirmiş ise de satmadığını ve her sene bahçeye ağaç gars edegeldiğini ve kabristanda Câmi'-i şerîfin saçaklarına îrâs-ı zarar eden iki kavak dallarını Mebânî-i Hayriyye ser-müfettişine ma'lûmât vererek kestirdiğini ve diğer dalları da hânesine mazarrat verdiğini haber veren komşu bekçi marifetiyle kat' ettirip maktû'âtı bekçi alıp götürdüğünü ve aleyhinde vukû' bulan isnâdât ve ihbârât garaz ve nefsâniyetten münba'is bulunduğunu ifâde ve beyân etmekle ifâde-i vâkı'aya nazaran nezâret-i müşârun-ileyhâ devâir-i âidesince ta'mîk-i tahkîkât edilerek icâb ettiği takdîrde mûmâ-ileyh hakkında ta'kîbât-ı kânûniyye icrâ ve neticesine göre

Meclis-i Meşâyihi Nizâmnâmesi ahkâmına tevfiқан mu‘âmele-i mukteziyye tatbîk olunmak üzere keyfiyyetin inbâ olunması husûsunun cevâben iş‘âr ve melfûf varaka-i ihbâriyye ile tahkîk raporlarının ilâve ve tesyâr buyurulması tezekkür kılındı ol bâbda.

Vahyî, Mustafa, Ali, Mehmed Abdülbâki, Safvet

IST\_MFT\_MSH\_DFT02\_01741\_0001-0125

**Tarih ve numarası belirtilen Evkaf Nezâretinden gelen tezkirenin Evrak İdaresinden istenmesi.**

Fî 11 Ca. sene 1337 / Fî 12 Şubat sene 1335 / - / - / - / Sîret / - / 15 / Fî 11 Ca. sene 1337 [12 Şubat 1919] / Fî 12 Şubat sene 1335

Müzekkire

Fî 11 Kânûn-ı evvel sene 1334 târih ve 45 numaralı derkenârla li-ecli'l-hıfz i‘âde kılınan Evkâf-ı [Hümâyûn] Nezâret-i celîlesinin 25 Teşrîn-i sâni sene 1334 târihli ve 115500 [umûmî ve] 52 [husûsî] numaraları tezkire-i cevâbiyyesinin tekrar Meclisce mütâla‘asına lüzûm görüldüğünden rabten irsâli zımnında işbu müzekkire Evrâk Müdiriyyet-i behiyyesine tevdî‘ kılındı.

Ali

IST\_MFT\_MSH\_DFT02\_01741\_0001-0126

**Hacı Bektâş-ı Velî Dergâhı postnişin vekili Ahmed Şakir Efendi’nin, postnişinliğe asaleten tayinini talep etmişse de bu göreve, Meclis-i Meşâyihi azasından Şeyh Hasan Efendi’nin atanması.**

Fî 5 Ca. sene 1337 / Fî 6 Şubat sene 1335 / - / - / - / 49 / Sîret / - / 14 / Fî 9 Ca. sene 1337 [10 Şubat 1919] / Fî 10 Şubat sene 1335

Müzekkire

Hacı Bektâş-ı Velî Hazretleri Dergâh-ı şerîfi postnişinliğine asâleten ta’yini istirhâmına dâir Arabsun kazâsı merkezinden atebe-i seniyye-i cenâb-ı mülûkâneye keşide olunup havâle buyurulan mezkûr postnişin vekili Ahmed Şakir imzâlı telgrafnâme kırâet olundu.

Mukaddemâ vekil ta’yin edilmiş olan mûmâ-ileyhin terk-i hizmet ettiği cihetle münâsibinin ta’yini hakkında makâm-ı vilâyetten vukû‘ bulan iş‘âra binâen evvel emirde nizâmnâme ahkâmına tevfiқан mahallince ehil ve muktedir tarîk-i Nakşîyye meşâyihinden bir zâtın müsâbaka imtihânıyla ta’yin olunması Ankara Merkez Müfettişliğine lede’l-iş‘âr gelen cevâbda sıfât-ı matlûbeyi hâiz kimse bulunmadığından Der‘aliyyeden münâsibinin ta’yini izbâr olunması üzerine mezkûr postnişinliğe fî Kânûn-ı sâni sene 1335 târih ve 1 numaralı müzekkire-i dâ‘iyânemizle intihâb olunan Meclis-i Meşâyihi a‘zasından Şeyh Hasan Efendi dâ‘ileri ta’yin ve berât-ı âlîsi ıstâr buyurulmuştur. Ancak vekil-i sâbık mûmâ-ileyhin icrâ-yı asâleti hakkında mu‘âmele cereyân ettiğine dâir ma‘lûmât-ı kaydiyye olmadığı gibi işbu telgrafnâmenin Arabsun merkezinden keşide olunması dahi vaktiyle vazifesini terk ederek hâlâ diğer kazâda ikâmet etmekte olduğuna delâlet eylediğine ve esâsen iddi‘âsı şâyân-ı iltifât olmadığına binâen li-ecli'l-hıfz Evrâk Müdiriyyet-i Behiyyesine havâle buyurulması tezekkür kılındı ol bâbda.

Vahyî, Mustafa, Ali, Safvet

IST\_MFT\_MSH\_DFT02\_01741\_0001-0127

**Üsküdar'da Kefçedede Mahallesi'nde Abdülhalim, Bahariye'de Şah Sultan ve Mevlevî dergâhlarının; arsa, bahçe ve adasına yapılan müdahalenin önlenmesi.**

Fî gurre-i Ca. sene 1337 / Fî 2 Şubat sene 1335 / - / - / - / - / Sîret / - / 13 / Fî 4 Ca. sene 1337 [5 Şubat 1919] / Fî 5 Şubat sene 1335

Müzekkire

Üsküdar'da Kefçedede Mahallesi'nde Abdülhalim ve Bahariye'de Şah Sultân ve Mevlevî dergâhlarına âid arsa ve bahçe ve adaya bazı taraftan tecâvüz vukû' bulduğuna dâir Meclis-i Meşâyih Sermüfettişliğinden verilen raporun takdîmiyle bu gibi tecâvüzâtın bilâ-muhâkeme men'î hakkındaki irâde-i seniyye ahkâmına tevfiқан icrâ-yı icâbının Evkâf-ı Hümâyûn Nezâret-i celilesine iş'âr buyurulması zımında takdîm kılınan 12 Kânûn-ı evvel sene 1334 târihli ve 74 numaralı müzekkireye binâen nezâret-i müşârun-ileyhâya şeref-tastîr buyurulan tezkire-i aliyye-i Meşihat-penâhî müceb-i âlisince cereyân eden mu'âmelenin inbâsı husûsunun nezâret-i müşârun-ileyhâya iş'âr buyurulması bâbında.

Safvet

IST\_MFT\_MSH\_DFT02\_01741\_0001-0128

**Uygunuz hareketleri olduđu ihbar edilen Osmancık kazasındaki Koyuncuk Baba Tekkesi şeyhi Hilmi Efendi hakkında tahkikat yapılması.**

Fî 3 Ca. sene 1337 / Fî 4 Şubat sene 1335 / - / - / - / - / Sîret / - / 12 / Fî 4 Ca. sene 1337 [5 Şubat 1919] / Fî 5 Şubat sene 1335

Müzekkire

Osmancık kazasında kâin Koyuncuk Baba Tekkesi şeyhi Hilmi Efendi'nin sıfat-ı mübeccele-i meşîhate münâfî bazı ahvâli istihbâr olduğundan mûmâ-ileyh hakkında tahkîkât-ı mûşîkâfâne icrâ ve neticesinin inbâ olunması husûsunun Ankara Merkez Müftülüğüne emr ü iş'âr buyurulması tezekkür kılındı.

Vahyî, Seyyid Mehmed es-Sükûtî, Mustafa, Ali, Safvet

IST\_MFT\_MSH\_DFT02\_01741\_0001-0129-130

**Mehmed Paşa Dergâhı'nın tahliyesi için Harik Komisyonu nezdinde teşebbüsatta bulunulması ve bütün dergâhlardaki teberrukat eşyalarının listesinin çıkartılarak bir defterinin gönderilmesi hususunun Evkaf Nezâretine bildirilmesi.**

- / - / - / - / - / - / - / - / 11 / Fî 3 Ca. sene 1337 [4 Şubat 1919] / Fî 4 Şubat sene 1335

Evkâf-ı Hümâyûn Nezâreti İdâre-i Merkeziyyesi teşkîlat ve vezâifini mübeyyin 20 Kânûn-ı sâni sene 1329 târihli mevâdd-ı mu'addile-i nizâmiyyede Mebânî-i Hayriyye Müdîriyyetinin vezâifi "Gerek merkez ve gerek taşrada kâin bi'l-umûm mebânî-i hayriyyenin tafsîlât-ı mükemmelesiyle esâs defterlerinin tanzîmi ve her birinin dosyasına muntazam krokileriyle muhtelif cihâttan aldrılacak fotoğraflerinin rabtı mebânî-i mezkûrenin i'mâr ve hüsn-i hâlde muhafâzası ve nevâkısın ikmâli gibi husûsât için icâb eden şu'ubât nezdinde teşebbüsât ve ta'kîbât-ı lâzimenin ifâsı ve merkezde bulunan mebânî-i hayriyyeye âid ta'mîrât-ı cüz'iyyenin icrâsı ve bi'l-umûm hayrât-ı

şerîfedeki eşyâ ve teberrükâtın kayıd ve tahrîriyle muhâfazası esbâbının istikmâli ilh.” diye tasrîh edilmiş ve ahkâm-ı şer’iyye ve nizâmiyye muktezeyâtıyla mine’l-kadîm tekâyâ ve zevâyâ mebânî-i hayriyye aksâm-ı mühimmesinden bulunmuş ve Meclis-i Meşâyih Nizâmnâmesi dergâhların inşâât ve ta’mîrât ve mu’ayyenât ve muhassasâtlarının Evkâf-ı Hümâyûn Nezâretine irtibâtını muhâfaza eylediği gibi mebânî-i hayriyyeye âid vezâif-i mezkûre kabîlinden olan umûr ve husûsun temşiyeti kemâ-kân idâre-i mezkûrede ibkâ ederek tekâyânın mebânî-i hayriyye idâdından ihrâcına yâhûd vezâif-i mezkûrenin Meclis-i Meşâyih tahrîr ve tahmîline dâir bir gûnâ kayıd ve işâreti ihtivâ etmemiş olduğu hâlde dergâhlara âid olup Mebânî-i Hayriyye İdâresince rü’yeti icâb eden husûsât hakkında Meclis-i dâ’iyânemizden ale’l-usûl Mebânî-i Hayriyye Müdiriyyetine mürâca’at vukû’ buldukça dâimâ ihmâl ve işkâl edildiği meşhûd olmaktadır. Ez-cümle leffen takdîm kılınan istid’ânın icrâ-yı icabı nass-ı nizâmı mücebiyle dergâhın hüsn-i hâlde muhâfazası esâsına müstenid olduğu ve şu esâs dâiresinde [0130] şû’ubât idâdında bulunan Harîk Komisyonu nezdinde teşebbüsât ve ta’kîbât-ı lâzime icrâsı Mebânî-i Hayriyye Müdiriyyetine âid bulunduğu hâlde işbu vazîfe-i asliyye-i nizâmiyyesini îfâ etmeyerek Meclis-i Meşâyih tahrîr eylemiştir. Kezâ bazı tekâyâ derûnunda bulunan teberrükât-ı vakfiyyenin ziyâ’a uğramakta olduğu istihbâr edilerek tahkîkât-ı lâzime îfâsı husûsunda mükerreren müdiriyyet-i mezkûreye mürâca’at edilmiş ise de düçar-ı ihmâl olmuştur. Binâen-aleyh tekâyâyâ müteallik ve ru’yet ve temşiyeti nizâmen Mebânî-i Hayriyye İdâresine âid umûrun bi-hakkın tesviye edilmesi ve ber-vech-i ma’rûz merbût istid’âda muharrer Mehmed Paşa Dergâh-ı şerîfinin tahliyesi husûsunda Harîk Komisyonu nezdinde teşebbüsât ve ta’kîbât-ı mukteziyenin îfâsı Mebânî-i Hayriyye İdâresinin cümle-i vezâifinden bulunmağla oraca esbâbına teşebbüs olunması ve bi’l-umûm dergâhlara âid teberrükâtın nizâmen idâre-i mezkûrece mazbût ve muharrer olması lüzûmuna binâen Meclis-i dâ’iyânemizce dahi murâkabesine esâs olmak üzere bir kıt’a defterinin bi’l-istinsâh gönderilmesi hakkında Evkâf-ı Hümâyûn Nezâret-i celîlesinden müdiriyyet-i mezkûreye tenbîhât ve evâmîr-i mukteziyyenin îfâ buyurulması husûsunda nezâret-i müşârun-ileyhâya iş’âr buyurulması bâbında.

Vahyî, Seyyid Mehmed es-Sükûtî, Mustafa, Ali, Safvet

IST\_MFT\_MSH\_DFT02\_01741\_0001-0131

**Adana’daki Hindî Şeyh Murad Tekkesi’nin; şeyh, imam ve müezzin maaşlarına zam yapılması ve dergâhın taâmiyesinin de artırılması talebinin Evkaf Nezâretine bildirilmesi.**

Fî 27 R. sene 1337 / Fî 30 Kânûn-ı sâni sene 1335 / - / - / 34 / - / Sîret / 10 / Fî 29 R. sene-i min-hû [1 Şubat 1919] / Fî 1 Şubat sene 1335

Müzekkire

Nefs-i Adana’da kâin evkâf-ı mazbûtadan Hindî Şeyh Murad Tekkesinin ahvâl-i harbiyye dolayısıyla sinîn-i sâbıkaya göre tenâkus ettiği hâlde otuz beş bin dokuz yüz guraşa bâliğ olan vâridât-ı seneviyyesine nisbeten altı bin üç yüz elli guraştan ibâret masârîf-ı seneviyyesi iktisâdiyâtın aldığı şekli-i nevîne nazaran şehri yüz elli guraşa mukâbil cüz’iyyât kabîlinden olduğu ve bununla vazîfedârânın hüsn-i îfâ-yı hizmet etmeleri kâbil olamayacağı cihetle alâ-hâlihî ibkâsı tekkenin maksad ve gâyesinden sarf-ı nazar etmekle müsâvî bulunduğundan bahisle şeyh ma’âşının şehri iki yüz ve imâm ma’âşının üç yüz ve tekkenin tanzîfâtıyla mükellef müezzin ma’âşının üç yüz



guruşa ve senevî altmış fukarânın yüz yirmiye iblâğıyla ta‘âmiyyelerinin beheri on guruşdan bin iki yüz guruşa iblâğı lüzûmuna dâir Adana Encümen-i Meşâyihinden tanzîm ve Meclis-i dâ‘iyânemiz riyâsetine irsâl olunan 15 Kânûn-ı evvel sene 1334 târihli ve bir numaralı mazbata ve merbûtu vâridât ve masârîf cedveli lede’l-mütâla‘a sûreti merbûtan takdîm kılınan mezkûr cedvel mündericâtına nazaran fi’l-hakîka dergâhın vâridâtına nisbetle masârîfı pek cüz’î olduğuna ve bu misilli müessesât-ı dîniyyenin idâme-i mevcûdiyet ve ma‘mûriyetine ve hademesinin terfîh-i ahvâline i’tinâ vecîbeden bulunduğu binâen iş‘âr-ı vâkı‘ın is‘âfı muvâfık-ı hâl ve maslahat olacağı tezekkür kılınmağla ol vechile zamâim icrâsıyla keyfiyyetin mahalline tebliği ve neticesinin bildirilmesi husûsunun Evkâf-ı Hümâyûn Nezâret-i celîlesine iş‘âr buyurulması bâbında.

Vahyî, Mustafa, Ali, Safvet

IST\_MFT\_MSH\_DFT02\_01741\_0001-0132

**Mevlevî dergâhlarının meşihat tevcihlerinin çelebi efendiler tarafından yapılmakta olduğu halde Meclis-i Meşâyih ve Tevcih-i Cihât nizamnamelerinde bütün dergâhların muamelelerinin Meclis-i Meşâyihle bağlanmasıyla bazı tereddütler meydana geldiğinden, nihai iş‘ârın bildirilmesi için konunun Şûrâ-yı Devlete havalesi.**

Fî 29 R. sene 1337 / Fî 1 Şubat sene 1335 / - / - / - / - / - / 9 / Fî 29 R. sene 1337 [1 Şubat 1919] / Fî 1 Şubat sene 1335

Meclis-i Meşâyih Nizâmnâmesi’nin ikinci maddesi mücebiyle bi’l-cümle tekâyâ ve zevâyânın Meclis-i Meşâyihle merbût olduğu ve Tevcih-i Cihât Nizâmnâmesi’nin dördüncü maddesi mücebiyle meşihat cihetinin bâ-berât-ı âlî tasarruf olunan cihetlerden bulunduğu ve kezâ Meclis-i Meşâyih Nizâmnâmesi’nin on ikinci maddesi mücebiyle Meclis-i Meşâyih’in tasdikine iktirân eden cihetlerin mazbataları makâm-ı Meşihat’in işâreti üzerine kayıtları tesviye edilmek ve berât ve vesîkaları ashâbına verilmek üzere Evkâf Nezâretine gönderilmesi lüzûmu musarrâh idiği cihetle işbu ahkâm-ı nizâmiyyenin tarikat-i aliyye-i Mevleviyye’ye âid tekâyâ ve zevâyâyâ dahi şümûlü iştibâh ve tereddüden âzâde olmasına binâen Mevlevî dergâhlarına âid meşihat cihetleri inhilâl eyledikçe mevâdd-ı mezkûre-i nizâmiyye ahkâmına tevfiikan mu‘âmele-i lâzime îfâ edilmekte ise de makâm-ı Meşihat’in işâreti üzerine Evkâf Nezâretine gönderilen musaddak meşihat mazbataları hakkında Evâmîr Kalemi İdâresince berâtın tastîr ve i’tâsı husûsunda tereddüd edilerek Şûrâ-yı Evkâfa sevk olunmakta ve Şûrâ-yı Evkâfca dahi Mevlevî dergâhları meşihat cihetlerinin çelebi efendilerin icâzetnâmeleriyle tasarrufuna dâir fî 14 Muharrem sene 1200 târihiyle şeref-sâdır olan fermân-ı âlî ahkâmına ve Meclis-i Meşâyih Nizâmnâmesi’nin bâ-irâde-i seniyye mevki’-i tatbîke vaz‘ından evvel cereyân eden te‘âmüle nazaran tereddüd edilmekte olduğu alâkadârânın mürâca‘atı üzerine anlaşılmış ve gerek Tevcih-i Cihât ve gerek Meclis-i Meşâyih nizâmnâmelerinde Mevlevî dergâhlarının istisnâiyetlerine dâir bir gûnâ kayıd ve işâret bulunmamış olduğundan ba‘demâ iştibâh ve tereddüde mahal kalmamak üzere te‘âmül-i sâbika ile ahkâm-ı ahîre-i nizâmiyyeye nazaran Şûrâ-yı Devletce bir karar ittihâz buyurulması lüzûmuna binâen müzekkirenin leffîyle şûrâ-yı müşârun-ileyhâ riyâset-i celîlesine tezkire-i aliyye tastîr buyurulması bâbında.

Vahyî, Mustafa, Safvet

IST\_MFT\_MSH\_DFT02\_01741\_0001-0133

**Sultanahmet'te Düğümlü Baba'nın medfun olduğu Arabacıbaşı diğer adıyla Mehmed Arif Baba Zaviyesi şeyhi ve türbedarı Şeyh Hasan İhsan Efendi'nin vefatıyla, bu görevlere vekâleten torunu Mustafa Şehabeddin Efendi'nin tayini.**

Fî 19 R. sene 1337 / Fî 22 Kânûn-ı sâni sene 1335 / - / - / - / Sîret / - / 8 / Fî 22 R. sene 1337 [25 Ocak 1919] / Fî 25 Kânûn-ı sâni sene 1335

İstanbul'da Sultânahmet meydanında kâin mecâzib-i ilâhiyyeden merhûm Düğümlü Baba'nın medfun bulunduğu Arabacıbaşı demekle ma'rûf Mehmed Arif Baba Zâviyesinin meşihat ve türbedârlık cihetlerinin bâ-berât-ı âlî vekîli tarikat-i aliyye-i Rifâ'iyye'den Şeyh Hasan İhsan Efendi'nin 19 Kânûn-ı sâni sene 1335 târihinde vukû'-ı vefâtına mebnî inhilâl eden ciheteyn-i mezkûreteyn taraflarından münâsibini vekâlete intihâb etmek üzere alâ-tarîki't-teberrük merhûm Vecihi Paşazâde İsmâil Kemal Paşa'nın evlâdına meşrût olduğu kayden müstebân olup evlâd-ı vâkıftan bulunan meşrûtün-leh el-yevm asker olarak taşrada bulunduğu ihbâr olundugundan avdet ederek şart-ı vâkıfa tevîkan mu'âmele-i mukteziyye icrâ olununcaya kadar zâviye-i mezkûre vezâifi mu'attal kalmamak üzere şeyh-i müteveffânın hafîdi ve halîfesi ve hâl-i hayatında sinn-i şeyhûhetine binâen vekîli olduğu ve ehliyet ve hüsn-i hâli bulunduğu İstanbul ve Üsküdar meşâyihinden on yedi imzâlı şehâdetnâmede beyân ve vekâlet-i mezkûrenin kendisine tevcihi istirhâm olunan Mustafa Şehabeddin Efendi'nin vekâleten ifâ-yı vazife etmesi tezekkür ve tensîb edilmekle karîn-i tasvîb-i âlî-i cenâb-ı Meşihat-penâhileri buyurulduğu takdîrde yalnız mu'âmele-i kaydiyye icrâsı zımnında işbu müzekkire-i dâ'iyânemizin leffîyle Evkâf-ı Hümâyûn Nezâret-i celîlesine tezkire-i aliyye tastîr buyurulmak bâbında.

Vahyî, Mustafa, Ali, Mehmed Abdülbâki, Safvet

IST\_MFT\_MSH\_DFT02\_01741\_0001-0134

**Edirne'de Şeyh Dâvud Efendi Dergâhı postnişinliğine, Şeyh Derviş Salih Efendi'nin tayini.**

Fî 18 R. sene 1337 / Fî 21 Kânûn-ı sâni sene 1335 / - / - / - / Sîret / - / 7 / Fî 17 R. sene 1337 [21 Ocak 1919] / Fî 21 Kânûn-ı sâni sene 1335

Edirne Encümen-i Meşâyihinin 13 Rebî'ülâhir sene 1337 ve 16 Kânûn-ı sâni Sene 1335 Târih ve 9 Numaralı Mazbatasına Zeyl

Edirne Encümen-i Meşâyihinden tanzîm ve irsâl olunan işbu mazbata kırâet olundu.

Mezkûr Şeyh Davud Efendi Dergâh-ı şerîfi postnişinlik cihetinin mûmâ-ileyh Şeyh Derviş Salih Efendi uhdesine tevcihi mukaddemâ vârid olan vakfiyesi sûret-i musaddakasında muhar-rer şûrûta ve cereyân-ı mu'âmele usûl ve nizâma muvâfık görölerek tasdîki karâr-gîr olmağla mu'âmele-i kaydiyyesi icrâ ve lâzım gelen berât-ı âlîsi bi't-tastîr mahallesine isrâ olunmak ve merbût sûret-i mezkûre Kuyûd-ı Vakfiyye İdâresince görüldükten sonra Meclis'e îade edilmek üzere işbu mazbatanın mazrûfen Evkâf-ı Hümâyûn Nezâret-i celîlesine irsâl buyurulması tezekkür kılındı.

Vahyî, Mustafa, Ali, Safvet

IST\_MFT\_MSH\_DFT02\_01741\_0001-0135

**Erzincan'da Kâdirî Dergâhı postnişini ve dergâhtaki mescidin imamı Hacı Mehmed Efendi'nin vefatıyla, yerine oğlu Mustafa Safvet Fuâdî Efendi'nin tayini.**

Fî 18 R. sene 1337 / Fî 21 Kânûn-ı sâni sene 1335 / - / - / - / Sîret / - / 6 / Fî 17 R. sene 1337 [21 Ocak 1919] / Fî 21 Kânûn-ı sâni sene 1335

Müzekkire

Erzincan kasabasında kâin Kâdirî Dergâh-ı şerîfi postnişini Hacı Mehmed Efendi'nin vefatıyla inhilâl eden meşihat ve dergâh-ı mezkûr dâhilindeki mescid-i şerîfin imâmet cihetlerinin oğlu Mustafa Safvet Fuadî Efendi uhdesine tevcihi hakkında mûmâ-ileyhin ahvâl-i harbiyye münâsebetiyle muvakkaten Kayseriye'de bulunması hasebiyle Erzincan Evkâf me'mûrunun da huzûruyla Kayseriye Hey'et-i İmtihâniyesince tanzim olunup Meclis-i Meşâyih Nizâm-nâmesi ahkâmına tevfikân Evkâf-ı Hümâyûn Nezâret-i celîlesinden mazrûfen vârid olup havâle buyurulan 1 Mayıs sene 1334 târihli merbût mazbata ve müteferri'âtı kırâet ve mütâlâ'a olundu.

Mûmâ-ileyh Mustafa Safvet Efendi'nin ciheteyn-i mezkûreteynin vezâifini ifâya ehliyet ve kifâyeti mazbata-i mezkûre müfâdından ve cihet-i meşihatın meşrûtiyetine dâir bir kayıd olmadığı Kuyûd-ı Vakfiyye İdâresi derkenârından ve imâmet ciheti için de başka tâlib zuhûr etmediği evrâk miyânında mevcûd Erzincan Evkâf Me'mûrluğu'nun tahrîrâtından müstebân olmasına binâen ciheteyn-i mezkûreteynin mûmâ-ileyhin uhdesine tevcih mu'âmelesinin tasdiki tezekkür kılınmağla nizâm-nâme-i mezkûr mücebine mu'âmele-i kaydiyyesi icrâ ve berât-ı âlisi tastîr ve mahalline isrâ olunmak üzere merbût evrâk ile beraber işbu müzekkirenin mazrûfen nezâret-i müşârun-ileyhâya irsâl buyurulması bâbında.

Vahyî, Mustafa, Ali, Safvet

IST\_MFT\_MSH\_DFT02\_01741\_0001-0136

**Silivrikapı'da Bâlî Ağa Dergâhı'nın muvakkithanesinde iskân edilmiş olan polis memurlarının tahliyeleri.**

Fî 13 R. sene 1337 / Fî 16 Kânûn-ı sâni sene 1335 / - / - / - / Sîret / - / 5 / Fî 15 R. sene 1337 [18 Ocak 1919] / Fî 18 Kânûn-ı sâni sene 1335

Müzekkire

Silivrikapısı civârında kâin Bâlî Ağa Dergâh-ı şerîfinin muvakkithâne dâiresine mukaddemâ iskân edilmiş olan o semt polis me'mûrlarının mine'l-kadîm süknâlarına mahsûs olan karakolhâneye nakilleri husûsunun bâ-tezkire-i aliyye Dâhiliyye Nezâret-i celîlesine iş'âr buyurulması dergâh-ı mezkûr postnişini Şeyh Ömer Fahreddin Efendi tarafından verilen istid'â üzerine yazılan 7 Muharrem sene 1337 târihli ve 22 numaralı derkenârla arz olunduğu ve îcâbı icrâ buyurulduğu hâlde me'mûrîn-i mûmâ-ileyhimin henüz başka mahal tedârik edemedikleri beyânıyla çıkmadıkları ve bu sûretle âbkeşlik ve muvakkitlik vazîfelerini mu'attal kıldıkları gibi harik-zede olan ashâb-ı cihâtın dahi şurada burada ma'a âile sürünmelerini müstelzem olduğu şeyh-i mûmâ-ileyhin Meclis'e bi'l-mürâca'a ifâdesinden anlaşılmış ve hilâf-ı şart-ı vâkıf olan şu hâlin devamı gayr-i câiz görülmüş olduğundan dâire-i mezkûrenin serî'an tahliyesiyle ashâb-ı cihâtın vezâifi başına gelmeleri esbâbının istikmâli hakkında nezâret-i müşârun-ileyhâya te'kidî hâvî tezkire-i aliyye-i Meşihat-penâhîleri tastîr buyurulması tezekkür kılındı ol bâbda.

Vahyî, Mustafa, Ali, Safvet

[0136A]

Dergâh-ı âcizînin sebîl ve muvakkithâne dâiresini fuzûlî işgâl eden polislerin başka mahal tedârik edemedikleri beyânıyla emir ve iş'ârât-ı mütevâliyyeye rağmen hâlâ temdîd-i ikâmetleri âbkeşlik ve muvakkitlik vazîfelerini mu'attal kıldığı gibi harîkzede olan ashâb-ı cihâtın dahi şurada burada ma'a âile sürünmeleri müstelzem olduğundan hilâf-ı şart-ı vâkıf ve menâfi-i adâlet şu ahvâlî ref'i zımnında dâire-i mezkûrenin serî'an tahliyesi esbâbının istikmâlî müsterhamdır.

IST\_MFT\_MSH\_DFT02\_01741\_0001-0137

**Meclis-i Meşâyih Nizamnamesi'yle sekiz adet talimatnamenin biraraya getirilerek bir risale şeklinde üç bin adet olarak Evkâf-ı İslâmiyye Matbaası'nda bastırılması.**

Fî 11 R. sene 1337 / Fî 14 Kânûn-ı sâni sene 1335 / - / - / - / - / 4 / Fî 12 R. sene 1337 [15 Ocak 1919] / Fî 15 Kânûn-ı sâni sene 1335

Müzekkire

Meclis-i Meşâyih Nizâm-nâmesi'yle sekiz adet ta'limât-nâmenin risâle şeklinde birarada tab'ıyla bi'l-umûm meşâyihe tebliğ ve tevzî'ine eşedd-i lüzûm olduğuna binâen üç bin nüsha olarak tab' ettirilmesi husûsunda Levâzım İdâresine tevdi' edilmiş ise de sene-i hâliyye bütçesinde kırtâsiye ve evrâk-ı matbû'a nâmına mevzû' mebâliğden mütebâkî mikdârın mebhûsün-anh nizâm-nâme ile ta'limât-nâmelerin tab'ına kifâyet edemeyeceğinden icmâlen bahsedilerek gelecek sene bütçesinin tasdikine kadar te'hîri mütâla'asıyla Meclis-i dâ'iyânemize i'ade kılınması üzerine Evkâf-ı İslâmiyye Matbaası Müdüriyetiyle bi'l-muhâbere elli lira kadar bir masrafla evrâk-ı mezkûrenin tab'ı te'mîn edileceği anlaşıldığından ve ma'a-mâfih evrâk-ı matbû'a tahsisâtından mütebâkî mikdârın elli lira kadar cüz'î bir meblağ raddesinde olmadığı hâlde dahi gelecek sene bütçesinden tesviye edilmek üzere tab'ı müdüriyyet-i müşârun-ileyhânın ta'ahhüd edilmekte olduğundan icâbı icrâ edilmek üzere Levâzım Müdüriyyet-i Behiyyesine irâde-i aliyye-i Meşihat-penâhîlerinin şâyân buyurulması bâbında.

Vahyî, Ali, Mehmed Abdülbâki, Safvet

IST\_MFT\_MSH\_DFT02\_01741\_0001-0138

**Bahariye'de Şah Sultan Dergâhı'nda ikamet ettirilmiş olan askerlerin tahliye edildikleri halde, yangınzede olduğu için kalmaya devam eden Muzaffer Bey'in de dergâhtan çıkarılması.**

Fî 9 Rebî'ülâhîr sene 1337 / Fî 12 Kânûn-ı sâni sene 1335 / - / - / - / - / Sîret / - / 3 / Fî 10 Rebî'ülâhîr sene-i minhü [13 Ocak 1919] / Fî 13 Kânûn-ı sâni sene-i minhü

Müzekkire

Bahariye'de kâin Şah Sultân Dergâh-ı şerîfinde ârâm-sâz asâkir-i şâhâne çıktığı hâlde selamlık dâiresine harîk-zede olmak dolayısıyla muvakkatten ikâme edilmiş olan Evkâf-ı Hümayûn Nezâret-i celîlesi Bütçe Kalemi hulefâsından Muzaffer Bey mutasarrıf olduğu müte'addid hânelerin icârından istifâde etmek maksadıyla henüz dâire-i mezkûreyi terk etmediğinden ve devâm-ı ikâmeti dergâhca bazı güne mazarratı tevlîd etmekte bulunduğundan mûmâ-ileyhin çıkarılması lüzûmu dergâh-ı mezkûr şeyhi efendinin mürâcâ'atına binâen Yedinci Merkez-i Tekâyâdan bâ-müzekkire ifâde ve beyân edilmiş olduğundan mûmâ-ileyhin emsâli vechile biran

evvel dergâhdan çıkarılması husûsunun me'mûrîn-i âidesine emir ve tebliğ olunması zımında işbu müzekkirenin mazrûfen nezâret-i müşârun-ileyhâya irsâl buyurulması tezekkür kılındı.

Vahyî, Mustafa, Mehmed Cevdet, Ali, Mehmed Abdülbâki

IST\_MFT\_MSH\_DFT02\_01741\_0001-0139

**Hacı Bektâş-ı Velî Dergâhı postnişinliğine tayin edilen Meclis-i Meşâyih azasından Şeyh Hasan Efendi'ye vazifesinde gerekli kolaylığın gösterilmesinin mahalline iş'arı.**

Fî gurre-i R. sene 1337 / Fî 4 Kânûn-ı sâni sene 1335 / - / - / - / Sîret / - / 2 / Fî gurre-i R. sene-i minhü [4 Ocak 1919] / Fî 4 Kânûn-ı sâni sene-i minhü

Müzekkire

Hacı Bektâş-ı Velî -kuddise sırruhu'l-celî- Hazretleri Hânkâh-ı şerîfi postnişinliğine mukaddemâ cereyân eden muhâbere neticesinde Ankara vilâyet-i celîlesinden vukû' bulan taleb ve iş'ara tevîkan tarîkat-i aliyye-i Nakşibendiyye usûl ve ezkârını icrâ ve kasaba ile mütecâvir nevâhî halkına eyyâm-ı mübâreke ve evkât-ı münâsibede va'z u nasîhat ifâ eylemek şartıyla Evkâf-ı Hümâyûn Nezâret-i celîlesinden muhassas şehri iki bin gurus tahsisâtla Meclis-i dâ'iyânemiz a'zasından olup i'lân-ı Meşrûtiyet'ten sonra makâm-ı sâmi-i Meşihat-penâhîlerinden Irak ahâlîsine va'z u nasîhate me'mûr buyurularak sekiz sene ifâ-yı hizmet eden sâdât-ı kirâmdan ve meşâyih-i Nakşibendiyye'den Sinneli Şeyh Hasan Efendi dâ'ileri ta'yîn buyurulmuş olduğundan vazîfesine müte'allık husûsatta mazhar-ı teshîlât olunması tavsiyesinin ilâvesiyle vilâyet-i müşârun-ileyhâya re'sen ve Ankara Merkez Müftülüğüne cevâben iş'ar buyurulması tezekkür kılındı.

Vahyî, Mustafa, Ali, Mehmed Gülşen

IST\_MFT\_MSH\_DFT02\_01741\_0001-0140

**Karagümrük'teki Nüreddin Cerrâhî Hankahı postnişinliğine tayin edilen Şeyh Fahreddin Efendi'nin, amcazâdesi Gâlib Efendi'ye aylık 500 kuruş vermeyi taahhüt etmesi.**

Fî 27 Ra. sene 1337 / Fî 31 Kânûn-ı evvel sene 1335 / - / - / - / Sîret / - / 1 / Fî 1 Rebî'ülâhîr sene 1337 [4 Ocak 1919] / Fî 4 Kânûn-ı sâni sene 1337

Müzekkire

Karagümrük civârında kâin Nureddin-i Cerrâhî Hazretleri Hânkâh-ı şerîfi postnişinliğini Şeyh Fahreddin Efendi'nin amcası müteveffâ Şeyh Nimetullah Efendi'nin uhdesinden inhilal eden nisf meşihat cihetinin pederi mahlûlünden uhdesine müvecceh diğer nisf hisseye ilhâken mûmâ-ileyh Fahreddin Efendi'ye tevcihi târihinde amcazâdesi sagîr Galib Efendi'nin i'âşesini ta'ahhüd etmiş olduğu bu bâbdaki evrâk mütâla'asından anlaşılmış ve ber-vech-i muharrer sagîr-i mûmâ-ileyhin i'âşe ve hâne kirâsına karşılık olmak üzere şehri beş yüz gurus i'tâ edeceğini bu kere Meclis'e mürâca'atla beyân ve ol bâbda bir kıt'a sened dahi i'tâ eylemiş olduğundan hânkâh-ı mezkûr tahsisât-ı nakdiyyesinden şehri beş yüz gurusun ayrıca kupon tanzîmiyle mûmâ-ileyh Galib Efendi nâmına tesviye olunması zımında işbu müzekkirenin mazrûfen Evkâf-ı Hümâyûn Nezâret-i celîlesine irsâl buyurulması bâbında.

Vahyî, Mustafa, Ali, Mehmed Gülşen